

मती च्वःगु भिंगु खँ म्हसीका

मती च्वःगु सुसमाचारय् येशू ख्रीष्ट हे लिपा वइतिनि धकाः अगमवाणी यानातःम्ह मुक्ति बीम्ह ख्रीष्ट खः धकाः क्यनातःगु दु। परमेश्वरं न्हापा पुलांगु नियमय् द्रुलंद्रः देँ न्ह्यः थः मनूतय्त अगमवक्तापाखें बियादीगु यक्व बचं थ्व हे मुक्ति बीम्ह ख्रीष्टपाखें पूर्वकादिल। सफूया शूस्या अध्यायलय् च्वयातःगु दु — अब्राहामया सन्तान, दाऊदया सन्तान, येशू ख्रीष्टया वंशावली। इस्राएलय् शासन याइम्ह दाऊदया वंशं वये माःगु जुयाः थन येशू ख्रीष्टयात दाऊदया सन्तान धकाः क्यनातःगु दु। थ्व सफूया नेयगू थासय् पुलांगु नियमया खँ तप्यंक न्ह्यथनातःगु दु, अले न्हयेन्यागू (७५) थासय् चाःहिकाः पुलांगु नियमया खँ न्ह्यथनातःगु दु।

मती थ्व सफुलिइ प्रभु येशू यानादीगु ज्या, वयकःया अजू चायापुगु ज्या, वयकलं स्यनेकने यानादीगु “परमेश्वरया राज्य” या खँया बारे च्वयातःगु दु। थ्व भिंगु खँ येशूया थःगु जाति यहदीतयगु निति जक मखु, सारा संसारया निति खः। मती प्रभु येशूया झिनिम्ह मध्ये छम्ह चेला खः। वयागु धातथैयागु नां लेवी खः।

मती थ्व सुसमाचारयात बांलाक मिलय् यानाः च्वयातःगु दु। थ्व सफुलिइ हेरोद जुजुं बेथलेहेमय् मचाम्ह येशूयात स्यायेत स्वःगुलि वपाखें बचय् जुइत योसेफ मचा व वया मां ज्वनाः मिश्रय् बिस्सुं वंगु खँ नं न्ह्यथनातःगु दु। लिपा येशू बप्तिस्मा कयादीगु, वयकःयात जाँचय् याःगु, वयकलं गालील्य स्यनेकने यानादीगु व ल्वय् लायकादीगु खँ दु। अले येशू गालीलं यरूशलेमय् झाःगु, अन दकलय् लिपायागु हप्ताय् जगु खँ व वयकःयात कूसय् यख्खाःगु, वयकः हानं म्वानावःगु व चेलातयत नापलाःगु खँ दु।

थ्व सुसमाचारय् येशू परमेश्वरया व्यवस्था ध्वाथुइकाबीगु अधिकार दुम्ह छम्ह तःधंम्ह गुरु खः धकाः क्यनातःगु दु। मती थःम्हं च्वःगु सुसमाचारय् यहदीमखुपिन्त नं दुथ्याकगु दु, गथेकि — येशूयात दर्शन यायेत पुर्व वःपिं ज्योतिषीत, २ः१-१२ प्रभु येशूयात तसकं विश्वास याःम्ह कप्तान, ८ः५-१३ व तसकं तःधंगु विश्वास दुम्ह कनानी मिसा। १५ः२२-२८ दकलय् तःधंगु थ्व आज्ञानापं सफू क्वचाइ “सारा संसारय् वनाः छिमिसं चेला दय्की।” २८ः१९

थ्व सफू ई.सं. ६५ निसैं ई.सं ८० तकया दथुइ च्वःगु जुइफु।
धलः पौ

येशू ख्रीष्टया पुर्खा व वय्कः बूगु १:१-२:२३
बप्तिस्मा बीम्ह यूहन्नां पश्चाताप यायेमाःगु खँ न्यंकाजूगु ३:१-१२
येशू बप्तिस्मा कयादीगु व वय्कःयात जाँचय् याःगु ३:१३-४:११
गालीलिय् येशूयागु ज्या ४:१२-१८:३५
गालीलं यरूशलेमय् झाःगु १९:१-२०:३४
यरूशलेमय् दकलय् लिपायागु हप्ता २१:१-२७:६६
येशू हानं म्वानाझाःगु व चेलातय्त नापलाःगु २८:१-२०

मती

येशू ख्रीष्टया पुर्खा
लूक ३:२३-३८

- 1 अब्राहाम व दाऊदया सन्तान येशू ख्रीष्टया पुर्खा थथे दु -
- 2 अब्राहामया काय् इसहाक,
इसहाकया काय् याकूब,
याकूबया काय् यहूदा व वया दाजुकिजापि।
- 3 यहूदाया काय्पि फारेस व जाहेर खः। थुमि मां तामार खः।
फारेसया काय् हेस्रोन,
हेस्रोनया काय् आराम,
- 4 आरामया काय् अम्मीनादाब,
अम्मीनादाबया काय् नहशोन,
नहशोनया काय् सलमोन,
- 5 सलमोनया काय् बोअज खः।
बोअजया मां राहाब खः।
बोअजया काय् ओबेद खः।
ओबेदया मां रूथ खः।
ओबेदया काय् यिशै,
- 6 यिशैया काय् जुजु दाऊद खः।
जुजु दाऊदया काय् सोलोमन खः।
सोलोमनया मां न्हापा उरियाहया कलाः खः।

7 सोलोमनया काय् रहबाम,
रहबामया काय् अबिया,
अबियाया काय् आसा,

8 आसाया काय् यहोशापात,
यहोशापातया काय् यहोराम,
यहोरामया काय् उज्जियाह,

9 उज्जियाहया काय् योताम,
योतामया काय् आहाज,
आहाजया काय् हिजकिया,

10 हिजकियाया काय् मनश्शे,
मनश्शेया काय् अमोन,
अमोनया काय् योशियाह,

11 योशियाहया काय् यकोनियास व वया किजापि खः। अबलय् हे इस्राएलीतयत्
ज्वनाः बेबिलोनय् यंकूगु खः। ✨

12 बेबिलोनय् इस्राएलीतयत् ज्वना यंके धुंकाः
यकोनियासया शालतिएल धयाम्ह काय् बुल।
शालतिएलया काय् यरूबाबेल,

13 यरूबाबेलया काय् अबिउद,
अबिउदया काय् एल्याकीम,
एल्याकीमया काय् आजोर,

14 आजोरया काय् सादोक,
सादोकया काय् आखिम,
आखिमया काय् एलिउद,

15 एलिउदया काय् एलाजार,
एलाजारया काय् मन्तान,
मन्तानया काय् याकूब,

16 याकूबया काय् योसेफ खः।

थ्व योसेफ ख्रीष्ट येशूयात बुइकूम्ह मरियमया भाःत खः।

17 थुकथं ल्याःखाय् बलय् अब्राहामनिसें दाऊद तक झिंप्यंगू पुस्ता, दाऊदनिसें बेबिलोनय् इस्त्राएलीतयत् ज्वनायंकूबलय् तक झिंप्यंगू पुस्ता, अले बेबिलोनय् इमित ज्वनायंके धुंकाःनिसें मुक्ति बीम्ह ख्रीष्ट तक झिंप्यंगू पुस्ता जुल।

ख्रीष्ट येशू बूगू

लूक २:१-७

18 येशू ख्रीष्ट थुकथं बूगू खः। वय्कःया मां मरियमयात योसेफं ब्याहा याना यंके न्ह्यः क्वःछिना जक तःबलय् हे पवित्र आत्मापाखें प्वाथय् दत।☆

19 मरियमया भाःत जुइम्ह तसकं धर्मीम्ह मनू जूगुलि मरियमयात बेइज्जत मयासें दुनें दुनें त्वःताछवयेगु बिचाः यात।

20 योसेफं थथे बिचाः यानाच्चंबलय् वयात म्हगसय् प्रभुया छम्ह स्वर्गदूतं वयाः थथे धाल – “दाऊदया सन्तान योसेफ, मरियमयात ब्याहा यायेत ग्याये मते। पवित्र आत्मापाखें वया प्वाथय् दुगु खः।

21 मरियमं काय् छम्ह बुइकी, अले छं व मचायागु नां येशू ति, छायाधाःसा वय्कलं थः मनूतयत् इमिगु पापं छुतय् यानादी।”☆

22 परमप्रभुं अगमवक्तापाखें धयादीगु खँ पूवनेत हे थथे जूवःगु खः –

23 “ब्याहा मयानिम्ह छम्ह मिसां

काय् बुइकी,

वय्कःया नां इम्मामानुएल तइ।”

इम्मामानुएल धाःगु

“परमेश्वर झीनाप दु” धइगु खः।☆

24 न्ह्यालं चाये धुंकाः योसेफं स्वर्गदूतं धाःथें यात। वं थः कलाः जुइम्ह मरियमयात थःगु छँय् हल।

25 अयनं मचा मबुतले मरियम नाप मघं। अले मचा बुइधुंकाः योसेफं वयागु नां येशू तल।☆

2

पुर्बनिसें दर्शन याःवःपिं ज्योतिषीत

☆ 1:18 १:१८ लूक १:२७

☆ 1:21 १:२१ लूक १:३१

☆ 1:23 १:२३ यशै ७:१४

☆ 1:25

१:२५ लूक २:२१

1 हेरोद जुजुया इलय यह्दियाया बेथलेहेम धाःगु गामय् येशू ब्रूग खः। येशू बुइधुंकाः पुर्बपाखें ज्योतिषीत वय्कःयात यरूशलेमय् स्वः वल।

2 अले इमिसं मनूतयके थथे धकाः न्यन – “यह्दीतय् जुजु जुयाः बूम्ह गन दु? वय्कः ब्रूग खँ सीकेगु छगः नगु पुर्बय् खनागुलि वय्कःयात दर्शन यायेत जिपिं थन वयागु खः।”

3 थ्व खँ न्यनाः हेरोद जुजुया तसकं नुगः भाराभारा मिन। यरूशलेमय् च्वंपिं फुक्क मनूत नं ग्यात।

4 उकिं हेरोद जुजुं फुक्क तःधंपिं पुजाहारीतयत् व शास्त्रीतयत् सःताः थथे न्यन – “मुक्ति बीम्ह ख्रीष्ट गन बुइगु?”

5 अले इमिसं थथे धकाः लिसः बिल – “यह्दियायागु बेथलेहेमय् दु, छायाःसा थ्व खँ छम्ह अगमवक्तां नं थथे च्वया थकूगु दु –

6 “ हे यह्दियाया बेथलेहेम,
छ यह्दियाया जुजुपिनिगु न्ह्यःने
छुं कथं नं चिधं मजु,
छायाःसा छंगुपाखें
छम्ह तःधंम्ह जुजु पिहां वइतिनि।
व जिमि मनु इस्त्राएलीतय् जवाः जुइतिनि। ” *☆

7 अले हेरोदं पुर्ब वःपिं ज्योतिषीतयत् सुनानं मसीक सःताः न्यनेकने यानाः नगु खनेदुगु ई सीकाकाल।

8 अले इमित थथे धकाः बेथलेहेमय् छवल – “छिकपि वनाः मचायागु खँ बांलाक सीकाः जितः कं झासँ, अले जि नं वनाः दर्शनया वने।”

9 जुजुयागु खँ न्यनाः इपिं अनं वन। इमिसं पुर्बय् खंगु नगु हानं खनेदय्कः वल। व नगु न्ह्यज्यां ज्यां वनाः मचा दुगु थासय् थ्यंकाः दित।

10 व नगु खनाः इपिं तसकं लयताल।

11 अन थ्यंकाः इपिं छँय् दुहां वनाः मचायात वया मां मरियमनापं खन। अले इमिसं क्वछुनाः वय्कःयात भागि यात। अले थथःगु कन्तुर चाय्काः लुँ, नस्वाःगु गुँगू व मूर् लिकयाः छाल।

12 म्हगसय् इमित हेरोदयाथाय् वने मते धकाः परमेश्वरं उजं बियादिल। अयजूगुलि इपिं मेगु हे लँपु जुयाः थथःगु देशय् लिहां वन।

मिश्र देशय् बिसिके यंकूगु

13 ज्योतिषीत वने धुंकाः योसेफयात म्हगसय् प्रभुया छम्ह स्वर्गदूतं थथे धाल — “दँ, मचा व वया मांयात ब्वनाः याकनं हे मिश्र देशय् बिस्युं हूँ। लिहां वयेत मधातले छिपिं अन हे च्वँ, छायाधाःसा हेरोदं मचायात स्यायेत स्वयाच्चंगु दु।”

14 अले योसेफ मचा व मांम्हयसित ब्वनाः चां चां हे मिश्र देशय् बिस्युं वन।

15 हेरोद जुजु मसीतले इपिं अन हे च्वनाच्चन। “जिं थःकाय्यात मिश्र देशं सःता” धकाः परमप्रभुं अगमवक्तायात धाय्कादीगु खँ थुकथं पूवन। ✧

हेरोद जुजुं मस्तयूत स्याकूगु

16 ज्योतिषीतयसं थथे झंगःलाःगु सीकाः हेरोद तमं मि जुल। अले ज्योतिषीतयपाखें नगु खनेदुगु ई सीकातःगु दुगुलि व हे स्वयाः हेरोदं बेथलेहेमय् व वया जःखः च्वंगु थासय् च्वंपिं निदँ व निदं क्वय्यापि मिजंमस्तयूत स्याकेबिल।

17 थुकथं यर्मिया अगमवक्तां धयाथकूगु खँ पूवन —

18 “रामाय् नुगः हे तज्याइ थें च्वंक

ख्वःसः ताये दत।

राहेल थः मस्तयूत लुमंकाः ख्वयाच्चन।

वयात सुनानं दिके मफुत,

छायधाःसा वया मस्त स्याये धुंकल।” ✧

मिश्र देशं लिहां वःगु

19 हेरोद जुजु सीधुंकाः मिश्र देशय् च्वनाच्चंम्ह योसेफयात म्हगसय् प्रभुयाम्ह छम्ह स्वर्गदूतं

20 थथे धाल — “दँ, मचा व मांम्हयसित ब्वनाः इस्राएल देशय् लिहां हूँ। मचायात स्यायेत स्वःपिं मनूत सी धुंकल।”

21 अले योसेफ मचा व मांम्हयसित ब्वनाः इस्राएल देशय् तुं लिहां वन।

22 हेरोद सिनाः वया काय् अखिलाउसं यह्दियाय् राज्य यानाच्चंगु दु धकाः न्यनाः योसेफ अन वने ग्यात। अय्जूगुलि परमेश्वरं हानं म्हगसय् वयात अन वने मते धकाः धयादीगुलि योसेफ गालील प्रदेशय् वन।

23 अगमवत्तातयसं वय्कःयात “नासरी” धाइ धाःगु खँ पूवकेत योसेफ नासरत धाःगु शहरय् वनाः च्वंवन। ☆

3

बप्तिस्मा बीम्ह यूहन्नां भिंगु खँ न्यंकाजूगु

मर्क १:२-८; लूक ३:१-१८; यूह १:१९-२८

1 उगु हे इलय् बप्तिस्मा बीम्ह यूहन्नां यह्दियाया मरुभूमिइ वनाः

2 थथे धकाः भिंगु खँ न्यंकाजुल –

“पश्चाताप या,
छाय्धाःसा स्वर्गयागु राज्य न्ह्यःने
थयंकः वःगु दु।” ☆

3 थ्व हे यूहन्नायागु खँ यशैया अगमवत्तां थथे च्वया थकूगु दु –

“मरुभूमिइ छम्ह मनू थथे धकाः
हालाः वइ –

‘प्रभुयात लँ ब्यु,
वय्कःयागु लँ छिंकाब्यु।’ ☆

4 थ्व यूहन्नां उँटयागु सं थानातःगु वसः पुनातःगु दु। अले जँय् छेंगूयागु जनी चिनातःगु दु। वयागु नसा क्वःबुइँचा व गुँ कस्ति खः। ☆

5 यरूशलेमं, यह्दियाया फुक्क गामं व यर्दन खुसिया जःखः च्वंपिं मनूत वयाथाय् वल।

6 अले थथःगु पाप स्वीकार यानाः यर्दन खुसिइ यूहन्नापाखें बप्तिस्मा काल।

☆ 2:23 २:२३ मर्क १:२४; लूक २:३९; यूह १:४५ ☆ 3:2 ३:२ मती ४:१७; मर्क १:१५ ☆ 3:3 ३:३ यशैया ४०:३ ☆ 3:4 ३:४ २ राज १:८

7 यक्व हे फरिसीत व सदुकीत नं बप्तिस्मा कायेत वयाच्चंगुलि वं इमित थथे धाल – “हे सर्पया सन्तान, परमेश्वरयागु तंपाखें बिस्सुं वनेत छिमित सुनां ख्याच्चः बिल?✧

8 पश्चाताप याःथें छिमिसं थःगु चालचलन नं अथे हे या।

9 ‘अब्राहाम हे जिमि बाः खः, उकिं जिमित छुं नं जुइ मखु’ धकाः धयाजुइ मते, छायाधाःसा जिं छिमित धाये – परमेश्वरं अब्राहामया निरिति थुपिं ल्वहँतं नं मस्त दयकादी फु।✧

10 सिमायागु हाप्वल्य पा लाये हे त्यंगु दु। उकिं भिंगु फल मसःगु सिमा पालाः छवयकाछवइ।✧

11 “जिं ला छिमित पश्चातापया निरितिं लखं बप्तिस्मा बियाच्चना। जिगु लिपा जि सिबय् तसकं तःधंमह झायाच्चंगु दु। जि ला वयकःयागु लाकां ज्वनाजुइत तक नं मल्वः। वयकलं हे छिमित पवित्र आत्मां व मिं बप्तिस्मा बियादी।

12 वयकलं ल्हातिइ हासा ज्वना तयादीगु दु। वयकलं फुक्क छव हायाः थःगु धुकुतिइ स्वथनादी। अले छवस जुक्व गुबलें मसीगु मिइ छवयकादी।”

येशुं बप्तिस्मा कयादीगु

मर्क १:१-११; लूक ३:२१-२२; यूह १:३२-३४

13 येशू नं बप्तिस्मा कायेत गालीलनिसें यर्दन खुसिइ यूहन्ना दुथाय् थयंकः झाल।

14 यूहन्नां वयकःयात थथे धकाः पनेत स्वल – “छिं जक जितः बप्तिस्मा बियादीमाः। छि जिथाय् झायादीयागु ला?”

15 वयकलं लिसः बियादिल – “आःयात थथे हे थजु। थुकथं झीसं फुक्क धार्मिकता पूर्वके माःगु दु।” अले वं “ज्यू” धाल।

16 वयकः बप्तिस्मा कयाः उघ्रिमय् लखं थाहां झाल। उबलय् हे स्वर्ग चाल, अले वयकलं परमेश्वरयागु आत्मा सुकुभतु थें जुयाः थःगु म्हय् जूवयाच्चंगु खन।

17 अले स्वर्ग थथे धयाहल – “थ्व जि यःमह काय् खः, थ्व खनाः जि तसकं लयताः।”✧

4

मरुभूमिइ येशूयात जाँचय् याःगु

मर्क १:१२-१३; लूक ४:१-१३

✧ 3:7 ३:७ मती १२:३४; २३:३३ ✧ 3:9 ३:९ यूह ८:३३ ✧ 3:10 ३:१० मती ७:१९ ✧ 3:17 ३:१७ उत २२:२; भज २:७; यशै ४२:१; मती १२:१४; १७:५

1 पवित्र आत्मां येशूयात शैतानपाखें जाँचय् याकेत मरूभूमिइ ब्वनायंकल।☆
 2 पिइन्हु पिइचा तक अपसं च्वनादीगुलि वय्कःयात तसकं हे नयेपित्यात।
 3 अबलय् हे शैतानं वयाः वय्कःयात थथे धाल – “छि परमेश्वरया काय् खःसा
 थ्व ल्वहंयात मरि जुइमा धकाः धयादिसँ।”

4 येशू लिसः बियादिल – “थथे च्वयातःगु दु –
 “ ‘मनूत मरि जक मखु,
 परमेश्वरयागु म्हुतुं पिहां वःगु
 छगू छगू वचनं म्वाइ।’ ”☆

5 शैतानं हानं वय्कःयात पवित्रगु शहरय् यंकल, अले देगः च्वकाय् यंकाः थथे
 धाल –

6 “छि परमेश्वरया काय् खःसा थनं तिन्हयादिसँ। छायाधाःसा थथे च्वयातःगु दु
 –
 “ ‘छ न्ह्याथाय् वंसां रक्षा यायेत
 परमेश्वरं थः दूततय्त आज्ञा बियादी
 ल्वहँतं छंगु तुतियात घाःपाः मजुइमा धकाः
 इमिसं थःगु ल्हातं छन्त ल्हना तइ।’ ”☆

7 येशू वयात धयादिल – “थथे च्वयातःगु दु – ‘छं परमप्रभु परमेश्वरयागु मन
 स्वये मते।’ ”☆

8 अनलि शैतानं वय्कःयात तःजाःगु पहाडय् यंकाः संसारयागु बाबांलाःगु फुक्क
 राज्य व उमिगु वैभव क्यन।

9 “छिं जितः भागि यानादीसा जिं छितः थ्व फुक्कं बी” धकाः शैतानं धाल।

10 अले वय्कलं धयादिल – “अय् शैतान, जिगु न्ह्याःने च्वने मते, हँ। थथे नं
 च्वयातःगु दु –

“ ‘छं छिम्ह परमप्रभु परमेश्वरयागु जक
 सेवा यायेमाः।
 वय्कःयात जक मानय् यायेमाः।’ ”☆

11 अले तिनि शैतानं वय्कःयात त्वःतावन। अले स्वर्गदूतत वयाः वय्कःयागु सेवा यात।

येशू गालील्य् भिंगु खँ न्यंकेगु ज्या शुरु यानादीगु

मर्क १:१४-१५; लूक ४:१४-१५

12 बप्तिस्मा बीम्ह यूहन्नायात झ्यालखानाय् कुनातल धकाः न्यनादीगुलि येशू गालील्य् झायादिल।☆

13 वय्कः नासरतय् च्वना मदिसे जबूलून व नप्तालीया दथुइ लाःगु गालील समुद्र लिक्क च्वंगु कफर्नहम झायाः च्वनादिल।☆

14 थुकथं यशैया अगमवक्तां धयाथकूगु थ्व खँ पूवन –

15 “यर्दन खुसि व समुद्र दथुइ

लाःगु जबूलून व नप्ताली,

अले यह्दीमखुपि च्वनाच्वंगु गालील,

16 थ्व खिउँथाय् च्वनाच्वंपि मनूतय्सं

छग् तःधंगु जः खनीतिनि।

कालया किचलय् लाःगु देशय्

च्वनाच्वंपिन्सं नं थ्व तःधंगु जः

स्वइतिनि।”☆

17 उबलय् निसैं वय्कलं थथे धकाः न्यंकादिल –

“पश्चाताप या,

छाय्धाःसा स्वर्गियागु राज्य न्ह्यःने

थयंकः वये धुंकल।”☆

येशूया दकलय् न्हापांयापि चेलात

मर्क १:१६-२०; लूक ५:१-११

18 छन्हु येशू गालील समुद्र सिथय् झाया च्वंबलय् जाः हानाः न्या लानाच्वंपि निम्ह दाजुकिजापि सिमोन व वया किजा अन्द्रियासयात खन। इपि न्या लाइपि खः।

19 वय्कलं इमित धयादिल – “जि नाप वा, अले जिं छिमित मनूत लाइपि यानाबी।”

☆ 4:12 ४:१२ मती १४:३; मर्क ६:१७; लूक ३:१९-२० ☆ 4:13 ४:१३ यूह २:१२ ☆ 4:16 ४:१५-१६ यशै ९:१-२ ☆ 4:17 ४:१७ मती ३:२

20 थ्व खँ न्यनेवं इपि थःगु जाःजी हे त्वःताः वय्कः नाप वन।

21 अनं झाःबलय् वय्कलं जब्दिया निम्ह काय् याकूब व वया किजा यूहन्नायात खन। इपि थः अबु जब्दि नाप नांचाय् च्वनाः पुलांगु जाः ल्हनाच्चंगु खः। वय्कलं इमित नं सःतादिल।

22 धयाकथं इपि थः अबु व नांचा त्वःताः वय्कः नाप वन।

येशू तःता ज्या यानादीगु

लूक ६:१७-१९

23 येशू गालील फुक्कभनं चाःहिलादिल। धर्मशास्त्र स्यनीगु छैय् झायाः मनूतयत स्यनेकने यानाः परमेश्वरयागु राज्ययागु भिगु खँ न्यंकादिल। अले तःतामछि ल्वय् दुपि मनूतयत नं लाय्कादिल।*

24 वय्कलं थथे यानादीगु खँ सिरिया देशय् फुक्कभनं बय्बय् जुल। अले तःतामछि ल्वय् दुपि, तःतामछि दुःखकष्ट दुपि, भूत दुबिना च्वंपि, तिल्वय् वःपि व पक्षवातं कःपि मनूतयत वय्कःयाथाय् हल। वय्कलं इपि फुक्कसिगु ल्वय् लाय्कादिल।

25 गालील, डेकापोलिस, यरूशलेम, यहूदिया व यर्दन खुसिया पारिनिसें वःपि ग्वाः ग्वाः मनूत वय्कः नाप नाप जुल।

5

पहाडय् बियादीगु उपदेश

लूक ६:२०-२६

1 ग्वाः ग्वाः मनूतयत खनाः येशू पहाडय् थाहां झायाः फ्यतुनादिल। चेलात नं वय्कःयाथाय् वल।

2 अले वय्कलं इमित थथे धकाः स्यनादिल —

3 “थःत आत्माय् चीमि खंकीपि मनूत धन्यपि खः,
स्वर्गयागु राज्य इमिगु हे खः।

4 नुगः मछिंका जुइपि मनूत
धन्यपि खः,
परमेश्वरं हे इमित हाय्कादी।*

5 स्वजापि मनूत धन्यपि खः,
पृथ्वीइ इमिसं अधिकार यायेदइ।*

- 6 परमेश्वरया न्ह्यःने धर्मी ठहरय् जुइत पित्याकाः
प्याय्चाय्का जुइपि मनूत
धन्यपि खः,
परमेश्वरं इमित लुधंकादी।✧
- 7 कर्पिन्त दया यानाजुइपि मनूत
धन्यपि खः,
परमेश्वरं इमित दया यानादी।
- 8 नुगः यचुपि मनूत धन्यपि खः,
इमिसं परमेश्वरयात स्वये खनी।✧
- 9 मेपिन्त मिलय् यानाजुइपि मनूत
धन्यपि खः,
इमित परमेश्वरं थःकायपि यानादी।
- 10 परमेश्वरया न्ह्यःने धर्मी ठहरय् जुइत दुःखकष्ट
फयाच्चपि मनूत धन्यपि खः,
छाय्धाःसा स्वर्गयागु राज्य इमिगु हे खः।”✧
- 11 “जितः विश्वास याःगुलि छिमित मनूतयसं मथिका जुइ, हेस्याना जुइ,
दुःखकष्ट बियाजुइ। अयजूगुलि छिपि धन्यपि खः।✧
- 12 छिपि स्वयाः न्हापायापि अगमवक्तातयूत नं थथे हे दुःखकष्ट ब्यूगु खः।
उकिं लयताया जु, छाय्धाःसा स्वर्गय् छिमित बीत तःधंगु सिरपाः तयातःगु दु।✧

चि व जः

मर्क ९:५०; लूक ११:३३-३६; १४:३४-३५

- 13 “छिपि पृथ्वीया चि खः। चिया सवाः हे तन धाःसा थ्व चियात गथे यानाः
हानं चि सवाः वय्केगु? थथे सवाः तने धुंकूगु चि छुकियात नं ज्यालगय् मजू, उकिं
थज्याःगु चियात मनूतयसं वांछवइ, अले न्हया जुइ।✧
- 14 “छिपि संसारया जः खः। पहाडया च्चकाय् दय्कातःगु शहरयात सुनानं
मखंक सुचुकातये फइ मखु।✧
- 15 मत च्याकाः सुनानं त्वपुयातइ मखु, बरु क्वथा न्यंक जः खयेमा धकाः
त्वाःदेवाय् तयातइ।✧

✧ 5:6 ५:६ यशै ५५:१-२ ✧ 5:8 ५:८ भज २४:३-४ ✧ 5:10 ५:१० १ पत्र ३:१४ ✧ 5:11
५:११ १ पत्र ४:१४ ✧ 5:12 ५:१२ २ इति ३६:१६; प्रे ७:५२ ✧ 5:13 ५:१३ मर्क ९:५० ✧ 5:14
५:१४ यहू ८:१२; ९:५ ✧ 5:15 ५:१५ मर्क ४:२१; लूक ८:१६; ११:३३

16 छिपिं नं मनूतयगु न्ह्यःने थथे हे थिनाच्चने फयेमाः। अले जक छिमिसं याःगु बाबांलाःगु ज्याखँ मनूतयसं खनी, अले स्वर्गय् च्वनादीम्ह परमेश्वर बाःयात इमिसं तःधंकी।☆

व्यवस्थायागु खँ
लूक १६:१७

17 “जि व्यवस्था व अगमवत्तातयसं स्यना थकूगु खँ स्यंका छवयेत वःगु जुइ धकाः मतिइ तये मते। जि व्यवस्था व अगमवत्तातयसं स्यना थकूगु ज्याखँ स्यंका छवयेत वयागु मखु, बरु पूवकेत वयागु खः।

18 जिं छिमित धात्थे धाये — आकाश व पृथ्वी दतले व्यवस्थाय् च्वयातःगु चिकिचाधंगु छगू नं सिति वनी मखु, बरु अथे च्वयातःगु छकुचा दतले पूवनी।☆

19 थथे जूगुलि व्यवस्थायागु चिकिचाधंगु छगू जक आज्ञा मानय् मयाइपिं व मयाकेत स्यना जुइपिं मनूत स्वर्गयागु राज्यय् दकलय् चिधंपिं जुइ। सुनानं व्यवस्था फुक्कं मानय् याःसा, अले कर्पिन्त नं मानय् यायेमाः धकाः स्यना जूसं थज्याःपिं मनूत स्वर्गयागु राज्यय् तःधंपिं जुइ।

20 “जिं छिमित धाये — छिमिसं शास्त्रीत व फरिसीतयसं स्वयाः अप्वः परमेश्वरयात यःथे याःसा जक छिपिं स्वर्गयागु राज्यय् दुहां वने फइ।

तं चायेगु व मनू स्यायेगु ज्या

21 “न्हापायापिं मनूतयत् थथे धयातःगु छिमिसं न्यनातःगु हे दु — ‘मनू स्याये मते, सुनानं सुयातं स्यात धाःसा वयात सजॉय बी।’☆

22 तर जिं छिमित धाये — दाजुकिजापिलिसे तंम्बइम्ह मनूयात नं सजॉय बी। सुनानं थः दाजुकिजानापं छुं म्वाय्क ल्वापु थल धाःसा वं तःधंगु सजॉय फयेमाली। अथे हे सुनानं थः दाजुकिजायात ‘ध्वादः’ धाल धाःसा व नरकयागु मिइ लाइ।

23 “अयजूगुलिं छिमिसं परमेश्वरयात छुं छाये न्ह्यः छ खनाः छिमि किजा तंम्वया च्वंगु दु धकाः लुमन धाःसा

24 थःम्हं छायेत्यनागु वेदीया न्ह्यःने हे त्वःताः किजानापं निं मिलय् जू हँ, अले तिति छाः हँ।

25 “छन्त द्रुपं ब्यूम्ह मनू नाप लँय् हे मिलय् जु। मखुसा वं छन्त अदालतय् यंकाः न्यायाधीशया ल्हातिइ लःल्हानाबी। न्यायाधीशं सिपाइया ल्हातिइ लःल्हानाबी। अले छ इयालखानाय् लाइ।

26 जिं छिमित धात्थे धाये – पुले माक्व धिबा मपुतले छिमित इयालखानां त्वःता हइ मखु।

व्यभिचार याये मज्यू

27 “छिमिसं थथे धाःगु न्यनातःगु दु – ‘व्यभिचार याये मते।’☆

28 तर जिं छिमित धाये – सुनानं सुं मिसायात बांमलाःगु मिखां स्वल धाःसा वं मनं मनं व्यभिचार याये धुंकी।

29 छंगु जव मिखां छन्त पाप याकूसा उकियात लिकयाः वान्छवया ब्यु। म्ह छम्हं नरकय् लाकाः च्वनेगु स्वयाः ला म्हया छगू अंग मदय्का च्वनेगु आपालं भिं।☆

30 छंगु जव लहातं छन्त पाप याकूसा उकियात त्वाःल्हानाः वान्छवया ब्यु। म्ह छम्हं नरकय् लाका च्वनेगु स्वयाः ला म्हया छगू अंग मदय्का च्वनेगु तसकं भिं।☆

पारपाचुकेगु खँ

मती १९:१३; मर्क १०:११-१२; लूक १६:१८

31 “थथे नं धयातःगु दु – ‘सुनानं थः कलाःयात त्वःतूसा पारपाचुकागु भवं च्वयाः बीमाः।’☆

32 तर जिं छिमित धाये – कलाःम्हं व्यभिचार याःगु मदय्कं सुनानं थः कलाःयात त्वःता छवल धाःसा वं थः कलाःयात व्यभिचार याकूगु जुइ। अथे हे व मिसायात यंकूम्ह मिजंनं नं व्यभिचार याःगु जुइ।☆

पाफयेगु खँ

33 “न्हापा न्हापायापिं मनूतय्त थथे धयातःगु नं छिमिसं न्यनातःगु दु – ‘छिमिसं मखुगु भाकल याये मते, तर परमप्रभुया नितिं यानागु भाकल पूर्वकि। व भाकल त्वाःथले मते।’☆

34 तर जिं छिमित धाये – गुबलें छुं खँय हे पाफये मते। स्वर्गयागु नां कयाः नं पाफये मते, छायाःसा स्वर्ग परमेश्वरया सिंहासन खः।☆

35 पृथ्वीयागु नां कयाः नं पाफये मते, छायाःसा पृथ्वी परमेश्वरया तुति तइगु थाय् खः। यरूशलेमयागु नां कयाः नं पाफये मते, छायाःसा यरूशलेम तःधंम्ह जुजुयागु शहर खः।☆

☆ 5:27 ५:२७ प्रस २०:१४; व्य ५:१८ ☆ 5:29 ५:२९ मती १८:९; मर्क ९:४७ ☆ 5:30 ५:३० मती १८:८; मर्क ९:४३ ☆ 5:31 ५:३१ व्य २४:१-४; मती १९:७; मर्क १०:४ ☆ 5:32 ५:३२ मती १९:९; १ कोर ७:१०-११ ☆ 5:33 ५:३३ लेवी १९:१२; गन्ती ३०:२; व्य २३:२१ ☆ 5:34 ५:३४ याक ५:१२; यशै ६६:१; मती २३:२२ ☆ 5:35 ५:३५ यशै ६६:१; भज ४८:२

36 थःगु छ्यं थियाः तक नं पाफये मते, छायाधाःसा छैनय् च्वंगु सँ छपुयात नं छिमिसं तुइके व हाकुके फइ मखु।

37 छु धायेमाःगु खः - खःसा खः जक धा, मखुसा मखु जक धा। थुलि अप्वः खँ शैतानपाखेंयागु जक खः।

पलेसा कायेगु खँ
लूक ६:२९-३०

38 “थथे धयातःगु नं छिमिसं न्यनातःगु हे दु - ‘मिखायागु पलेसा मिखा, वायागु पलेसा वा।’☆

39 तर जिं छिमित धाये - थःत मभिकूपिन्त छिमिसं ब्वलासाये मते। सुनानं छिमित जव न्यतालय् दाल धाःसा खव न्यताः नं फया ब्यु।

40 सुनानं छन्त छंगु लं त्वकाः कायेत अदालतय् यंकल धाःसा वयात गानापं त्वया ब्यु।

41 सुनानं छन्त करं छगू किलोमिटर तक यकेत स्वल धाःसा व नाप निगू किलोमिटर हे वना ब्यु।

42 सुनानं छंके छुं फ्वन धाःसा वयात ब्यु। सुनानं छंके छुं त्याये का वल धाःसा वयात बिया छव।

शत्रुतय्त माया यायेगु
लूक ६:२७-३६

43 “थथे धयातःगु नं छिमिसं न्यनातःगु दु - ‘जःलाखःलायात माया या, शत्रुयात हेला या।’☆

44 तर जिं छिमित धाये - शत्रुयात माया या, थःत दुःख बीपिनिगु निरिति प्रार्थना या।

45 अले जक छिपिं स्वर्गय् दीम्ह बाःया मस्त जुइ फइ, छायाधाःसा वयकलं भिपिं व मभिपिं निम्हयूसितं निभाः त्वय्कादी। अले धर्मी व पापी निम्हयूसितं वा वय्कादी।

46 थःत माया याइपिन्त जक माया यानाः छु सिरपाः कायेखनी? थथे ला कर काइपिन्सं नं याः।

47 छिमिसं थः दाजुकिजापिन्त जक हनाबना तल धाःसा छु हे भिंगु ज्या यात? छु परमेश्वरयात म्हमस्यूपिन्सं जक अथे मयाः ला?

48 अयजूगुलि स्वर्गय् दीम्ह छिमि बा: सिद्धम्ह खः, उकिं छिपिं नं अथे हे सिद्ध जु।☆

6

मसीक दान बीगु खँ

1 “होश या, मनूतयूत क्यने थें याना: जक छिमिसं भिंगु ज्या याये मते। मनूतयूत क्यने थें जक भिंगु ज्या यात धा:सा स्वर्गय् च्वनादीम्ह परमेश्वर बा:नं छिमित छुं हे सिरपा: बियादी मखु।☆

2 सुयातं छुं बीबलय् जिं थथे बिया धका: नाय्खिं च्वयूका जुइ मते। थथे ला निपा: ख्वा:पा: दुपिन्सं जक धर्मशास्त्र स्यनीगु छँय् व लँय् लँय् वना: मनूतयूसं त:धं धायकेत धयाजुइ। जिं छिमित ख:गु खँ धाये – इमिसं काये मा:गु सिरपा: काये धुंकूगु दु।

3 सुयातं छुं बीबलय् जव ल्हातं या:गु खव ल्हातं मसीमा।

4 बीबलय् सुनानं मसीक बीगु या, अले थथे मसीक ब्यूगु खंकादीम्ह परमेश्वर बा:नं छिमित सिरपा: बियादी।

प्रार्थना यायेगु खँ

लूक ११:१-४

5 “प्रार्थना यायेबलय् छिमिसं क्यने थें जक याये मते। निपा: ख्वा:पा: दुपिन्सं जक मेपिन्सं खनेमा धका: धर्मशास्त्र स्यनीगु छँय् व लँय् हे दना: प्रार्थना याना जुइ। जिं छिमित ख:गु खँ धाये – इमिसं काये मा:गु सिरपा: काये धुंकूगु दु।☆

6 प्रार्थना यायेबलय् छिमिसं क्वथाय् च्वना: खापा तिना: खने मद्दुम्ह परमेश्वर बा:यात प्रार्थना या। थथे सुं मद्दुथाय् वना: या:गु प्रार्थना खंकादीम्ह परमेश्वर बा:नं छिमित सिरपा: बियादी।

7 “प्रार्थना यायेबलय् छिमिसं परमेश्वरयात म्हमस्यूपिन्सं थें म्वा:मद्दुगु हाला: ता:हाकय्क याये मते। थुकथं या:गु प्रार्थना जक परमेश्वरं न्यनादी धयागु इमिगु धापू खः।

8 इमिसं थें छिमिसं याना जुइ मते। वय्क:याके फवने न्ह्य: हे छिमित मा:गु खँ परमेश्वर बा:नं स्यु।

9 छिमिसं थथे प्रार्थना या –

☆ 5:48 ५:४८ लेवी १९:२; व्य १८:१३

☆ 6:1 ६:१ मती २३:५

☆ 6:5 ६:५ लूक १८:१०-१४

“ हे झीम्ह स्वर्गय् च्वनादीम्ह परमेश्वर बाः,
छिगु नां पवित्र जुइमा।

10 छिगु राज्य वयेमा,
छिगु इच्छा स्वर्गय् थें हे,
थ्व पृथ्वीइ नं पूवनेमा।

11 जिमित न्हिच्छिया मरि,
थौं जिमित बियादिसँ,

12 अले जिमिगु अपराध क्षमा यानादिसँ,
गथे जिमिसं नं जिमि अपराधीतय्त
क्षमा यानाबियागु दु।

13 जिमित परिक्षाय् लाकादी मते,
बरु दुष्टपाखें बचय् यानादिसँ
छाय्धाःसा राज्य व पराक्रम व महिमा
सदां सर्वदां छिगु हे खः, आमेन।’

14 “थःत मभिं याःपिन्त छिमिसं क्षमा याःसा छिमित नं स्वर्गय् च्वनादीम्ह
परमेश्वर बाःनं क्षमा यानादी।☆

15 मखु, छिमित मभिं याःपिन्त छिमिसं क्षमा मब्यू धयागु जूसा छिमिगु पाप नं
परमेश्वर बाःनं क्षमा यानादी मखु।

अपसं च्वनेगु खँ

16 “अपसं च्वनेबलय् छिमिसं निपाः ख्वाःपाः दुपिन्सं थें ख्वाः खिउँका च्वनेगु
याये मते। अपसं च्वनागु धकाः क्यनेत इमिसं थःगु ख्वाः खिउँका जुइ। जिं धात्थें
धयाच्वना – इमिसं काये माःगु सिरपाः काये धुंकूगु दु।

17 बरु छं अपसं च्वनेबलय् ख्वाः सिलाः छेनय् चिकं तया च्वाँ।

18 अले छ अपसं च्वनाच्वंगु मनूतय्सं मखु, बरु खने मदुम्ह परमेश्वर बाःनं
खंकादी। अले वय्कलं छन्त सिरपाः बियादी।

स्वर्गय् धन मुंकि
लूक् १२:३३-३४

19 “थःगु नितिं छिमिसं थ्व संसारय् धन-सम्पत्ति मुंके मते। थन मुंकूगु धन-सम्पत्ति खतं नइ, किलं नइ, अले खुं खुइ।☆

20 बरु छिमिसं खतं मनइथाय्, किलं मनइथाय्, अले खुं मखुइथाय् स्वर्गय् धन-सम्पत्ति मुंकि।

21 छिमिगु सम्पत्ति गन दु छिमिगु मन नं अन हे दइ।

मिखा म्हयागु जः

लूक ११:३४-३६

22 “मिखा हे म्हयागु जः खः। मिखा थीसा जक छिमिगु म्ह छम्हं थी।

23 छिमिगु मिखा स्यंसा छिमिगु म्ह छम्हं हे खिउँसे च्वनी। उकिं छिमिके दुगु जः हे खिउँसे च्वंसा खिउँगु झन गुलि खिउँसे च्वनीगु जुइ।

24 “सुनानं निम्ह मालिकयागु सेवा याये फइ मखु, छायाधाःसा वं छम्ह मालिकयात अप्वः ययकूसा, मेम्ह मालिकयात ययकी मखु। वं छम्हयसिनं धाःथें याःसा मेम्हयसिनं धाःगु खँ न्यनी मखु। अथे हे छिमिसं परमेश्वर व धन निगूयां सेवा याये फइ मखु।

नयेत्वनेगुलिइ च्यूताः तये मते

लूक १२:२२-३१

25 “अयजूगुलि जिं धयाच्वना – नयेत्वनेगु व पुनेगुलिइ छिमिसं च्यूताः तये मते। छु, नयेगु स्वयाः प्राण तःधं मजू ला? पुनेगु स्वयाः शरीर तःधं मजू ला?

26 झंगःपंक्षीतयत स्व, इमिसं पुसा हलाः सयकेगु ज्या नं मयाः, नसा मुंकेगु ज्या नं मयाः। अथेसां स्वर्गय् च्वनादीम्ह परमेश्वर बाःनं इमित नका तयादीगु दु। इपिं स्वयाः छिपिं तःधं मजू ला?

27 छिपिं मध्ये धन्धा कयाः थःगु आयुलय् मेगु पलख जक नं तने फुम्ह सु दु?

28 “छु फी, छु पुने धकाः छिमिसं छाया च्यूताः कयाः जुया? ह्यायच्वंगु स्वांयात छकः स्व, इपिं गुकथं तःमा जुल? इमिसं ज्या नं याःगु मदु, कापः नं थाःगु मदु।

29 अथेसां जिं धाये – उलिमछि धन-सम्पत्ति दुम्ह सोलोमन जुजु छप्वः स्वां ति हे झःझः मधाः।☆

30 थौं ब्रुयाः कन्हय् हे इवाः जुयावनीगु घाँययात ला परमेश्वरं थुलि समाः यानातयादी धाःसा वयकलं छिमित पुनेत वसः बियामदी ला? विश्वास मगाःपिं, छिमिसं गथे क्वातुक विश्वास याये मफुगु?

- 31 “अयजूगुलि छिमिसं ‘छु नये, छु त्वने, अले छु पुने’ धका: पीर काये मते।
 32 परमेश्वरयात म्हमस्यूपि मनूतयसं जक थथे पीर कयाचवनी। छिमित छु छु
 मा: धका: स्वर्गय् चवनादीम्ह छिमि परमेश्वर बा:नं फुक्क स्यू।
 33 न्हापां परमेश्वरयागु राज्य मा, वय्कलं धयादी थें च्वँ। अले वय्कलं छिमित
 मा:गु फुक्क बियादी।
 34 “कन्हय् जुइगु खँय् च्यूता: काये मते। कन्हय्यागु च्यूता: कन्हय् हे वइ।
 थौयात थौयागु हे कष्ट अप्प:।

7

कर्पिन्त दोष बीगु

लूक ६:३७-३८, ४१, ४२

- 1 “मेपिन्त दोष बी मते, अले छिमित नं दोष बी मखु।
 2 छायाधा:सा गथे छिमिसं मेपिन्त दोष बिल, अथे हे छिमित नं दोष बी। गुलि
 छिमिसं कर्पिन्त बिल, उलि हे छिमित नं बी।[☆]
 3 “छिमि किजाया मिखाय् च्वंगु धू खंम्हय्सिनं थ:गु मिखाय् च्वंगु सुप: छाया
 मखन?
 4 थ:गु मिखाय् सुप: दुहां वनाच्वंगु मखंम्हय्सिनं छिमि किजाया मिखाय् धू दुहां
 वनाच्वंगु खँय् छाया वास्ता या: जुइ माल?
 5 थ:गु हे मिखाय् च्वंगु सुप: मखंम्हय्सिनं छिमि किजाया मिखाय् च्वंगु धू
 लिकयाबी धका: गथे धाये फइ? हे निपा: ख्वा:पा: दुपि, न्हापां थ:गु मिखाय् च्वंगु
 सुप: नि लिका। अले तिनि कर्पिनिगु मिखाय् च्वंगु धू खंका: लिकाये फइ।
 6 “चवखगु चिज खिचायात बी मते, अथे या:सा वं छिमित हे न्या: वइ। फाया
 न्ह्य:ने मोती वान्छवया बी मते, अथे या:सा वं थुकियात न्हुतु न्हयाबी।

फवँ, मा अले स:ती

लूक ११:१-१३

- 7 “फवँ, अले छिमित बी, माला स्व, अले छिमिसं लुइके फइ, स: ब्यु, अले
 लुखा चाय्काबी।
 8 छायाधा:सा फवंपिन्त बी, माला स्व:पिन्सं लुइकी, अले स: ब्युम्हय्सित
 चाय्काबी।
 9 “अज्या:म्ह सु बौ दइ? सुनां कायनं मरि फवनीबलय् त्वहं बी?

☆ 7:2 ७:२ मर्क ४:२४

10 अथे हे न्या फ्वनीबलय् सर्प बी?

11 मभिंपि जुयाः नं छिमिसं थः मस्तयत् भिंगु भिंगु बी सः धाःसा स्वर्ग्य् च्वनादीम्ह बाःनं जक थःके पवंम्हय्सित झन भिंगु बियामदी ला?

12 “छिमित मेपिन्सं छु याःसा यः छिमिसं नं इमित अथे हे या। थ्व हे खँ व्यवस्था व अगमवक्तातय्सं स्यना थकूगु खः।☆

निपु लँ

लूक १३:२४

13 “चिब्यागु ध्वाखां दुहां हँ, छायाधाःसा नरकय् वनीगु ध्वाखा तब्या, अले लँ तब्या जुइ। वने अःपुगुलि थ्व ध्वाखां दुहां वनीपि यक्व दइ।

14 जीवनयागु ध्वाखा धाःसा चिब्या, अले लँ चिब्या। उकिं थनं जुइपि मनूत यक्व दइ मखु।

सिमा व फल

लूक ६:४३-४४

15 “फताहा अगमवक्तात खनाः होश या, छायाधाःसा थुपि फैचायागु ख्वाःपालं पुया वइ। दुनें धाःसा थुपि ग्यानापुपि गुँखिचा थें जुइ।

16 थुमिगु ज्या स्वयाः छिमिसं थुमित म्हसीके फइ। कंझालय् दाख सइ मखु। अथे हे कंमाय् यःमरि सइ मखु।

17 भिंगु सिमाय् भिंगु हे फल सइ। अथे हे मभिंगु सिमाय् मभिंगु हे फल सइ।

18 भिंगु सिमाय् मभिंगु फल गुबलें सइ मखु। अथे हे मभिंगु सिमाय् भिंगु फल गुबलें सइ मखु।

19 अय्जुगुलि भिंगु फल मसःगु सिमायात पालाः छ्वयकाछ्वइ।☆

20 थुकथं इमिगु ज्यां हे इपि भिं ला कि मभिं धकाः सीके फइ।☆

जिं छिमित गुबलें हे म्हमस्यू

लूक १३:२५-२७

21 “जितः ‘प्रभु, प्रभु’ जक धयाजुइपि मनूत परमेश्वरयागु राज्यय् दुहां वने फइ मखु। स्वर्ग्य् च्वनादीम्ह जिमि बाःयात लय्तायेक ज्या याना जूपिं जक वय्कःयागु राज्यय् दुहां वने फइ।

22 न्याय याइखुन्हु यक्वसिनं जितः थथे धाइ – ‘प्रभु, प्रभु, छिगु नामं जिमिसं अगमवाणी कना मवया ला? छिगु हे नामं भूत दुबिना च्वंपिं मनूतयत् लाय्का मवया ला? अले छिगु हे नामं यक्व हे अजू चायापुगु ज्या मयाना ला?’

23 जिं इमित थथे लिसः बी – जिं छिमित म्ह हे मस्यू। मभिंंगु ज्याखँ यानाजुइपिं, छिपिं फुक्कं जिथासं तापाक्क हँ।*

छँ दय्कीपिं निम्ह मनू
लूक ६:४७-४९

24 “अयजूगुलि जिगु वचन न्यनाः उकथं हे याइम्ह मनू ल्वहं दुथाय् छँ दनीम्ह बुद्धि दुम्ह मनू थें खः।

25 वं छँ दय्के धुंकाः तसकं वा वयाः बाः वल। हानं तसकं फय् वयाः वयागु छँय् कल। अयनं ल्वहंयागु बल्लाःगु जगय् दनातःगुलि वयागु छँ मदुन।

26 अथे हे जिगु वचन न्यनाः नं उकथं मयाइम्ह मनू फि दुथाय् छँ दय्कीम्ह मूर्ख मनू थें खः।

27 वं छँ दय्के धुंकाः तसकं वा वयाः बाः वल। हानं तसकं फय् वयाः वयागु छँय् कल। अले वयागु छँ दुनावन।”

28 अन च्वंपिं मनूत फुक्कं येशू धयादीगु थ्व खँ न्यनाः छक्क जुल।

29 छायाधाःसा वय्कलं इमि शास्त्रीतय्सं थें मखु, बरु अधिकार दुम्ह मनुखं थें स्यनादिल।*

8

कोहियात लाय्कादीगु

मर्क १:४०-४५; लूक ५:१२-१६

1 येशू पहाडं क्वहां झाय्वं ग्वाः ग्वाः मनूत वय्कः नाप वन।

2 अबलय् हे छम्ह कोहिम्ह मनुखं वयाः वय्कःयात भागियानाः थथे धाल – “प्रभु, छिं यय्कादीसा जितः शुद्ध यानादी फु।”

3 अले वय्कलं वयात थियाः धयादिल – “छ शुद्ध जुइमा।” थुलि धाय्वं हे व कोहि ल्वचं शुद्ध जुल।

* 7:23 ७:२३ भज ६:८ * 7:29 ७:२९ मर्क १:२२; लूक ४:३२

4 अले वय्कलं वयात धयादिल – “न्यँ, थ्व खँ सुयातं कने मते। पुजाहारीतय्थाय् वनाः छं थःगु ल्वय् लाःगु क्यँ। अले फुक्कसितं सीकेत व्यवस्थाय् च्वया तः थें माःकथं छायेछी या।”☆

रोमी कप्तानया च्यःयात लाय्कादीगु
लूक ७:१-१०

5 येशू कफर्नहुमय् झाःबलय् छम्ह रोमी कप्तानं वयाः वय्कःयात थथे बिन्ति यात –

6 “प्रभु, जिम्ह छम्ह च्यःयात पक्षवातं कयाः तसकं हे सास्ती जुयाच्वन।”

7 वय्कलं धयादिल – “जि वयाः वयात लाय्काबी।”

8 अले वं धाल – “प्रभु, जिगु छँय् दुहां झायेत छितः मल्वः। छिं धया जक दीसां जिम्ह च्यः लायावनी।

9 जिगु क्वय् सिपाइँत दुसां जिगु च्वय् तःधंपिं मनूत दु। जिं सिपाइँतय्त् ‘वा’ धाःसा इपिं वइ। अले ‘हँ’ धाःसा वनी। अथे हे दासयात ‘थथे या’ धाःसा वं अथे हे याइ।”

10 वय्कलं थ्व खँ न्यनाः अजू चायाः वय्कः नाप वःपिं मनूतय्त् थथे धयादिल – “जिं छिमित धाथें धाये – जिं थपाय्सकं विश्वास याइम्ह मनु ला इस्राएलय् हे नं मखना।

11 जिं छिमित धाये – पुर्ब व पच्छिमं यक्व हे मनूत वयाः अब्राहाम, इसहाक व याकूबपिं नाप स्वर्गयागु राज्यय् च्वनी।”☆

12 राज्यय् थ्याःपिं मनूतय्त् धाःसा पिने तसकं खिउँसे च्वंथाय् वान्छवया हइ। अले इपिं अन ख्व जक ख्वयाः वा न्ह्याच्वनी।”☆

13 अले वय्कलं व कप्तानयात धयादिल – “छँय् हँ छ, छं विश्वास याःथें हे जुइमा।” अबलय् हे वया च्यः लन।

उसाँय् मदुपिन्त लाय्कादीगु

मर्क १:२९-३४; लूक ४:३८-४१

14 छन्हु येशू पत्रुसयागु छँय् झाल। उबलय् पत्रुसया ससःमां तसकं ज्वर वय्काः लासाय् ग्वारातुलाच्वन।

15 वय्कलं वयागु ल्हाः थियादिल। अले वयागु ज्वर क्वलाना वन। अले वं दनाः वय्कःपिन्त नके त्वके याः जुल।

☆ 8:4 ८:४ लेवी १४:१-३२ ☆ 8:11 ८:११ लूक १३:२९ ☆ 8:12 ८:१२ मती २२:१३; २५:३०; लूक १३:२८

16 बहनी जूबलय् मनूतयसं भूत दुबिना च्वंपिं तःमहयसित हे वयकःयाथाय हल। म्हुतुं जक नवानाः येशू भूत दुबिना च्वंपिन्त लायकादिल, अले हानं म्हुंमफुपिन्त नं लायकादिल।

17 यशैया अगमवक्तां धयाथकूगु खँ पूवकेत वयकलं थथे यानादीगु खः –

“प्रभु थःमहयसिनं हे झीगु ल्वयली
फुक्कं लिक्कायाः यंकादिल।”☆

येशूया चेला जुइपिं मनूत
लूक ९:५७-६२

18 येशू थःगु जवंखवं यक्व मनूतयत् खनाः चेलातयत् समुद्र पारि वनेगु उजं बियादिल।

19 वयकः झायादीत्यंबलय् छम्ह शास्त्री वयाः थथे धाल – “गुरूजु, छि गन गन झाइ जि नं ल्यूल्यू वये।”

20 वयकलं लिसः बियादिल – “ध्वंतय् च्वनेत प्वाः दु, झंगःतय् च्वनेत स्वँ दु, मनूया काय्या धाःसा छ्यं दिकेत नं थाय् म्दु।”

21 मेम्ह छम्ह चेलां नं थथे धाल – “प्रभु, जितः जिमि अबुयागु सीम्ह निं थुने बियादिस्ँ।”

22 वयकलं वयात धयादिल – “सीम्हयात सीम्हयसिनं हे थुनी। छ जि लिसे वा।”

ग्वःफय्यात दिकादीगु
मर्क ४:३५-४१; लूक ८:२२-२५

23 येशू अनं नांचाय् च्वनाः झाल। चेलात नं वयकः नाप हे वन।

24 उबलय् हे आकाझाकां तसकं ग्यानापुक ग्वःफय् वल। लःयागु किसिद्रम्बलं नांचायात त्वपुइत्यन। वयकः धाःसा घनाच्चन।

25 चेलातयसं वनाः वयकःयात थनाः थथे धाल – “प्रभु, जिमित बचय् यानादिस्ँ। जिपिं लखय् दुनिन।”

26 अले वयकलं इमित धयादिल – “छिपिं छाय् अपायसकं ग्यानागु? छिमिसं जितः अज्जं क्वातुक विश्वास याये मफुनि ला?” थुलि धयाः वयकलं दनाः ग्वःफय्यात व लःद्रम्बःयात हक्कादिल। अले ग्वःफय् दित, लःद्रम्बः नं दित।

27 थ्व खना: इपि छक्क जुल। अले थथे धाल – “थ्व गज्या:मह मनु खः? समुद्र व फसंनापं थ्व मनूयागु खँ न्यं।”

भूत दुब्यूपि निम्हयसित लाय्कादीगु

मर्क ५:१-२०; लूक ८:२६-३९

28 येशू समुद्र पारिइ गदरिनीतयगु देशय् झायादीबलय् भूत दुबिना च्वंपि निम्ह मनूतयसं दिपं पिहां वया: वय्कःयात नापलात। थुपि तसकं हे ग्यानपुसे च्वंगुलि अनं सुं हे मजू।

29 वय्कःयात खनेवं हे इपि थथे धका: चिल्लाय् दना: हाल – “हे परमेश्वरया काय्, छि जिमिथाय् छाया् झायागु? मत्यवं हे जिमित सजाँय बीत झायागु ला?”

30 अन हे लिक्क छबथां फात नं ज्वया तःगु दु।

31 भूततयसं वय्कःयात थथे धका: बिन्ति यात – “छिं जिमित पितिना हे दीगु जूसा थ्व फातय्के दुबीगु उजं बियादिसँ।”

32 अले वय्कलं इमित धयादिल – “हँ।” अले मनूतयगु म्हं पिहां वना: भूतत अन ज्वयातःपि फातय्के दुबित। अले फात फुक्क ब्वाँय् वना: भीरं क्वब्वात। अले समुद्रय् कुतुं वना: सित।

33 फा ज्वयाच्वंपिन्सं शहरय् वना: अन जूगु खँ फुक्कं न्यंकल। भूत दुबिना च्वंपिन्त छु जूगु खः व नं न्यंकल।

34 अले शहरय् च्वंपि मनूत फुक्क वय्कःयात स्वः वल। इमिसं वय्कःयात अनं पिहां झासँ धका: बिन्ति यात।

9

पक्षवातं कःमह मनूयात लाय्कादीगु

मर्क २:१-१२; लूक ५:१७-२६

1 येशू अनं नांचाय् च्वना: समुद्र पारि तुं थःगु शहरय् लिहां झाल।

2 मनूतयसं वय्कःयाथाय् छम्ह पक्षवातं कःमह मनूयात लासानापं हल। इमिगु थज्या:गु विश्वास खना: वय्कलं धयादिल “बाबु, ग्याये मते, छं या:गु पाप क्षमा जुल।”

3 थ्व न्यना: अन च्वंपि शास्त्रीत थःथवय् थथे खँ ल्हात – “थ्व मनुखं ला परमेश्वरयात क्वहंकाच्वन।”

4 इमिगु मनय् च्वंगु खँ सीका: वय्कलं थथे धयादिल – “छिमिसं छाय् मभिगु खँ मतिइ तथा जुयागु?

5 ‘छंगु पाप क्षमा जुल’ धायेगु अ:पु ला कि ‘दना: न्यासि हँ’ धायेगु अ:पु?

6 संसारय् च्वंपिनिगु पाप क्षमा यानाबीत मनूया काय्याके अधिकार दु धयागु खँ छिमिसं सीकि।” अले वय्कलं व पक्षवातं क:म्ह मनूयात थथे धयादिल – “दना: थ:गु लासा ज्वना: छँय् हँ।”

7 थुलि धायेवं हे व पक्षवातं क:म्ह मनू दना: थ:गु छँय् वन।

8 थ्व खना: अन च्वंपिं मनूत गयात। अले मनूतय्त परमेश्वरं थज्या:गु अधिकार बियादीगुलि इमिसं परमेश्वरयात त:धंकल।

येशू मतीयात स:तादीगु

मर्क २:१३-१७; लूक ५:२७-३२

9 येशू अनं मेथाय् झायाचवनादीबलय् मती धयाम्ह छम्ह मनूयात कर कायेगु अह्वाय् च्वनाच्वंगु खन। अले वय्कलं वयात स:तादिल – “जि नाप वा।” अले व दना: वय्क: नाप वन।

10 छन्हु वय्क: मतीयागु छँय् पाहां जुयाच्वंबलय् कर काइपिं मनूत व पापी मनूत नं वया: वय्क: व वय्क:या चेलात नाप फ्यतुना: भ्वय् नल।☆

11 थ्व खना: फरिसीतयसं वय्क:या चेलातय्त धाल – “थ्व छु ख: ? छिमि गुरु ला कर काइपिं व पापीत नाप च्वना: नयाच्वन नि?”

12 इमिसं थथे धा:गु ताया: वय्कलं इमित लिस: बियादिल – “छुं मजूपिं मनूतय्त डाक्टर माली मखु, ल्वय् दुपिन्त जक माली।

13 थ्व छु धा:गु ख: वना: बांलाक सीकि – ‘जित: बलि बी ह:गु मय:, बरु जित: मा:गु ला दया माया ख:’ छाय्धा:सा ‘जि धर्मी’ धका: धया जुइपिन्त मखु, बरु पापीतय्त स:त: वयागु ख:।’☆

अपसं च्वनेगु खँ

मर्क २:१८-२२; लूक ५:३३-३९

14 छन्हु बप्टिस्मा बीम्ह यूहन्नाया चेलातयसं वया: येशूयाके थथे धका: न्यन – “जिपिं व फरिसीत न्ह्याबले अपसं च्वना, छिकपिनि चेलात जक छाय् अपसं मच्वंगु?”

15 वयकलं इमित लिसः बियादिल – “जिलाजं जुइम्हनापं दतले जन्त वःपिन्सं नुगः मछिंकी ला? अयनं छन्हु ब्याहा याइम्ह मनूयात लिंगनाः यनीतिनि। अले जक इपि अपसं च्वनी।

16 “पुलांगु वसतय् सुनानं न्हगु कापतं पकीं मखु, छायाधाःसा पुलांगु वसतय् न्हगु कापतं पकल कि इन जक बांमलाक तःक् जुइक गुनावनी।

17 “अथे हे सुनानं पुलांगु छेंगूयागु म्हिचाय् दाखरस तइ मखु, छायाधाःसा पुलांगु छेंगूयागु म्हिचाय् दाखरस तल धाःसा म्हिचा हे गुनावनी। अले दाखरस नं वाइ, म्हिचा नं स्यनी। थथे मयासें बरु दाखरस न्हगु म्हिचाय् तल धाःसा नितां बचय् जुइ।”

सीम्ह मचा व मफुम्ह मिसा

मर्क ५:२१-४३; लूक ८:४०-५६

18 येशू इमित थथे धयाच्चनादीबलय् हे धर्मशास्त्र स्यनीगु छेंया छम्ह थकालि वयाः वयकःयात भागियानाः थथे धाल – “जिमि म्हाय् नकतिनि हे जक सित। छिं झ़ायाः ल्हातं जक थियादीसां जिमि म्हाय् म्वाना वइ।”

19 अले वयकः दनाः व नाप झ़ाल। चेलात नं वयकः नाप वन।

20 वयकःपि लँय् झ़ाया च्वंबलय् झिनिदनिसें हि क्वहां वइगु ल्वचं कयाच्वंम्ह छम्ह मिसां ल्यूनं वयाः वयकःयागु गाच्चः थिल।

21 “वयकःयागु गाच्चः जक थी फत धाःसा जिगु ल्वय् लायावनी” धकाः वं मतिइ तःगु खः।

22 अले वयकः फहिलादिल। व मिसायात खनाः वयकलं धयादिल – “केहें मयजु, ग्याये मते। छं विश्वास याःगुलि छंगु ल्वय् लन।” अबलय् हे व मिसायागु ल्वय् लन।

23 अनंलि वयकः थकालियागु छेंय् झ़ाल। अन सी बाजं थानाच्वंपिं व ख्वया च्वंपिं मनूत खनाः

24 वयकलं धयादिल – “छिपिं फुक्कं पिने हूँ। मचा मसीनि। घना जक च्वंगु खः।” वयकलं थथे धयादीगुलि इमिसं वयकःयात हिस्यात।

25 मनूतयत् पिछ्वयादी धुंकाः वयकलं दुहां झ़ायाः मचायात ल्हातं ज्वनाः थनादिल। अले व मचा दना वल।

26 थव खँ देशन्यंक बयबय् जुल।

निम्ह कांयात व छम्ह लातायात लाय्कादीगु

27 येशू अनं झाःबलय् निम्ह कांपि वयकःया ल्यूल्यु वनाः थथे धकाः चिल्लाया दनाः हाल – “हे दाऊदया काय्, जिमित दया यानादिसँ।”

28 वयकः छँ थ्यने धुंकाः इपि नं वयकःयाथाय् वल। अले वयकलं इमिके न्यनादिल – “जिं छिमित लाय्काबी फु धकाः छिमित विश्वास दु ला?”

अले इमिसं लिसः बिल – “दु, प्रभु।”

29 अले वयकलं इमिगु मिखा थियाः धयादिल – “छिमिसं विश्वास याःथें छिमिगु मिखा लना वनेमा।”

30 अले इमिसं मिखां खन। वयकलं इमित थथे धयादिल – “थ्व खँ सुयातं कने मते।”

31 अयनं इमिसं वनाः थ्व खँ देशन्यंक बय्बय् यानाबिल।

32 वयकःपि अनं झाःबलय् लँय् मन्तयसं भूत दुबिना च्वंम्ह छम्ह लातायात वयकःयाथाय् हल।

33 भूतयात पितिनेवं व मन्खं नवाना हल। अले स्वयाच्च्वंपि मन्तयसं छक्क जुयाः थथे धाल – “थथे ला जिमिसं इस्राएलय् गुब्सं मखनानि।”

34 फरिसीतयसं धाःसा थथे धाल – “थ्व मन्यात भूततय् जुजुं हे भूत पितिनेगु शक्ति ब्यगु खः।”☆

येशू मन्तयत माया यानादीगु

मर्क ६:३४; लूक १०:२

35 थुकथं येशू शहरय् व गांगामय् चाःहिलाः धर्मशास्त्र स्यनीगु छँय् झायाः स्यनेकने यायां परमेश्वरयागु राज्ययागु भिंगु खँ न्यंकादिल। अले तःतामछि ल्वय् दुपि मन्तयत नं लाय्कादिल।☆

36 मन्तयगु हुलयात खनाः वयकःयात माया वन, छायाधाःसा इपि जवाः मदुपि फैचात थें हाःनाः मदयाः उखेलाः थुखेलाः मदयाच्च्वन।☆

37 अले वयकलं चेलातयत् धयादिल – “बाली लयेगु ला यक्व हे दु, बाली लइपि धाःसा कम जक दु।

38 अय्जगुलि बाली थुवाःयात बाली लइपि छ्वयाहयादिसँ धकाः प्रार्थना या।”☆

☆ 9:34 १:३४ मती १०:२५; १२:२४; मर्क ३:२२; लूक ११:१५ ☆ 9:35 ९:३५ मती ४:२३; मर्क १:३९; लूक ४:४४ ☆ 9:36 ९:३६ गन्ती २७:१७; १ राज २२:१७; २ इति १८:१६; इज ३४:५; मर्क ६:३४ ☆ 9:38 ९:३७-३८ लूक १०:२

10

झिनिम्ह प्रेरितत ल्ययादीगु

मर्क ३:१३-१९; ६:७-१३; लूक ६:१२-१६

1 छन्हु येशू झिनिम्ह चेलातयत् थःथाय् सःताः इमित मभिंगु आत्मा पितिनेगु व न्ह्यागुं ल्वय् लाय्के फइगु अधिकार बियादिल।

2 थुपिं झिनिम्ह प्रेरितत थथे खः —

पन्नुस धाःम्ह सिमोन,

वया किजा अन्दियास,

जब्दिया काय् याकूब

व वया किजा यूहन्ना,

3 फिलिप

व बारथोलोमाइ,

थोमा,

कर काइम्ह मती,

अल्फयसया काय् याकूब

व थेदियस,

4 सिमोन कनानी

व येशूयात धोखा ब्यूम्ह यहदा इस्करियोत।

5 थुपिं झिनिम्हयसितं वय्कलं थथे धयाः छवयादिल — “यहदीमखुपिन्थाय् व सामरीतयगु शहरय् वने मते।

6 बरु इस्राएलय् च्वंपिं जवाः मदुपिं फैचात थें जुया च्वंपिन्थाय् वनाः

7 थथे धकाः न्यंकि — ‘परमेश्वरयागु राज्य न्ह्यःने थयंकः वये धुंकल।’

8 उसाँय् मदुपिन्त लाय्कि, सीपिन्त म्वाकी, कोहितयत् लाय्कि, अले भूत पितिनाछव। थ्व शक्ति छिमित सिति दुगुलिं छिमिसं नं सिति हे या।

9 “छिमिसं लुँ, वहः व सिजःयागु धिबा घाना वने मते।

10 पिहां वनेत म्हिचा, लं, लाकां, तुतां ज्वने मते, छायाधाःसा ज्या याइपिन्त माक्व ला अर्थे हे दइ।[☆]

11 “गामय् वंसां शहरय् वंसां छिमित दुकाइम्ह मनूयात मालाः अनं वने मत्यतले वयाथाय् हे च्वैं।

☆ 10:10 १०:१० १ कोर ९:१४; १ तिमो ५:१८

- 12 वयागु छैय् दुहां वनेवं हे 'छिमित शान्ति दयेमा' धकाः धा।
 13 छिमिगु खँ इमिसं थुइका काःसा इमित शान्ति दइ, मखुसा छिमिसं ब्यगु शान्ति छिमिके तुं लिहां वइ।
 14 गुगुं नं छैय् अथवा शहरय् छिमित दुमकाःसा व छिमिगु खँ तकं मन्यंसा छिपि अनं वनाछव। अनं वनेत छिमिसं थःगु पालिइ थाःगु धू तकं थाथा यानाः हूँ।
 15 जिं छिमित खःगु खँ धाये – न्याय यानादीबलय् परमेश्वरं सदोम व गमोरा शहरय् च्वंपिन्त स्वयाः अप्वः थ्व शहरय् च्वंपिन्त सास्ती यानादी।”

दुःखकष्ट जुइतिनिगु खँ

मर्क १३:१-१३; लूक २१:१२-१७

- 16 “न्यँ, गुँछिचातयगु हुलय् जिं छिमित फैचा थें यानाः छवयाच्चनागु दु। उकिं छिपि सर्प थें चंख जुइमाः, अले सुकुभतु थें स्वजा जुइमाः।
 17 मनूतलिसे होश याना जु, छायाःसा इमिसं ज्वनाः छिमित अदालतय् लःल्हानाबी। अले धर्मशास्त्र स्यनीगु छैय् यनाः कोर्रा दाइ।
 18 जितः विश्वास याःगुलि छिमित हाकिमत व जुजुपिनिगु न्ह्यःने थने यंकी। छिमिसं अन हे इमित व यहदीमखुपिन्त जिगु साक्षी ब्यु।
 19 अथे थने यंकीबलय् छिमिसं गथे यानाः छु नवायेगु धकाः धन्धा काये मते। छिमिसं नवाये माःगु खँ छिमित उबलय् हे बियादी।
 20 छायाःसा छिमिसं नवाइगु खँ छिमिगु थःगु हे जुइ मखु, छिमिगुपाखें परमेश्वरयागु आत्मां हे नवानादी।
 21 “मनूतयसं थः हे दाजुकिजापिन्त महियाः स्याके बी। बौनं थः हे काय् म्हायपिन्त, अले काय् म्हायपिन्सं थः हे मां बौयात महियाः स्याके बी।
 22 थथे जिगु नामं यानाः छिमित फुक्कसिनं हेला याइ। दकलय् लिपा तकं क्वातुक विश्वास यानाः सह यानाच्चंमह बचय् जुइ।
 23 छगू शहरं ख्यानाः छवःसां छिपि मेगु शहरय् हूँ। जिं छिमित धात्थें धाये – मनूया काय् मवतले छिमिसं इस्त्राएल न्यंक हे ज्या क्वचाय्के फइ मखुनि।”
 24 “गुरु स्वयाः चेला तःधं मजू। अथे हे मालिक स्वयाः च्यः तःधं मजू।”

☆ 10:14 १०:१४ प्रे १३:५१ ☆ 10:15 १०:१५ मती ११:२४; उत ११:२४-२८ ☆ 10:15 १०:७-१५
 लूक १०:४-१२ ☆ 10:16 १०:१६ लूक १०:३ ☆ 10:22 १०:२२ मती २४:९-१३ ☆ 10:24
 १०:२४ लूक ६:४०; यूह १३:१६; १५:२०

25 चेला थः गुरु थें जुइ दुगुलि, अले च्यः थः मालिक थें जुइ दुगुलि लुधनेमाः।
छें थुवाःयात हे भूतया जुजु बालजिबुल धाल धाःसा वया जहानतय्त इन छु जक
धाइगु जुइ?”☆

सु खनाः ग्यायेमाः?

लूक १२:४-७

26 “मनूत खनाः छिपि ग्याये मते। त्वपुयातःगु खने दइतिनि। सुचुकातःगु सी
दइतिनि।☆

27 जिं छिमित खिउँथाय् धयागु खँ छिमिसं न्हिनय् बय्बय् या। अथे हे जिं
छिमित न्हाय्पनय् धयागु खँ छिमिसं कःसिइ च्वनाः बय्बय् या।

28 “म्ह जक स्याये फुपिं, आत्मा स्याये मफुपिलिसे छिपि ग्याये मते। बरु छिमिगु
म्ह व आत्मा नितांयात नरकय् छवयादी फुम्हलिसे जक ग्याना च्वँ।

29 धिबा छगलं निम्ह चखुंचा न्याये मफु ला? परमेश्वरयात मयय्कं छम्ह
चखुंचा नं स्याये फइ मखु।

30 छिमिगु छेनय् च्वंगु सँ छपु छपु दतले हे परमेश्वरं ल्याः खाना तयादीगु दु।

31 अयजूगुलि ग्याये माःगु मदु। चखुंचा स्वयाः ला छिपि यक्व हे मू वं।”

32 “सुनां मनूतयगु न्ह्यःने ‘जि ख्रीष्टयाम्ह मनू खः’ धकाः धाइ, जिं नं स्वर्गय्
जिमि बाःया न्ह्यःने वयात ‘जिम्ह मनू खः’ धकाः धाये।

33 सुनां मेपिनिगु न्ह्यःने ‘जि ख्रीष्टयाम्ह मनू मखु’ धकाः धाइ, वयात जिं नं
जिमि बाःया न्ह्यःने ‘जिम्ह मनू मखु’ धकाः धाये।”☆

ख्रीष्ट येशूयागु नितिं बाय् माली

लूक १२:४९-५३; १४:२६-२७

34 “जि संसारय् शान्ति बीत वःम्ह धकाः छिमिसं ताय्के मते। जि शान्ति बीत
मखु, बरु ल्वाकेत वयाम्ह खः।

35 “ ‘जि ला काय्यात बौलिसे,

म्ह्याय्यात मालिसे,

भौयात माजुलिसे ल्वाकेत वयाम्ह खः।

36 मनूतय् शत्रुत थःगु छैय् च्वंपि हे जुइ।”☆

☆ 10:25 १०:२५ मती १:३४; १२:२४; मर्क ३:२२; लूक ११:१५ ☆ 10:26 १०:२६ मर्क ४:२२; लूक ८:१७

☆ 10:33 १०:३३ २ तिमो २:१२ ☆ 10:36 १०:३५-३६ मीका ७:६

37 “जितः स्वयाः थः मां बौयात अप्वः माया याइम्ह मनु जिगु ल्यूल्यू वये फइ मखु। अथे हे थःकाय् म्हाय्पिन्त जितः स्वयाः अप्वः माया याइम्ह मनु नं जिगु ल्यूल्यू वये फइ मखु।

38 थःगु कूस क्वबिया जिगु ल्यूल्यू मवइम्ह मनु जिम्ह चेला जुइ फइ मखु।☆

39 थःगु प्राण बचय् यायेत जक स्वइम्ह मनु नाश जुयावनी। सुनां जिगु निति थःगु प्राण पाइ व बचय् जुइ।”☆

सिरपाः

मर्क ९:४१; लूक १०:१६

40 “छिमित दुकाःम्हय्सिनं जितः दुकाःगु जुइ। जितः दुकाःम्हय्सिनं जितः छवया हयादीम्हय्सित दुकाःगु जुइ।☆

41 अगमवक्तायात अगमवक्ता खः धकाः दुकाःम्हय्सित अगमवक्तायात बीगु सिरपाः हे दइ। अथे हे परमेश्वरं धाःथें च्वनीम्हय्सित दुकाःम्हय्सित नं वयात थें हे सिरपाः दइ।

42 जिं छिमित खःगु खँ धाये – सुनानं जिमि चेला खः धकाः दकलय् चिधंम्ह मनूयात तकं छगू गिलास जक लः त्वंकूसां वं सिरपाः कायेखनी।”

11

बप्तिस्मा बीम्ह यूहन्नायागु खँ

लूक ७:१८-३५; १६:१६

1 झिनिम्ह चेलातय्त थुलि धाये धुंकाः येशू अनं गांगामय् स्यनेकने यायेत व भिगु खँ न्यकेत झाल।

2 झ्यालखानाय् कुनातःम्ह यूहन्नां मुक्ति बीम्ह ख्रीष्टं यानादीगु ज्याखँ न्यनाः थः चेलातय्त वय्कःयाथाय् थथे धकाः न्यके छवयाहल।

3 “झायादी माःम्ह छि हे खः ला कि जिमिसं मेम्हय्सिगु लँ स्वयाच्वनेमाः नि?”

4 वय्कलं इमित लिसः बियादिल – “छिमिसं छु छु खना अले न्यना यूहन्नायात वनाः व हे धयाब्यु।

5 कांपिन्सं मिखां खन, लंग्रात न्यासि वने फत, कोहित लाया वन, ख्वॉय्तय्सं ताल, सीपिं मनूत हानं म्वानावल, अले चीमिपिन्सं भिगु खँ न्यन।☆

☆ 10:38 १०:३८ मती १६:२४; मर्क ८:३४; लूक ९:२३ ☆ 10:39 १०:३९ मती १६:२५; मर्क ८:३५; लूक ९:२४; १७:३३; यूह १२:२५ ☆ 10:40 १०:४० मर्क ९:३७; लूक ९:४८; १०:१६; यूह १३:२० ☆ 11:5 ११:५ यशै ३५:५-६; ६१:१

6 जिगु विश्वासय् सुनां शंका याइ मखु, व धन्यम्ह खः।”

7 यूहन्नाया चेलात लिहां वने धुंका: वयकलं यूहन्नायागु खँय् थथे धयादिल —
“मरुभूमिइ वना: छिमिसं छु स्वया? फसं संका च्वंगु तिकथि स्वःवनागु ला?

8 मखुसा छिपिं छु स्वयेत वनागु लय्? बाबांला:गु वसतं पुनातःपिं मनूतयत
स्वःवनागु ला? बाबांला:गु वसतं पुना तइपिं ला लायक्कुलिइ जक दइ।

9 धातर्थे छिपिं छु स्वः वनापिं? अगमवक्तायात स्वःवनागु ला? खः, जिं धाये
— यूहन्ना अगमवक्ता स्वया: यक्व तःधं।

10 थ्वयागु खँ धर्मशास्त्रय् थथे च्वयातःगु दु —

“ जिं जिम्ह दूतयात छंगु न्ह्यः हे
छ्वयाबी।
वं हे छंगु निति लँ दय्काबी। ” ☆

11 “जिं छिमित खःगु खँ धाये — बप्तिस्मा बीम्ह यूहन्ना स्वया: तःधंम्ह मनू
मेम्ह मदु। अथेसां स्वर्गियागु राज्यय् दक्वसिबय् चिधंम्ह मनू नं व स्वया: तःधं जुइ।

12 बप्तिस्मा बीम्ह यूहन्नां भिंगु खँ न्यंकूसानिसें स्वर्गियागु राज्यय् दुहां वनेत
मनूतयसं धितुधिना: जुल। थुकथं इमि दथुइ धेंधेंबल्ला: जुल। ☆

13 थ्व हे यूहन्नाया न्ह्यः वःपिं फुक्क अगमवक्तातयसं व व्यवस्थां नं स्वर्गियागु
राज्ययागु खँ धयावंगु खः।

14 छिमिसं थ्व खँ विश्वास याना का:सा वइतिनि धा:म्ह एलिया यूहन्ना हे खः। ☆

15 सुयाके न्हायपं दु वं न्यना का।”

16 “थौकन्हय्यापिं मनूतयत छु नाप दौंजय् यायेगु? थुपिं ला बजारय् च्वना:
पासापिन्त सःता: थथे खँ ल्हाइपिं मस्त थें च्वं —

17 “ जिमिसं बाँसुरी पुया:
नं छिपिं प्याखं मल्ह,

जिमिसं सी बाजं थाना:
नं छिपिं मख्वः।’

☆ 11:10 ११:१० मला ३:१

☆ 11:12 ११:१२ लूक १६:१६

☆ 11:14 ११:१४ मला ४:५; मती

१७:१०-१३; मर्क ९:११-१३

18 “नयाःत्वनाः सनामजुइह यूहन्ना वल। इमिसं वयात – ‘भूत दुब्यूह मन्’ धकाः धाल।

19 मन्या कायूनं नयेत्वने याना जुल। इमिसं वयात – ‘नगुलु, अयलाःगुलुत व कर काइपिनि व पापीतय् पासा’ धकाः धयाजुल। इमिगु बुद्धि ला इमिगु ज्यां हे क्यं।”

विश्वास मयाइपि मन्तू
लूक १०:१३-१५

20 येशू अप्वः यानाः अजू चायापुगु ज्या यानादीगु शहरय् च्वंपि मन्तूयसं पश्चाताप मयाःगुलि इमित ब्वःबियादिल।

21 “हे खोराजीन व बेथसेदाय् च्वंपि मन्तू, छिमित धिक्कार दु, छायाधाःसा छिमिथाय् याःगु अजू चायापुगु ज्याखँ टुरोस व सीदोनय् याःगु जूसा अन च्वंपिन्सं उबलय् हे भांग्रां हिनाः नौनं बुयाः पश्चाताप याये धुंकल जुइ।”

22 जिं छिमित धाये – परमेश्वरं न्याय यानादीबलय् टुरोस व सीदोनय् च्वंपिन्त स्वयाः अप्वः छिमित सास्ती यानादी।

23 “हे कफर्नहुमय् च्वंपि मन्तू, छिमित छु स्वर्गय् थत यनी धयाच्चनागु ला? छिमित ला नरकय् क्वफाइ। छिमिथाय् याःगु अजू चायापुगु ज्याखँ सदोमय् याःगु जूसा आः तक नं सदोम दयाच्चनीगु जुइ।”

24 जिं छिमित धाये – परमेश्वरं न्याय यानादीबलय् सदोमय् च्वंपिन्त स्वयाः छिमित अप्वः सास्ती यानादी।”

जिथाय् झासु लंकः वा
लूक १०:२१-२२

25 अबलय् येशू धयादिल – “हे परमेश्वर बाः, स्वर्ग व पृथ्वीया प्रभु, जिं छितः सुभाय् बी, छायाधाःसा छिं थ्व खँ सःस्यू व थू धाइपिन्त न्यंका मदिसे छुं मस्यूपि मस्तयूत न्यंकादिल।

26 बाः छितः थ्व हे भिं ताल।”

27 “बाःनं हे फुक्क जिगु ल्हातय् तयादीगु खः। काय्यात सुनानं म्हमस्यू, बाःनं जक काय्यात म्हस्यू। अले बाःयात नं सुनानं म्हमस्यू, कायूनं जक स्यू। कायूनं म्हसीका ब्यूपिन्सं जक बाःयात म्हसी।”

☆ 11:21 ११:२१ यशै २३:१-१८; इज २६:१-१८; योए ३:४-८; आमो १:९-१०; जक ९:२-४ ☆ 11:23 ११:२३ यशै १४:१३-१५; उत १९:२४-२८ ☆ 11:24 ११:२४ मती १०:१५; लूक १०:१२ ☆ 11:27 ११:२७ यहू ३:३५; १:१८; १०:१५

28 “कु क्वबिया त्यानुचाःपि फुक्कं जिथाय् झासु लंकः वा, जिं छिमित आराम बी।

29 जिगु जुवा छिमिसं क्वब्यु, अले जिके स्यना का, छायाःसा जि स्वजाम्ह व क्वमिलुम्ह खः। अले छिमिसं दुनुगलंनिसें आराम कायेखनी।☆

30 जिगु जुवा क्वबी अःपु, अले जिगु कु याउंसे च्वं।”

12

विश्रामबारयागु खँ

मर्क २:२३-२८; लूक ६:१-५

1 येशू विश्रामबार* खुन्हू छवबया लँ जुयाः झाया च्वंबलय् वय्कःया चेलातयसं नये पित्याःगुलि छवमा स्वहायकाः नयेत स्वल।☆

2 इमिसं अथे याःगु खनाः फरिसीतयसं वय्कःयात धाल – “स्व, छिमि चेलातयसं विश्रामबार खुन्हू छु याये मज्यू धाःगु खः व हे यानाच्चन।”

3 अले वयकलं लिसः बियादिल – “दाऊदं थः व थःनाप वःपिनि नये पित्याःबलय् छु यात धयागु खँ छिमिसं ब्वनागु मदु ला?

4 गुकथं वं परमेश्वरया छैय् दुहां वनाः अन छायातःगु मरि नल? अले थःनाप वःपिन्त नं नकल। परमेश्वरयात छायातःगु मरि ला पुजाहारीतयसं सिबय् मेपिन्सं नये हे मज्यू।☆☆

5 विश्रामबार पतिकं पुजाहारीतयसं विश्रामबारयागु नियम मानय् मयाः। अयनं इपिं दोषी ठहरय मजू धकाः व्यवस्थाय् च्वयातःगु खँ छिमिसं ब्वनागु मदु ला?☆

6 अयनं जिं छिमित धाये – देगः स्वयाः तःधंम्ह छम्ह थन दु।

7 ‘बलि बी हःगु जितः मयः, जितः ला दया माया जक यः’ धकाः धर्मशास्त्रय् च्वयातःगु खँ बांलाक थुइके फुगु जूसा छिमिसं छुं मयाःपिन्त दोषी धकाः पाः याइ मखुगु।☆

8 मनूया काय् विश्रामबारया नं प्रभु खः।”

ल्हाः गंम्ह मनू

मर्क ३:१-६; लूक ६:६-११

9 अले येशू अनं धर्मशास्त्र स्यनीगु छैय् झाल।

☆ 11:29 ११:२९ यर ६:१६ * 12:1 १२:१ यहदीतय विश्रामबार खुन्हू ☆ 12:1 १२:१ व्य २३:२५

☆ 12:4 १२:४ लेवी २४:१ ☆ 12:4 १२:३-४ १ शमू २९:१-६ ☆ 12:5 १२:५ गन्ती २८:९-१०

☆ 12:7 १२:७ मती ९:१३; होशे ६:६

10 अन ल्हाः गंम्ह छम्ह मनु दु। वय्कःयात दोष बीत अन च्वंपिन्सं थथे धकाः न्यन – “विश्रामबार खुन्हु सुयातं लाय्काबीगु ज्या याये ज्यू ला?”

11 वय्कलं लिसः बियादिल – “छिमि सुयां फैचा विश्रामबार खुन्हु गालय् कुतुंवन धाःसा छिमिसं वयात थकायेत मस्वइ ला?☆

12 फैचा स्वयाः ला मनु गुलि यक्व मू वं। उकिं विश्रामबार खुन्हु नं भिंगु ज्या याये ज्यू।”

13 अले वय्कलं ल्हाः गंम्ह मनूयात धयादिल – “ल्हाः तप्यांकि।” वं ल्हाः तप्यंकल। अले गंगु ल्हाः लनाः मेगु ल्हाः थें च्वन।

14 फरिसीतय्सं अनं वनाः वय्कःयात स्यायेगु ग्वसाः ग्वल।

परमेश्वरं ल्ययादीम्ह च्यः

मर्क ३:७-१२; लूक ६:१७-१९

15 थ्व खँ सियाः येशू अनं झाल। यक्व हे मनूत वय्कःया ल्यूल्यु वन। वय्कलं म्हंमफुपि दक्वसित लाय्कादिल।

16 अले वय्कलं थ्व खँय् सुयातं छुं धाये मते धकाः ख्याच्चः बियादिल।

17 वय्कलं थथे यानादीगु यशैया अगमवक्तां धयाथकूगु थ्व खँ पूर्वकेत खः –

18 परमेश्वरं धयादिल –

“स्व, थ्व जिं ल्ययाम्ह

जि यःम्ह च्यः खः।

थ्व खनाः जि तसकं लय्ताः।

थ्वयागु नुगलय् जिगु आत्मा तयाबी,

अले थ्वं हे जात जातियापिन्त

न्याययागु खँ न्यंकी।

19 थ्व गुबलें सुनाप ल्वाना जुइ मखु,

तसकं हाला जुइ मखु।

सुनानं थ्वयात लँय् लँय्

हाला जूगु खनी मखु।

20 त्वधुलेत्यंगु तिकथि छपु नं

थ्वं त्वथुली मखु।

सीत्यंगु मतयात तकं

थ्वं स्याइ मखु।
न्याययागु विजय मजुतले
थ्वं छुं हे याइ मखु।

21 अले जात जातियापिन्सं
थ्वयागु हे नामय् आशा यानाच्चवनी।”✧

येशू व बालजिबुल

मर्क ३:२२-३०; लूक ११:१४-२३

22 मनूतयसं येशूयाथाय् छम्ह कांम्ह लाताम्ह व भूत दुब्युम्ह मनूयात हल।
वयकलं वयात लायकादिल। अले वं मिखां खन, नवाये नं फत।

23 स्वयाच्चंपिन्सं छक्क जुया: धाल – “दाऊदया काय् थ्व हे मखु ला?”

24 थ्व न्यना: फरिसीतयसं थथे धाल – “भूततय् जुजु बालजिबुलं शक्ति
बियात:गुलि थ्वं भूतयात पितिनाछवये फुगु ख:।”✧

25 इमिगु मतिइ च्वंगु खँ थुइका: वयकलं इमित धयादिल – “गुगुं नं राज्य निकू
दला: थ:थवय् ल्वाना जुल धा:सा थ: हे नाश जुइ। अथे हे गुगुं नं शहर व छैनं
थ:थवय् बाया: ल्वाना जुल धा:सा ता:तुइ मखु।

26 अथे हे शैतानतय् दथुइ नं थ:थवय् ल्वापु जुल धा:सा इमिगु राज्य गथे याना:
ता:तुइ फइ?

27 बालजिबुलं शक्ति बियात:गुलि जिं भूतयात पितिनाछवये फुगु ख: धका:
छिमिसं धाल। थथे हे ख: धयागु जूसा छिमि मनूतयसं जक सुयागु शक्ति भूत
पितिनाछवइगु लय? इमिसं छिमित हे दोषी ठहरय् याइ।

28 अथे मखु, जित: परमेश्वरयागु आत्मां भूतयात पितिनाछवयेगु शक्ति ब्युगु
ख: धयागु जूसा परमेश्वरयागु राज्य छिमिथाय् वये धुंकल धका: सीकि।

29 बल्ला:म्ह मनूयागु छैन्य् खुइत न्हापां व मनूयात निं चीमा:। वयात चीधुंका:
तिनि वयागु छैन्य् खुया: यने फइ।”

30 “जिगु पँ मलीपि फुक्क जिमि शत्रु ख:। जित: मुंकेत ग्वाहालि मयाइम्हय्सिनं
जिं मुना तयागु नं ह्लाबी।”✧

31 “मनूतयसं न्हागु हे मखुगु खँ ल्हा:सां न्हागु हे पाप या:सां इमित क्षमा बी,
पवित्र आत्मायात मभिंका: खँ ल्हाइपिन्त धा:सा क्षमा बी मखु।

✧ 12:21 १२:१८-२१ यशै ४२:१-४ ✧ 12:24 १२:२४ मती ९:३४; १०:२५ ✧ 12:30 १२:३० मर्क
९:४०

32 मनुया काय्यात मभिका: खँ ल्हा:म्हयसित क्षमा यानाबी, पवित्र आत्मायात मभिका: खँ ल्हा:म्हयसित धा:सा आ: नं, लिपा नं, गुबलें हे क्षमा बी मखु।”☆

सिमा व फल

लूक ६:४३-४५

33 “भिंगु सिमाय् जक भिंगु फल सइ। मभिंगु सिमाय् मभिंगु हे फल सइ। थुकथं सिमाय् स:गु फल स्वया: सिमा भिं मभिं सीके फइ।”☆

34 अय् सर्पया मस्त, छिपि थें ज्या:पि मभिंपि मनुतयसं गथे याना: भिंगु खँ ल्हाये फइ? छाय्धा:सा नुगलय् च्वंगु खँ हे म्हतुं नवाइ।”☆

35 भिंम्ह मनुया मतिइ भिंगु हे दइगुलि वं भिंगु भिंगु हे याइ। अथे हे मभिंम्ह मनुया मतिइ मभिंगु हे दइगुलि वं मभिंगु मभिंगु जक याइ।”

36 “जिं छिमित धाये – छिमिसं ल्हाना जूगु म्वा:मदुगु छता छता खँया ल्या:चा: परमेश्वरं न्याय यानादीबलय् कयादी।

37 छिमिसं नवाना जूगु खं हे छिपि न्यायया दिनय् दोषी वा निर्दोष ठहरय् जुइ।”

अजू चायापुगु चिं क्यनेगु इनाप

मर्क ८:११-१२; लूक ११:२९-३२

38 अले गुम्हं गुम्हं शास्त्रीत व फरिसीतयसं जाना: येशूयात धाल – “अयसा गुरुजु, जिमित अजू चायापुगु चिं छक: याना: क्यनादिसें रे।”☆

39 वय्कलं धयादिल – “थौकन्हय्यापिं मनुत गुलि जक मभिना व:गु, अले परमेश्वरयात विश्वास यायेगु त्व:ता ह:गु। थुमिसं अजू चायापुगु चिं स्वयेत धयाच्वन। अहं, छिमित अगमवक्ता योनां क्यना वंगु चिं सिबय् मेगु छुं हे चिं क्यनी मखु।”☆

40 गथे योना न्यायागु प्वाथय् स्वन्हु स्वचा तक च्वन, अथे हे मनुया काय् नं पृथ्वीया दुने स्वन्हु स्वचा तक च्वनी।”☆

41 “निनवेय् च्वपिन्सं नं न्याय याइबलय् आ:यापिं मनुतयत सजौय बी हे मा: धका: नवाइ, छाय्धा:सा इमिसं ला योनां जक न्यंकूबलय् हे पश्चाताप यात। स्व, थन ला योना स्वया: नं त:धंम्ह छम्ह दु।

☆ 12:32 १२:३२ लूक १२:१० ☆ 12:33 १२:३३ मती ७:२० ☆ 12:34 १२:३४ मती ३:७; २३:३३;

१५:१८; लूक ३:७ ☆ 12:38 १२:३८ मती १६:१; मर्क ८:११ ☆ 12:39 १२:३९ मती १६:४; मर्क ८:१२

☆ 12:40 १२:४० योना ३:५

42 न्याय याइबल्य दच्छिनय् च्वंम्ह रानीं नं आःयापि मन्तयत् सजाँय बीमाः धकाः नवाइ, छायाधाःसा व तापाकंनिसें सोलोमनयागु ज्ञानयागु खँ न्यनेत वल। स्व, थन ला सोलोमन स्वयाः नं तःधंम्ह छम्ह दु।”☆

पूमवंक याःगु ज्या झन ग्यानापु
लूक ११:२४-२६

43 “मनूयागु म्हं पिहां वनाः भूतआत्मां बाय् च्वनेत मरूमिइ माः जुइ। अयनं वं बाय् लुइके फइ मखु।

44 अले वं धाइ ‘जि न्हापा च्वनाच्चनागु छँ हे लिहां वने।’ अले वं लिहां वइबल्य न्हापायागु छँ यचुकाः झःझः धाय्कातःगु व खालिगु लुइकी।

45 अले वं वनाः थः स्वयाः मभिपिं न्हय्म्ह भूततयत् सःता हइ। इपिं वयाः अन बाय् च्वनी। अले व मन् न्हापा स्वयाः गति मलाना वनी। आःयापि मभिपिं मन्तयगु गति नं थथे हे जुइ।”

येशूया मां व किजापिं
मर्क ३:३१-३५; लूक ८:१९-२१

46 येशू थथे धयाच्चनादीबलय् हे वय्कःया मां व किजापिं वय्कः नाप खँ ल्हायेत पिने प्यु वयाच्चन।

47 छम्हयसिनं वनाः वय्कःयात धाल – “छिकपिनि मां व किजापिं छिनाप खँ ल्हायेत पिने प्यु वयाच्चंगु दु।”

48 अले वय्कलं वयात धयादिल – “जिमि मां सु खः? जिमि किजापिं सु खः?”

49 अले चेलातयत् पतिचां क्यनाः धयादिल – “मां धाःसां किजापिं धाःसां थुपि हे खः।

50 छायाधाःसा सुनां स्वर्गय् च्वनादीम्ह जिमि बाःनं धाःथें याना जुइ व हे जिमि किजा, जिमि केहँ व जिमि मां खः।”

13

पुसा हलिम्हयसिगु उखान
मर्क ४:१-९; लूक ८:४-८

1 उखुन्हु हे येशू छँनं पिहां झायाः समुद्र सिथय् वनाः फ्यतनादिल।

☆ 12:42 १२:४२ १ राज १०:१-१०; २ इति ९:१-१२

2 वयकःया जवंखवं यक्व हे मनूत मुंवःगुलि वयकः नांचाय् च्वनादिल। मनूत जक समुद्रया सिथय् दनाच्चन।*

3 वयकलं इमित उखान कनाः यक्व हे खँ स्यनादिल।

“छम्ह मनू बुँइ पुसा हः वन।

4 वं पुसा हःबलय् गुलि गुलि पुसा लँय् नं लात, अले झंगःतयसं वयाः नयाबिल।

5 अले गुलि पुसा ल्वहंलि दुथाय् लात। भचा भचा जक चा दुगुलि अन लाःगु पुसा याकनं बुयावल।

6 निभाः त्वःबलय् अन बुयावःगु मा सुकूचिना वन, अले बल्लाक हा काये मफुगुलि गना वन।

7 अले हानं गुलि पुसा कंमा दुथाय् लात। कंमा तःमा जुया वःबलय् अन लाःगु पुसा थाहां वये मफुत।

8 गुलि पुसा भिगु चा दुथाय् लात, अले यक्व अन्न सल। गनं सछि, गनं खुइदुगं, गनं स्विदुगं अन्न सल।

9 सुयाके न्हायपं दु वं न्यनाः का।”

छाय् उखान छ्यले माल?

मर्क ४:१०-१२; लूक ८:९-१०

10 अले चेलातयसं वयाः वयकःयाके न्यन – “छिं इपिं लिसे छाय् उखान छुनाः खँ ल्हानादियागु?”

11 वयकलं धयादिल – “स्वर्गयागु राज्ययागु गुप्ति खँ छिमित जक सीके ब्यगु दु। इमित सीके मब्यू।

12 दुम्हयसित अज्जं तनाबी, अले वयाके झन यक्व दइ। मद्दुम्हयसिके दुगु नं लाका काइ।*

13 अयजूगुलि जिं इपिं लिसे उखान छुनाः खँ ल्हानागु खः –

“ ‘स्वयाः नं इमिसं खनी मखु,
न्यंसां इमिसं ताइ मखु,
अले थुइ नं मखु।’

14 “थुकथं यशैया अगमवक्तां धयावंगु खँ थुमिके पूवन –

* 13:2 १३:२ लूक ५:१-३ * 13:12 १३:१२ मती २५:२९; मर्क ४:२५; लूक ८:१८; १९:२६

“ छिमिसं न्यनेत ला न्यनी,
अयनं गुब्सं थुइके फइ मखु।

छिमिसं स्वयेत ला स्वइ,
अयनं गुब्सं खंके फइ मखु।

15 छायाधाःसा छिमिगु नुगः क्वय् धुंकल,
न्हायपं ख्वातुइ धुंकल,
अले छिमिसं मिखा तिस्सी धुंकल।

मखुसा ला छिमिगु न्हायपनं ताये माःगु खः,
मिखां खने माःगु खः,
नुगलं ध्वाथुइका काये माःगु खः।

छिपिं पापं लिचिलाः जिथाय् लिफः स्वया वये माःगु खः,
अले जिं छिमित लायकाबीगु खः।’☆

16 “छिपिं धाःसा धन्यपिं खः, छायाधाःसा छिमिगु मिखां खं, न्हायपनं ता।

17 जिं छिमित धात्थे धाये – तःम्ह हे अगमवक्तातय्सं व धर्मी मनुतय्सं छिमिसं
खंगु खँ तसकं स्वये मास्तिवय्कूगु खः, अयनं इमिसं स्वये मखन। अथे हे छिमिसं
न्यंगु खँ इमिसं तसकं न्यने मास्तिवय्कूगु खः, अयनं इमिसं न्यने मखन।☆

उखानयागु अर्थ

मर्क ४:१३-२०; लूक ८:११-१५

18 “पुसा हलिम्हयसिगु उखानयागु अर्थ न्यँ।

19 गुलिखय् मनुतय्सं परमेश्वरयागु राज्ययागु खँ न्यनाः नं थुइके फइ मखु। थुपिं
लँय् लाःगु पुसा थें खः। इमिगु नुगलय् हलातःगु परमेश्वरयागु वचन शैतानं वयाः
लिकया यंकी।

20 ल्वहंलि दुथाय् लाःगु पुसा परमेश्वरयागु वचन न्यनेवं लय्लय्तायाः विश्वास
याना काइपिं खः।

21 परमेश्वरयागु वचनं थुमिगु नुगलय् दुने थ्यंक हा काये फइ मखु। अले ताःई
तक च्वने फइ मखु। दुःखकष्ट वयेवं थुमिसं विश्वास यायेगु त्वःताछ्वइ।

22 परमेश्वरयागु वचन न्यना: नं धन सम्पत्तियागु माया कयाजुइपि व संसारयागु खँय् च्यूता: तया जुइपि मनूत कंमा दुथाय् ला:गु पुसा थें ख:। थुमिसं परमेश्वरयागु वचनयात गुम्से यानाबी। अले थुकिं अन्न सयकी मखु।

23 परमेश्वरयागु वचन न्यना: थुइका काइपि मनूत भिंगु चाय् ला:गु पुसा थें ख:। थुमिसं यक्व अन्न सयकी। गुलिसिनं सछि, गुलिसिनं खुइदुगं, गुलिसिनं स्विदुगं अन्न सयकी।”

नामायागु उखान

24 येशू मेगु उखान छुना: इमित धयादिल – “स्वर्गयागु राज्य थथे च्वं – छम्ह मनुखं थ:गु बुँइ भिंगु पुसा हल।

25 छन्हु चान्हय् फुक्कं घनाच्चंबलय् शत्रु वया: छव हलात:गु बुँइ नामायागु पुसा हला थकल।

26 अले मा थाहां वया: अन्न स:बलय् नामा नं खनेदयावल।

27 “अले च्य:तय्सं वया: बुँ थुवा:यात धाल – ‘मालिक, छिं बुँइ भिंगु पुसा जक हला दियागु मखु ला? नामा गनं बुयावल?’

28 “बुँ थुवालं धाल – ‘सुं शत्रुं थथे यानाथकल जुइ।’ इमिसं हानं धाल – ‘जिमिसं वना: नामा पुया छवये ला?’

29 “अले वं धाल – ‘आ: थथें पुइ म्वा:नि। मखुसा छिमिसं नामा नाप छव नं पुया छवइ।

30 छव लये मत्य:तले निमां थकाय् नि ब्यु। लयबलय् जिं ज्यामितयूत न्हापां नामा नि पुया: छवयकेत मुंकि, अले छव जक जिगु धुकुतिइ मुंके हजि धका: धाये।’ ”

दक्वसिबय् चिग्व:गु पुसा व सोडयागु उखान

मर्क ४:३०-३२; लूक १३:१८-२१

31 अले हानं येशू मेगु उखान छुनादिल। “स्वर्गयागु राज्य थथे च्वं – छम्ह मनुखं तुग्व:या पुसा थ:गु बुँइ हल।

32 दक्वसिबय् चिग्व:गु पुसा जूसां थाहां वये धुंका: थव अन दुगु मेमेगु स्वया: त:मा जूया: सिमा जुल। अले इंग:तय्सं वया: थुकियागु कचामचाय् थ:गु स्वँ दयकी।”

33 वय्कलं इमित हानं मेगु उखान छुनादिल – “स्वर्गयागु राज्य थथे च्वं – छम्ह मिसां सोडा कया: स्वफा छवचुंलय् ल्वाकछ्याना: फुक्क थासय् मन्यंतले न्हायाच्वन। अले छवचुं फुक्कं फवंगाना वल।”

34 वयकलं मनूतयत् न्ह्यागु खं थथे उखान छुनाः कनादिल। उखान मछुइकं वयकलं छुं नं स्यनामदी।

35 थुकथं अगमवक्तां थथे धकाः धयाथकूगु खँ पूवन –

“जिं मनूतयत् उखान छुनाः
जक खँ कने।
संसारयागु सृष्टि जूसानिसें
सुचुकातःगु खँ उला बी।”☆

नामायागु उखानयागु अर्थ

36 अले येशू मनूतयत् त्वःताः छँय् दुहां झाल। चेलातयसं वयाः वयकःयात थथे धाल – “बुँइ हःगु नामायागु उखानयागु अर्थ कनादिसें।”

37 वयकलं इमित धयादिल – “भिंगु पुसा हःमह मनूया काय खः।

38 बुँथ्व संसार खः। भिंगु पुसा परमेश्वरया राज्ययापिं मनूत खः। अले नामायागु पुसा शैतानया मनूत खः।

39 नामायागु पुसा हः वःमह शत्रु शैतान खः। छव लयेगु ई परमेश्वरं न्याय याइगु ई खः। छव लइपिं ज्यामित स्वर्गदूत खः।

40 “गथे नामायात मुंकाः छवयकी न्याय याइबलय् नं अथे हे याइ।

41 अबलय् मनूया कायनं थः दूतयत् छवयाहइ। अले इमिसं वयकःयागु राज्य्य् च्वंपिं पाप याःपिं व याकूपिं फुक्कसितं मुंकी।

42 अले इमित मि गालय् कुकीं। अन इपिं ख्व जक ख्वयाः वा न्ह्यायाच्वनी।

43 परमेश्वरं यःथें यानाजुइपिं जक थः परमेश्वर बाःया राज्य्य् सूर्य थें थिनाच्वनी। सुयाके न्हायपं दु वं न्यनाः का।”

थुनातःगु धन व मोतीयागु उखान

44 “स्वर्गयागु राज्य थथे च्वं – छमह मनुखं बुँइ थुनातःगु धन लइकल। वं उकियात हाकनं त्वपुल। अले व तसकं लय्तायाः वनाः थःगु फुक्क सर्बय मिःयाः व बुँ न्यात।”

45 “हाकनं स्वर्गयागु राज्य थथे च्वं – न्ह्याबलें भिंगु मोती जक माला जुइमह छमह बन्जाः दु।

46 वं तसकं मू वंगु मोती लुइवं थःके दुगु फुक्क सर्बय मिःयाः व मोती न्यात।”

जाःयागु उखान

47 “स्वर्गयागु राज्य थथे च्वं – न्या लाइपिं मनूतयसं समुद्रय् न्या लायेत जाः हात। अले थुकी थीथी कथंयापिं न्या लात।

48 जाः जायेवं इमिसं जाःयात समुद्र सिथय् साला काल। अले फ्यतुनाः इमिसं भिंपिं न्या जुक्व थःपिनिगु थलय् तल। अले मभिंपिं न्या जुक्व वांछवल।

49 परमेश्वरं न्याय यानादीबलय् नं थथे हे जुइ। स्वर्गदूततयसं वयाः मभिंपिं मनूतयत् भिंपिं मनूतपाखें छुतय् याइ।

50 अले मभिंपिं मनूतयत् मि गालय् कुकीं। इपिं अन ख्व जक ख्वयाः वा न्ह्यायाचवनी।”

51 वय्कलं न्यनादिल – “थ्व खँ छिमिसं थुल ला?”

अले इमिसं “थुल” धकाः धाल।

52 वय्कलं हानं धयादिल – “व्यवस्था स्यनीपिं व थुइकीपिं शास्त्रीत स्वर्गयागु राज्यय् चेला ज्वल धाःसा इपिं छँ थुवाः थें जुइ। छँ थुवालं थःगु धुकुतिं न्हगु व पुलांगु न्ह्यागुं लिकाये फइ।”

नासरतय् येशूयात मयय्कूगु

मर्क ६:१-६; लूक ४:१६-३०

53 थथे उखान कनादी धुंकाः येशू अनं झाल।

54 वय्कः थःगु हे शहरय् झाल। अन च्वंगु धर्मशास्त्र स्यनीगु छँय् झायाः वय्कलं मनूतयत् स्यनेकने यानादिल। वय्कःयागु खँ न्यनाः मनूतयसं छक्क जुयाः थथे धाल – “थ्वयाके थज्याःगु बुद्धि व अजू चायापुगु ज्या यायेगु शक्ति गनं वल?

55 थ्व सिँकःमिया काय् मखु ला? मरियम थ्वया मां मखु ला? याकूब, योसेफ, सिमोन व यहूदापिं थ्वया किजापिं मखु ला?

56 थ्वया केहँपिं ला थन हे दु नि? थ्वं थ्व फुक्कं गनं सय्काः वल?”

57 थुकथं इमिसं वय्कःयात विश्वास मयात।

अले वय्कलं धयादिल – “अगमवक्तायात थःगु हे शहरय् व थःगु हे छँय् मानय् याइ मखु, बरु मेथाय् न्ह्याथासं मानय् याइ।”☆

58 इमिसं विश्वास मयाःगुलि वय्कलं अन यक्व अजू चायापुगु चिं क्यना मदी।

14

बप्तिस्मा बीम्ह यूहन्नायात स्याःगु

मर्क ६:१४-२९; लूक ९:७-९

- 1 थुबलय् हे गालीलया जुजु हेरोदं येशूयागु खँ न्यनाः
- 2 थः भारदारतय्त धाल - “थ्व मनू ला बप्तिस्मा बीम्ह यूहन्ना हे जुइमाः। व सिनाः हानं म्वानावःगु जुइमाः, उकिं ला वं ततःधंगु अजू चायापुगु ज्या याये फत।”
- 3 न्हापा हेरोदं थःकिजा फिलिपया कलाः हेरोदियासं यानाः बप्तिस्मा बीम्ह यूहन्नायात ज्वनाः इयालखानाय् कुंगु खः।*
- 4 छायाःसा यूहन्नां वयात “थः किजाभौयात कलाः तये मत्यः” धकाः धाःगु खः।*
- 5 वं यूहन्नायात स्यायेगु नं मतिइ तःगु खः। अयनं मनूत खनाः ग्यानाः वं अथे याये मफुत, छायाःसा इमिसं यूहन्नायात अगमवक्ता धकाः मानय् यानातःगु खः।
- 6 हेरोदयागु बुदिया लसताय् हेरोदियासया म्हायायनं सकसिया न्हाःने तसकं बांलाक प्याखं ल्हुयाक्यंगुलि हेरोद तसकं लय्ताल।
- 7 अले वं न्हागु फ्वंसां बी धकाः पाफल।
- 8 व मचां थः मांमहयसिनं स्यनातःथें धाल - “जितः आः हे बप्तिस्मा बीम्ह यूहन्नायागु छ्यं भुइ तयाः बियादिसैं।”
- 9 थ्व न्यनाः वं तसकं नुगः मछिंकल, अयनं न्हागु फ्वंसां बी धकाः फुक्कसिगु न्हाःने पाफये धुंकुगुलि यूहन्नायागु छ्यं ध्यनाः हजि धकाः उजं बिल।
- 10 अले वं सिपाइंत छवयाः इयालखानाय् यूहन्नायागु छ्यं धेके बिल।
- 11 अले छ्यं भुइ तयाः व मचायात बी हल। मचां व थः मांयात बी यंकल।
- 12 अले यूहन्नाया चेलातय्सं वयाः वयागु सीम्ह यंकाः थुनाबिल। अले इमिसं वनाः थ्व खँ येशूयात न्यंकल।

न्यादः मनूतय्त नकादीगु

मर्क ६:३०-४४; लूक ९:१०-१७; यूह ६:१-१५

- 13 थ्व न्यनाः येशू नांचाय् च्वनाः सुं मदुगु थासय् झाल। वय्कः झाल धयागु खँ न्यनाः मनूत शहरनिसें वय्कःया ल्यूल्यु न्यासि वन।
- 14 नांचां क्वहां झाःबलय् ग्वाः ग्वाः मनूतय्त खनाः वय्कःयात तसकं माया वन, अले उसाँय् मदुपिन्त लाय्कादिल।

15 खिउँ खिउँ धाःबलय् चेलातयूसं वयाः वय्कःयात धाल – “खिउँया वये धुंकल, थन छुं हे मदु। थुमित गामय् छवयादिसँ। अले अन न्यानाः नइ।”

16 वय्कलं इमित धयादिल – “इमित छवये म्वाः, इमित छिमिसं हे नकि।”

17 इमिसं धाल – “जिमिके ला न्यापा मरि व निम्ह न्या जक दु।”

18 वय्कलं धयादिल – “छिमिके दुगु मरि व न्या जिथाय् हिँ।”

19 वय्कलं फुक्कसित ख्यलय् फ्यतुकादिल। न्यापा मरि व निम्ह न्या कयाः स्वर्गय् थस्वयाः परमेश्वरयात सुभाय् बियादिल। अले मरि कुचा थलाः वय्कलं चेलातयत्त बियादिल। इमिसं मनूतयत्त इनाबिल।

20 अले इमिसं यतले नल। इनाः ल्यं दुगु झिनिगः दाला जायक दु।

21 मस्त व मिसात ल्याः मतसे अन मिजंत जक हे न्याद्रः ति दु।

येशू लखय् न्यासि झाःगु

मर्क ६:४५-५२; यूह ६:१६-२१

22 येशू चेलातयत्त थः स्वयाः न्हापा हे नांचाय् च्वनाः समुद्र पारि वनेगु उजं बियादिल। अनं लिपा मनूतयत्त छैय् छवयादिल।

23 मनूतयत्त छैय् छवयादी धुंकाः वय्कः याकःचा पहाडय् प्रार्थना यायेत थाहां झाल। बहनी तकं वय्कः याकःचा हे च्वनादिल।

24 थुबलय् तक नांचा समुद्र सिथं यक्व हे तापाक्क थ्यने धुंकल। फय् अःखतं वयाच्वंगुलि लःद्रुम्बलं यानाः नांचा फातापुली थें च्वनाच्चन।

25 सुथ न्हापां हे वय्कः समुद्रय् न्यासि झायाः इमिथाय् थ्यंकः झाल।

26 वय्कःयात थथे समुद्रय् न्यासि झायाच्वंगु खनाः चेलात ग्यानाः “भूत भूत” धकाः चिल्लाय् दनाः हाल।

27 वय्कलं इमित धयादिल – “साहस या, जि हे खः, ग्याये मते।”

28 अले पन्नुसं वय्कःयात धाल – “प्रभु, धाथ्ये छि हे खः धयागु जूसा जितः नं समुद्रय् न्यासि वयेगु उजं बियादिसँ।”

29 वय्कलं वयात “वा” धकाः धयादिल। पन्नुस नांचां कुहां वनाः वय्कःयाथाय् वनेत लखं लखं न्यासि वन।

30 फय् वःगु खनाः व ग्यात, दुनी थें च्वंबलय् व चिल्लाय् दनाः हाल – “प्रभु, जितः बचय् यानादिसँ।”

31 अले वय्कलं वयात ज्वनाः धयादिल – “ग्व, छंगु विश्वास, छाय् संका यानागु?”

32 वय्कःपि निम्हं नांचाय् च्वने धुंकाः फय् नं दित।

33 नांचाय् च्वंपिं चेलातयसं वय्कःया तुतिइ भ्वपुलाः धाल – “छि धात्थें परमेश्वरया काय् खः।”

34 पारिइ थ्यंकाः इमिसं गनेसरेत धाःगु थासय् नांचा दिकल।

35 अन च्वंपिं मनूतयसं वय्कःयात म्हसीकाः जवंखवं च्वंगु गामय् थ्व खँ धाय्के छवत। अले मनूतयसं वय्कःयाथाय् उसॉय् मदुपिन्त हल।

36 इमिसं वय्कःयागु लंयागु च्वः जक थीत बिन्ति यात। थुकथं लं थ्यूपिं फुक्कं लाया वन।

15

थितिकुतियागु खँ

मर्क ७:१-१३

1 छन्हु यरूशलेमं सुं फरिसी व शास्त्रीतयसं वयाः येशूयात न्ह्यसः यात –

2 “छिकपिनि चेलातयसं तापाःबाज्यापिनिगु थितिकुति छाया मानय् मयाःगु? हानं ल्हाः मस्युसे नं नइगु?”

3 वय्कलं इमित लिसः बियादिल – “छिमिसं जक छाया परमेश्वरयागु खँ मन्यंसे थःगु हे थितिकुति मानय् याना जुया?”

4 परमेश्वरं धयादीगु दु – ‘थः मां बौयात हनाबना ति। मां बौयात म्हुतु वाइपिन्त स्यानाछव।’☆

5 छिमिसं धाःसा थथे धयाजुल – ‘सुनां थः मां बौयात बीमाःगु खँ परमेश्वरयात छाये धुन धकाः धाइ,

6 वं थः मां बौयात हनाबना तये म्वाः।’ थुकथं छिमिसं थःपिनिगु थितिकुति यानाः परमेश्वरयागु वचनयात ज्यालगय् मजूगु यानाब्यगु दु।

7 अय् निपाः ख्वाःपाः दुपिं, यशैयां छिमिगु खँय् थुकथं पाय्छि जुइक हे धया थकल –

8 “ ‘थुमिसं म्हुतुं ला

जितः तसकं हनाबना तइ।

नुगलं धाःसा

थुपिं तसकं तापाना च्वनी।☆

9 थुमिसं थःपिन्सं दय्कूगु थितिकुतियात

परमेश्वरयागु आज्ञा खः धकाः

मनूतयत् स्यना जुइ।
उकिं थुमिसं जिगु सेवा याःसां
छप्ति ज्यालगय् मजू।’ ”

मनूतयत् अशुद्ध याइगु खँ

मर्क ७:१४-२३

10 येशू मनूतयत् सःताः धयादिल – “न्यँ अले थुइकि।

11 म्हुतुं दुहां वनीगुलि मनूतयत् अशुद्ध याइ मखु, बरु म्हुतुं पिहां वइगुलि इमित अशुद्ध याइ।”

12 अले चेलातयसं वयाः वय्कःयात धाल – “थ्व खँ न्यनाः फरिसीत छिनाप तंम्वय्कल धकाः छिं सिल ला?”

13 वय्कलं धयादिल – “स्वर्गय् च्वनादीम्ह जिमि बाःनं पिना मदीगु फुक्क मायात लिनाछवयादी।

14 इमित त्वःताछ्व। इपि कांपि लँजवाः खः। कांम्ह मनुखं कांम्ह मनूयात ल्हाः ज्वनाः यंकूसा इपि निम्हं गालय् लाइ।”☆

15 अले पत्रुसं धाल – “जिमित थ्व खँ थुइका बियादिसँ।”

16 वय्कलं धयादिल – “छिमिसं आः तकं थुइके मफुनि ला?

17 छिमिसं नं थुइके मफु ला? मनूतयसं म्हुतुं नःगु प्वाथय् वनी, अले हानं पिहां तुं वइ।

18 मनूतयगु म्हुतुं पिहां वःगु खँ धाःसा इमिगु नुगलंनिसें हे पिहां वइ। अले थुकिं यानाः हे इपि अशुद्ध जुइ।

19 छाथ्याःसा मनूतयगु नुगलं हे थज्याःगु मभिंंगु बिचाः पिहां वइ – स्यायेगु, व्यभिचार यायेगु, खुइगु, मखुगु साक्षी बीगु, मेपिन्त मभिंकाः खँ ल्हायेगु।

20 मनूतयत् अशुद्ध याइगु थुकिं हे खः। ल्हाः मस्युसे नयेवं मनूत अशुद्ध जुइ मखु।”

छम्ह यहदीमखुम्ह मिसायागु विश्वास

मर्क ७:२४-३०

21 येशू अनं टुरोस व सीदोनया थाय् थासय् झाल।

22 अन छम्ह कनानी मिसां वयाः वय्कःयात थथे धाल – “प्रभु, दाऊदया काय्, जितः दया यानादिसँ। जिमि म्हाय्यात भूत दुबिनाः तसकं सास्ती जुयाच्वन।”

23 अयूनं वय्कलं व मिसायात छसः हे नवाना मदी। अले चेलातयसं वय्कःयात बिनति यात – “थ्व मिसा ल्यूल्यू वयाः हालाच्वन, वयात ‘हुँ’ धकाः धयादिसँ।”

24 वय्कलं धयादिल – “जितः ला झी इस्राएलयापि तपि फैचात मालेत जक छवयाहयादीगु खः।”

25 थ्व न्यनाः व मिसा वय्कःयागु तुतिइ भवपुल। अले धाल – “प्रभु, जितः ग्वाहालि यानादिसँ।”

26 वय्कलं धयादिल – “न्हापां मस्तयत् निं गाक्क नके ब्यु, छायाधाःसा मस्तयसं नयाच्वंगु लाकाः खिचायात वान्छवया बी मज्यु।”

27 वं धाल – “खः प्रभु, अथेसां खिचां नं ला थः मालिकं नःबलय् वाःगु नयेखनी नि।”

28 अले वय्कलं वयात धयादिल – “केहें मय्जु, छिगु विश्वास तसकं तःधं, छिं मनं तुं थें जुइमा।” उबलय् हे वया म्हाय् लन।

येशू तःमहयसित लाय्कादीगु

मर्क ७:३१-३७

29 येशू अनं गालील समुद्र सिथं सिथं झायाः पहाडय् च्वय् झायाः च्वनादिल।

30 अले मनूतयसं वय्कःयाथाय् लंग्रा, कां, लाता, ल्हाःतुति संके मफुपिं व अथे हे मेमेगु ल्वचं कःपिन्त हल। वय्कलं इमित लाय्कादिल।

31 थथे लातातयसं नवाःगु, ल्हाःतुति मसंपिं लाःगु, लंग्रात न्यासि वंगु, कांतयसं मिखां खंगु खनाः मनूत छक्क जुल। अले इमिसं इस्राएलीतय् परमेश्वरयात तःधंकल।

येशू प्यद्रः मनूतयत् नकादीगु

मर्क ८:१-१०

32 येशू थः चेलातयत् सःताः धयादिल – “थ्व मनूत खनाः जितः तसकं माया वन। थुपिं जि नाप च्वनाच्वंगु स्वन्हु दये धुंकल। नयेगु नं छुं हे मदु। जिं इमित मनकुसे लिछवय् मास्ति मवः, छायाधाःसा भाःपी मफयाः थुपिं लैय् हे मूर्छा जुइ।”

33 चेलातयसं धाल – “थुलिमछिसित नकेत झीसं थज्याःगु सुं मदुगु थासय् गन कयाः हयेगु?”

34 अले वय्कलं न्यनादिल – “छिमिके ग्वःपाः मरि दु?”

इमिसं धाल – “न्हय्पाः मरि व चिचिधिपिं न्या भचा दु।”

35 अले वय्कलं फुक्कसितं बैय् फयतुकादिल।

36 अनलि वयकलं न्हयपा मरि व न्या ल्हातय कयाः परमेश्वरयात सुभाय् बियादिल। अले मरि कुचा थलाः चेलातयत् बियादिल। इमिसं मनूतयत् इनाबिल।

37 अले इमिसं यतले नल। इनाः ल्यं दुगु न्हयग् दाला मुंकल।

38 मस्त व मिसात ल्याः मतसे अन नःपि मिजंत जक प्यदुः ति दु।

39 अले अन दुपि ग्वाः ग्वाः मनूतयत् बिदा बियाः वयकः नांचाय् च्वनाः मगादानया इलाकाय् झाल।

16

अजू चायापुगु चिं क्यनेगु इनाप

मर्क ८:११-१३; लूक १२:५४-५६

1 छन्हु सुं फरिसीत व शास्त्रीत येशूयात जाँचय् यायेत वल। अले इमिसं वयकःयात परमेश्वरं छ्वयाहयादीगु खःसा छगू अजू चायापुगु चिं यानाः क्यनादिसँ धकाः धाल।☆

2 वयकलं लिसः बियादिल – “निभाः बीबलय् आकाश ह्याउँसे च्वन कि छिमिसं ‘कन्हय् दि बांलाइ’ धकाः धाइ।

3 अथे हे सुथय् आकाश खिउँसे च्वन कि छिमिसं ‘ग्वःफय् वइ’ धकाः धाइ। छिमिसं आकाशयात स्वयाः थौंयागु दिं गथे जुइ धकाः धायेफु धाःसा थ्व ईयागु चिं जक थुइका कायेमफु ला?

4 थौंकन्हय्यापि मनूत गुलि जक मभिना वःगु, अले परमेश्वरयात विश्वास यायेगु त्वःता हःगु। थज्याःपिन्सं अजू चायापुगु चिं स्वयेत धयाच्वन। अहं, छिमित अगमवक्ता योनां क्यना वंगु चिं सिबय् मेगु छुं हे चिं क्यनी मखु।” अले वयकः अनं झाल।☆

फरिसी व सदुकीतयगु सोडा

मर्क ८:१४-२१

5 समुद्र पारिइ थ्यंकाः चेलातयसं मरि हये ल्वःमंकल।

6 येशुं इमित धयादिल – “बांलाक होश या, फरिसीत व सदुकीतयगु सोडापाखे बचय् जुयाच्वँ।”☆

7 अले इमिसं थःथवय् थथे खँ ल्हात – “झीसं मरि हये ल्वःमंगुलि वयकलं थथे धयादीगु जुइ।”

☆ 16:1 १६:१ मती १२:३८; लूक ११:१६

☆ 16:4 १६:४ मती १२:३९; लूक ११:२९

☆ 16:6 १६:६

लूक १२:१

8 थ्व सिया: वय्कलं इमित धयादिल – “छिपि छाय् मरि हये ल्व:मन धका: हालाच्चनागु? छिमिगु विश्वास गन वन?

9 छिमिसं अज्ज नं मथूनि ला? न्यादु: मनूतयत् न्यापा मरि इना: नकागु ल्व:मन ला? अले छिमिसं कुचाकाचा जक ग्व:ग: दालाय् मुंका?*

10 अले प्यदु: मनूतयत् न्हय्पा: मरि इना: नकागु नं ल्व:मन ला? उबलय् छिमिसं ग्व:ग: दालाय् मुंका?*

11 जिं मरियागु खँ धयाच्चनागु मखु, बरु फरिसी व सदुकीतय्गु सोडापाखें बचय् जुयाच्चँ धका: धयागु ख:। छिमिसं गथे मथूगु?”

12 अले तिनि इमिसं वय्कलं सोडापाखें बचय् जुयाच्चँ धयादीगु मखु, बरु फरिसीत व सदुकीतय्सं स्यनेकने याइगु खं बचय् जुयाच्चँ धयादीगु ख: धका: थुइकल।

पत्रुसं येशूयात म्हसीकूगु

मर्क ८:२७-३०; लूक ९:१८-२१

13 येशू कैसरिया फिलिप्पी शहरया लिक्क थ्यंबलय् चेलातयत् थथे धका: न्यनादिल – “मन्या काय्यात मनूतय्सं सु धका: धयाजुल?”

14 इमिसं लिस: बिल – “गुलिसिनं बप्तिस्मा बीम्ह यूहन्ना, गुलिसिनं एलिया, गुलिसिनं ला यर्मिया, अले गुलिसिनं मेम्ह हे अगमवत्ता जुइ धका: धाइगु।”*

15 अले वय्कलं इमिके न्यनादिल – “छिमिसं जित: सु धका: धयाच्चना लय्?”

16 सिमोन पत्रुसं लिस: बिल – “छि म्वा:म्ह परमेश्वरया काय्, मुक्ति बीम्ह ख्रीष्ट ख:।”*

17 वय्कलं वयात धयादिल – “योनाया काय् सिमोन, छ धन्य ख:, छाय्धा:सा छं थ्व खँ मनूतय्पाखें सय्का: धा:गु मखु, बरु स्वर्ग्य् च्वनादीम्ह जिमि बा:नं हे छन्त थ्व खँ धाय्कादीगु ख:।

18 अथे जगुलि जिं छन्त धाये, छ धाथें हे पत्रुस ल्वहं ख:। जिं थ्व हे ल्वहँतय् थ:गु मण्डली* दय्के। अले शैतानं तकं थ्व मण्डलीयात बुके फइ मखु।

19 जिं छन्त स्वर्ग्या राज्ययागु ता:चा बी। छं पृथ्वीइ पना त:गुयात स्वर्ग्य् नं पना तइ, अले छं पृथ्वीइ त्व:ता त:गुयात स्वर्ग्य् नं त्व:ता तइ।”*

* 16:9 १६:९ मती १४:१७-२१

* 16:10 १६:१० मती १५:३४-३८

* 16:14 १६:१४ मती

१४:१-२; मर्क ६:१४-१५; लूक ९:७-८

* 16:16 १६:१६ यूह ६:६८-६९

* 16:18 १६:१८ मण्डली

थुकियात ग्रीक भाषां एकलेसिया धाइ

* 16:19 १६:१९ मती १८:१८; यूह २०:२३

20 थुलि धयादी धुंका: वय्कलं चेलातय्त वय्क: हे मुक्ति बीम्ह ख्रीष्ट ख: धयागु खँ सुयातं कने मते धका: उजं बियादिल।

येशू थ: सीगु खँ कनादीगु

मर्क ८:३१-३३; लूक ९:२२

21 उबलय् निसें येशू चेलातय्त ध्वाथुइक धयादीगु यानादिल – “यस्शलेमय् वना: जिं थकालिपि, त:धिपि पुजाहारीत व शास्त्रीतय्गु ल्हातं दु:खकष्ट फये मानि। लिपा इमिसं जित: स्यानाछवइ। अले स्वन्हु लिपा जि हानं म्वाना वये।”

22 थ्व न्यना: पन्नुसं वय्क:यात छखे यंका: ब्व:बिया: थथे धाल – “परमेश्वरं थथे याकादी मखु, प्रभु, थथे ला छित: गुबलें हे जुइ मखु।”

23 वय्कलं लिफ: स्वया: पन्नुसयात धयादिल – “शैतान, छ जिथाय् च्वने मते। छं ला जिगु ज्या हे पनेत स्वयाच्वन। छं ला परमेश्वरयागु मखु, बरु मनूतय्गु खँय् जक ध्यान बियाच्वन।”

गथे याना: येशूया चेला जुइगु

मर्क ८:३४-३८; लूक ९:२३-२७

24 अले वय्कलं चेलातय्त धयादिल – “जि नाप वयेगु जूसा छिपिं सुनानं थ:गु खँय् छं हे च्यता: तये मते। अले थ:गु क्रूस थ:म्हं हे क्वबिया सीत तं लिमच्युसे जिगु ल्यूल्यु वा।”

25 थ:गु प्राण बचय् यायेत जक स्वइम्ह मनू नाश जुयावनी। सुनां जिगु नितिं थ:गु प्राण पाइ व बचय् जुइ।

26 सारा संसार हे ल्हातय् दया: नं व मनू सिनावन धा:सा वयात छु दइ? वं हानं थ:गु प्राण छुकि लिफयाना काइ?

27 आ: याकनं हे परमेश्वरं मनूया काय्यात झ:झ: धाय्क स्वर्गदूतत नाप छवयाहयादी। अले वय्कलं छम्ह छम्ह मनूयात इमिगु ज्या स्वया: सिरपा: बियादी।

28 जिं छिमित ख:गु खँ धाये – थन दनाच्वंपि मध्ये गुलिखय् मनूत मनूया काय् जुजु जुया: थ:गु राज्यय् व:गु मखंतले ला सी तं मखुनि।”

☆ 16:24 १६:२४ मती १०:३८; लूक १४:२७ ☆ 16:25 १६:२५ मती १०:३३; लूक १७:३३; यूह १२:२५

☆ 16:27 १६:२७ मती २५:३१; भज ६२:१२; रोम २:५

17

येशूयागु रूप ह्यूगु

मर्क ९:२-१३; लूक ९:२८-३६

1 खुन्हु लिपा येशू पत्रुस, याकूब व याकूबया किजा यूहन्नायात ब्वना: तज्जा:गु पर्वतय् झाल।

2 इमिसं स्वस्वं हे वय्कःयागु रूप हिला वन। वय्कःयागु ख्वा: निभा: थें थिनावल, अले वस: नं ज: थें त्वइसे च्वना वल।

3 इमिसं मोशा व एलिया वया: वय्कः नाप खँ ल्हानाच्वंगु खन।

4 अले पत्रुसं वय्कःयात धाल – “प्रभु, झीपिं थन हे च्वने दत धा:सा गुलि बांलाइ। छिं धयादीसा जिं छिगु निति, मोशायागु निति व एलियायागु निति स्वंगु बल्चा दय्काबी।”

5 पत्रुसं थथे धयाच्वंबलय् तसकं थीगु सुपाँय् वया: इमित त्वपुल। अले सुपाँय् दुनें थथे धयाह:गु स: ताये दत – “थ्व जि य:म्ह काय् ख:। थ्व लिसे जि तसकं लय्तायागु दु। थ्वं धा:गु खँ न्यँ।”✠✠

6 थ्व स: न्यना: चेलात तसकं ग्याना: बैय् भ्वसू वन।

7 अले वय्कलं वया: इमित थिया: धयादिल – “दँ, ग्याये मते।”

8 अले इमिसं थस्वत, अन वय्कः सिबय् मेपिं सुं हे मदु।

9 पर्वतं क्वहां झाया च्वंबलय् वय्कलं इमित धयादिल – “मनूया काय् सिना: म्वाना मवतले छिमिसं थ्व खँ सुयातं कने मते।”

10 चेलातय्सं वय्कःयाके न्यन – “शास्त्रीतय्सं न्हापालाक एलिया हे वयेमा: धका: छाया धयाच्वंगु?”✠

11 वय्कलं धयादिल – “ख:, एलिया नि न्हापालाक वया: फुक्कं मिलय् याइ।

12 जिं छिमित धाये – एलिया ला वये धुंकल। इमिसं वयात म्हमसील। इमिसं वयात य:य:थें यात। मनूया काय्यात नं इमिसं अथे हे याना: दु:खकष्ट बी।”✠

13 अले तिनि इमिसं वय्कलं बप्तिस्मा बीम्ह यूहन्नायागु खँ धयादीगु ख: धका: थुइकल।

भूत दुब्यूम्ह मचायात लाय्कादीगु

मर्क ९:१४-२९; लूक ७:३७-४३

✠ 17:5 १७:५ उत २२:२; व्य १८:१५; भज २:७; यशै ४२:१; मती ३:१७; १२:१८; मर्क १:११; लूक ३:२२

✠ 17:5 १७:१-५ २ पत्र १:१७-१८ ✠ 17:10 १७:१० मला ४:५ ✠ 17:12 १७:१२ मती ११:१४

14 वय्कःपि मनूत दुथाय् झाःबलय् छम्ह मनू वयाः वय्कःया तुतिइ भवपुलाः थथे धाल –

15 “प्रभु, जिमि काय्यात दया यानादिसँ। वयात तिल्वय् वयाः तसकं सास्ती जुयाच्चन। झाःझाः पति व लखय् लाःसां मिइ लाःसां ग्वारात् वनीगु।

16 उकिं जिं वयात छिकपिनि चेलातय्थाय् हया। इमिसं वयात लाय्काबी मफु।”

17 वय्कलं धयादिल – “छिमिसं गथे जक विश्वास याये मफुगु? जि छिपिनाप ग्वःन्ह हे च्वनीतिनि धकाः? जिं छिमित गुलि जक सह यानाच्चवेगु? मचायात थन हजि।”

18 अले वय्कलं भूतआत्मायात हक्काः पितिनाछवयादिल। अबलय् हे व मचा लन।

19 लिपा चेलातयसं सुं मदुबलय् वयाः वय्कःयाके थथे धकाः न्यन – “जिमिसं भूतआत्मायात छाय् पितिनाछवये मफुगु?”

20 वय्कलं धयादिल – “छिमिसं क्वातुक विश्वास याये मफुगुलि अथे याये मफुगु खः। जिं धात्थे धाये – छिमिके तू छगः ग्वःछि जक विश्वास दःसां छिमिसं थ्व पहाडयात ‘थनं चिला हूँ’ धाःसा चिलावनी। छिमिसं याये मफुगु छुं नं दइ मखु।✱

21 थज्याःगु ज्या अपसं मच्चकं व प्रार्थना मयाय्कं याये फइ मखु।”

हानं थः सीगु खँ कनादीगु

मर्क ९:३०-३२; लूक ९:४३-४५

22 गालीलिय् च्वनादीबलय् वय्कलं चेलातयत् धयादिल – “मनूया काय्यात ज्वनाः मनूतय्गु ल्हातय् लःल्हाइगु ई वइन।

23 इमिसं वयात स्याइ, अले स्वन्हु दय्काः हानं म्वाना वइ।” थ्व न्यनाः इमिसं तसकं नुगः मछिकल।

येशू देगःयागु कर पुलादीगु

24 येशू व वय्कःया चेलात कफर्नहुमय् झाःबलय् देगःयागु कर काइम्ह मनुखं वयाः पन्नुसयात थथे धाल – “छिमि गुरु देगःयागु कर पुलादी ला कि दी मखु?”✱

25 पन्नुसं लिसः बिल – “पुलादी।”

✱ 17:20 १७:२० मती २१:२१; मर्क ११:२३; १ कोर १३:२ ✱ 17:24 १७:२४ प्रस ३०:१३; ३८:२६

पन्नुस छैय दुहां वयेवं वयकलं वयात धयादिल – “सिमोन, छंगु छु बिचा: दु? थ्व पृथ्वीइ जुजुपिन्सं सुयाके कर व भंसा: काइ? थ: कायपिन्के काइ ला कि मेपिन्के काइ?”

26 “मेपिन्के” धका: पन्नुसं लिस: बिल।

अले वयकलं धयादिल – “अयसा कायपिन्सं म्वा: का मखु ला?

27 अयजूसां झीसं थुमित तं पिकायके मज्यु, उकिं समुद्रय् वना: बल्छी ति। दकलय् न्हापां क्यंमह न्यायात साला: का। वयागु म्हुतुइ छंगु व जिगु देग:यागु कर पुलेत गाक्क धिबा दइ। अले उकिं हे कर पुलाब्यु।”

18

दकलय् त:धंमह सु?

मर्क ९:३३-३७; लूक ९:४६-४८

1 अबलय् हे चेलातयूसं वया: येशूयाके न्यन – “स्वर्गयागु राज्यय् दकलय् त:धंमह सु ख:?”☆

2 वयकलं छमह मचायात स:ता: इमिगु दथुइ थना:

3 धयादिल – “जिं छिमित धाथें धाये – छिमिसं थ:गु बिचा: व बानी त्व:ता: मस्त थें मजुल धा:सा छिमित स्वर्गयागु राज्यय् दुकाइ मखु।☆

4 उकिं थ्व मचा थें क्वमिलु जुइमह मनू हे स्वर्गयागु राज्यय् दकलय् त:धंमह जुइ।

5 “सुनां जिगु नामय् थज्या:मह मचायात दुकाइ, वं जित: हे दुका:गु ति ग्यनी।”

पापय् लाकीगु खँ

मर्क ९:४२-४८; लूक १७:१-२

6 “सुनानं जित: विश्वास याइमह चिधंमह छमह मनूयात पापय् लाकेत स्वल धा:सा वयात ग:पतय् ल्वहंघ: घाका: समुद्रय् क्वफायेगु हे बांलाइ।

7 “थ्व गुलि दु:खयागु खँ ख: – संसारय् मनूतयत् स्यंकीगु खँ नं दु। थज्या:गु खँ दया हे च्वनी। अथेसां थथे स्यंकेत स्वइमह मनूयात धिक्कार दु।”

8 “ल्हा: अथवा तुति छन्त पापय् लाकी धा:सा उकियात पाला छव। ल्हा:तुति निपां दयका: गुबलें मसीगु मिइ लायेगु स्वया: ला ल्हा:तुति मदयक म्वानाच्वनेगु हे भिं।☆

9 अथे हे मिखां छन्त पापय् लाकी धाःसा उकियात लिकयाः वान्छवया ब्यु। मिखा निगलं दयकाः नरकयागु मिइ वांछवय्का च्वनेगु स्वयाः ला कां जुयाः म्वानाच्वनेगु हे भिं।”☆

तंम्ह फैचायागु उखान
लूक १५:४-७

10 “उकिं जिमि मस्त सुं छम्हयसित नं क्वह्यके मते, छायाधाःसा जिं छिमित धयाच्वना – मस्तयत् सुसाःकुसाः याइपिं स्वर्गदूतत स्वर्गय् च्वनादीम्ह जिमि बाःयागु न्ह्यःने हे दु।

11 अथे जगुलि हे मन्या काय् तनाच्वंपिन्त बचय् यायेत वःगु खः।☆

12 “छम्ह मन्या सछि फैचा दु। छम्ह जक फैचा तंसां वं गुइगुम्ह फैचात त्वःताः तंम्ह फैचायात माः मवनी ला?

13 जिं छिमित खःगु खँ धाये – तंम्ह फैचा लुइवं मतपिं गुइगुम्ह फैचा स्वयाः नं तंम्ह फैचा खनाः व तसकं लय्ताइ।

14 अथे हे स्वर्गय् च्वनादीम्ह छिमि बाःयात नं थ्व मस्त सुं छम्ह हे नं तनिगु मयः।

पाप यानाच्वंम्ह विश्वासी
लूक १७:३-४

15 “छिमि दाजुकिजा सुनानं छन्त मभिका जुल धाःसा याकःचा हे वनाः वयागु टुंभिं क्यनाब्यु। वं छंगु खँ न्यन धाःसा छिपिं हानं मिलय् जुइ फइ।☆

16 वं छंगु खँ मन्यन धाःसा मेपिं छम्ह निम्हयसित नं ब्वनाः हूँ। व्यवस्थाय् च्वया तः थें निम्ह स्वम्हयसिनं साक्षी बिल धाःसा छं वयात ब्यूगु टुपं ठीक ठहरय् जुइ।☆

17 इमिसं धाःगु खँ नं वं मन्यन धाःसा मण्डलीइ वनाः फुक्क खँ न्यंकाब्यु। मण्डलीयागु खँ नं मन्यन धाःसा छिमिसं वयात यह्दीमखुम्ह व कर काइम्ह मनु थें तायकि।

18 “जिं छिमित खःगु खँ धाये – छिमिसं पृथ्वीइ पना तःगुयात स्वर्गय् नं पना तइ। अले छिमिसं पृथ्वीइ त्वःता तःगुयात स्वर्गय् नं त्वःता तइ।☆

19 “जिं छिमित हानं धाये – थ्व पृथ्वीइ छिपिं सुं निम्हयसिनं छगू हे मनं छुं पवन धाःसा स्वर्गय् च्वनादीम्ह जिमि बाःनं व छिमित बियादी।

☆ 18:9 १८:९ मती ५:२९ ☆ 18:11 १८:११ लूक १९:१० ☆ 18:15 १८:१५ लूक १७:३

☆ 18:16 १८:१६ व्य १९:१५ ☆ 18:18 १८:१८ मती १६:१९; यूह २०:२३

20 गन जिगु नामय् निम्ह स्वम्ह मनू मुनी, अन जि इपिं नाप दइ।”

क्षमा मयाइम्ह च्यःयागु उखान
लूक १७:४

21 छन्हू पत्रुसं येशूयाके थथे धकाः न्यन – “प्रभु, दाजुकिजां पाप याःगु ग्वःकः तक क्षमा बीगु? न्हय्कः तक ला?”

22 वय्कलं लिसः बियादिल – “न्हय्कः तक जक मखु। थ्व स्वयाः न्हयेदुगं अप्वः न्हय्कः तक बीमाः।”

23 “स्वर्गयागु राज्य थथे च्वं – छकः छम्ह जुजुं थः च्यःतय्के इमिगु ल्याःचाः कायेगु क्वःछित।

24 वं अथे ल्याःचाः काय् त्यंबलय् वयाथाय् झिद्रः दां त्याये कयातःम्ह छम्ह च्यःयात हल।

25 व च्यःयाके त्यासा पुलेत धिबा मदुगुलि जुजुं वयात थः कलाः, काय्-ह्याय्पिं, दुगु सर्बय व थःत तकं मियाःसां त्यासा पुले हजि धकाः उजं बिल।

26 “अले व च्यःनं जुजुयागु तुति ज्वनाः धाल – ‘महाराज, जितः छन्हू निन्हू दया यानादिसँ। जिं फुक्कं धिबा पुलाबी।’

27 जुजुयात व मनू खनाः दया वनाः वं वयागु त्यासा फुक्कं माफ यानाबिल।”

28 “अनं वनाः वं थःनाप हे ज्या याइम्ह छम्ह च्यःयात नापलात। व च्यःनं वयाके सःबस त्याये कयातःगु जुयाच्चन। वं वयात खनेवं गःतां ज्वनाः – ‘का, आः थर्थे हे जिगु धिबा पु’ धकाः धाल।

29 “वया पासाम्हयसिनं वयागु तुति ज्वनाः धाल – ‘छन्हू निन्हू पिया ब्यु। जिं छंगु धिबा फुक्कं पुलाबी।’

30 व मानय् मजू। अले धिबा मपुतले वयात इयालखानाय् तयाबिल।

31 “थ्व खनाः वनापं ज्या याइपिं च्यःतय्सं तसकं नुगलय् स्याकल। अले इमिसं वयाः जुजुयात फुक्क खँ न्यंकल।

32 जुजुं वयात सःताः धाल – ‘अय् दुष्ट मनू छं बिन्ति याःगुलि जिं छंगु त्यासा फुक्कं माफ यानाबिया।

33 जिं छन्त दया याना थें छं नं थःनापं ज्या याइम्ह च्यःयात दया याये म्वाः ला?”

34 जुजुं तसकं तंम्बयाः फुक्क धिबा मपुतले वयात इयालखानाय् कुना तयेगु उजं बिल।”

35 “छिमिसं नं थः दाजुकिजापिन्त दुनुगलंनिसें क्षमा याना मबिल धाःसा स्वर्ग्य् च्वनादीम्ह जिमि बाःनं नं छिमित अथे हे यानादी।”

19

पारपाचुकेगु खँ

मर्क १०:१-१२; लूक १६:१८

1 थुलि धयादी धुंकाः वय्कः गालीलं यर्दन खुसि पारिइ यहदियाय् झाल।

2 अन नं ग्वाः ग्वाः मनूत वय्कःया ल्यूल्यू वल। अले वय्कलं म्हंमफुपिन्त लायकादिल।

3 सुं फरिसीत वयाः वय्कःयात जाँचय् यायेत थथे धकाः न्यन — “मनूतयसं छुं जुयाः थः कलाःयात त्वःते माल धाःसा त्वःते ज्युं ला कि मज्यू?”

4 वय्कलं लिसः बियादिल — “छिमिसं धर्मशास्त्रय् थथे च्वयातःगु ब्वनागु मदु ला? ‘सृष्टि यानादीबलय् हे परमेश्वरं इमित मिजं मिसा यानाः दयकादीगु खः’☆—

5 अयजूगुलि मनूत थः मां बौयात त्वःताः कलाःनापं च्वंवनी। अले इपिं निम्हं छम्ह हे जुइ।☆

6 उकिं आः इपिं निम्ह मखु, छम्ह हे जुइ धुंकल। परमेश्वरं ह्वनादीपिन्त मनूतयसं फाये मज्यू।”

7 फरिसीतयसं हानं न्यन — “अयजूसा मोशां पारपाचुके यायेत भवं च्वयाः जक यायेमाः धकाः छाया धयाथकूगु लय्?”☆

8 वय्कलं लिसः बियादिल — “छिमिगु नुगः छाःगुलि हे मोशां अथे पारपाचुकूसां ज्यू धकाः धयाथकूगु खः। सृष्टि याःबलय् निसें हे थथे जूगु मखु।

9 जिं छिमित धाये — सुनानं छुं खँ मदय्क थः कलाःयात त्वःताः मेम्ह कलाः हःसा वं व्यभिचार याःगु जुइ। अथे हे त्वःतातःम्ह मिसायात हःम्ह मिजंनं नं व्यभिचार याःगु जुइ।”☆

10 अले चेलातयसं वय्कःयात धाल — “निम्हतिपूयागु स्वापु थज्याःगु हे खः धयागु जूसा ब्याहा मयायेगु हे बांलाः।”

11 वय्कलं इमित धयादिल — “फुक्कसिनं थथे याये फइ मखु, परमेश्वरं हे यानादिल धाःसा जक याये फइ।

☆ 19:4 १९:४ उत १:२७; ५:२२ ☆ 19:5 १९:५ उत २:२४ ☆ 19:7 १९:७ व्य २४:१-४; मती ५:३१

☆ 19:9 १९:९ मती ५:३२; १ कोर ७:१०-११

12 मन्तयसं ब्याहा मयाइगु तःतामछि कारण दु। गुम्हं ला बूसानिसें हे नपुंसक जुइ, गुम्हयसित ला मन्तयसं हे अथे यानाबी। अले गुम्हं ला स्वर्गयागु राज्ययागु निंति ब्याहा मयाइपिं नं दु। थूम्हयसिनं थ्व खँ न्यना का।”

मस्तयत् आशिष बियादीगु

मर्क १०:१३-१६; लूक १८:१५-१७

13 येशुं आशिष बियाः प्रार्थना यानादी धकाः मन्तयसं थः मस्तयत् वय्कःयाथाय् ब्वना हल। चेलातयसं धाःसा इमित हक्काः छवल।

14 वय्कलं धयादिल – “मस्तयत् पने मते। इमित जिथाय् छवया हजि, छायाधाःसा स्वर्गयागु राज्य थज्याःपिनिगु हे खः।”

15 अले मस्तयत् आशिष बियाः वय्कः अनं झाल।

तःमिम्ह ल्याय्म्ह मनु

मर्क १०:१७-३१; लूक १८:१८-३०

16 छन्हु छम्ह मनुखं येशूयाथाय् वयाः धाल – “गुरुजु, भिंगु छु ज्या याःसा जितः अनन्त जीवन दइ?”

17 वय्कलं लिसः बियादिल – “छिं जिके छाया भिंगु खँ न्यं वयाच्चवना? भिंम्ह ला परमेश्वर जक हे दु। अनन्त जीवन दयकेत छिं आज्ञा मानय् यायेमाः।”

18 “जिं छु आज्ञा मानय् याये माल?” धकाः वं न्यन।

अले वय्कलं लिसः बियादिल – “मनु स्याये मते, व्यभिचार याये मते, खुइ मते, मखुगु साक्षी बी मते, ☆

19 थः मां बौयात हनाबना ति, थः जःलाखःलायात थःत थें माया या।” ☆

20 अले वं धाल – “थ्व फुक्कं ला जिं मानय् यानाच्चवनागु हे दु। जिं आः हानं मेगु छु याये मानि?”

21 अले वय्कलं धयादिल – “सिद्ध जुइगु खःसा वनाः थःके दुगु फुक्कं मियाः नये मखंपिन्त इनाब्यु। अले छन्त स्वर्गय् धनसम्पत्ति दइ। थुलि याये धुंकाः जिनापं वा।”

22 थ्व खँ न्यनाः व ल्याय्म्ह मनु ख्वाः खिउँसे च्वंकाः वन, छायाधाःसा व तसकं तःमिम्ह खः।

23 लिपा वय्कलं चेलातयत् धयादिल – “जिं छिमित खःगु खँ धाये – तःमिपिं मन्त स्वर्गयागु राज्यय् दुहां वनेत तसकं थाकुइ।

24 जिं छिमित हानं धाये – मुलयागु कँय् प्वाल्य् ऊँट दुहां वने अःपुया च्वनी तर तःमिपि मनूत परमेश्वरयागु राज्य्य् दुहां वनेत थाकुया च्वनी।”

25 थ्व खँ न्यनाः चेलातयसं अजू चायाः न्यन – “अयसा सुनां जक उद्धार काये फइ?”

26 इमिगु ख्वालय् स्वयाः वय्कलं धयादिल – “मनूतय्पाखें थथे जुइ फइ मखु, अयनं परमेश्वरं याये मफुगु छुं नं मदु।”

27 अले पनुसं धाल – “स्वयादिसें, जिमिसं दुगु फुक्क त्वःताः छिगु ल्यूल्य् वयाच्वना। जिमित छु दइ लय्?”

28 वय्कलं धयादिल – “जिं छिमित खःगु खँ धाये – मनूया काय् वयाः झःझः धायक जुजु जुइबलय् जिनापं जुयाच्वंपिं छिपिं नं झिनिगु सिंहासन्य् च्वने दइ। अले इस्राएलीया झिनिगु कुलयागु न्याय याइ।☆

29 जिगु नितिं छेंबुं, दाजुकिजा, तताकेहें, मांबौ, काय्मह्याय् त्वःतावःपिन्त व स्वयाः अप्वः दइ। अले अनन्त जीवनं नं दइ।

30 तर न्हापा लाःपिं अप्वः यानाः लिपालाइ, अले लिपा लाःपिं न्हापा लाइ।”☆

20

दाखक्यबय् ज्या याइपिनिगु उखान

1 “स्वर्गागु राज्य थथे च्वं – छन्हु छम्ह मनू सुथ न्हापां थःगु दाखक्यबय् ज्या याकेत ज्यामि माः वन।

2 छगू दिनार ज्यालाबी धकाः वं ज्यामितय्त ज्या याके छवल।

3 “नौ बजे ति व हानं बजारय् वंबलय् वं ज्या मलुयाः अर्थे दनाच्वंपिं मनूतय्त खन।

4 अले वं इमित धाल – ‘छिपिं नं जिगु दाखक्यबय् ज्या याः हुँ। जिं छिमित गाक्क ज्यालाबी।’

5 अले इपिं ज्या याः वन।

“अथे हे बाह बजे, तीन बजे ति नं व क्यब थुवालं मेपिं मनूतय्त ज्या याकेत हल।

6 हानं पाँच बजेपाखे बजारय् वंबलय् ज्या मलुयाः अर्थे दनाच्वंपिं मनूतय्त खन। अले वं इमित धाल – ‘छिपिं थथे न्हिच्छि ज्या मदय्क थन छाय् दनाच्वनागु?’

7 “इमिसं लिसः बिल – ‘जिमिसं सुनानं ज्या मब्यु।’

“ अयसा, छिपिं नं जिगु दाखक्यबय् ज्या याः हुँ धकाः वं इमित धाल।

☆ 19:28 १९:२८ मती २५:३१; लूक २२:३०

☆ 19:30 १९:३० मती २०:१६; लूक १३:३०

8 “बहनी जुइका: दाखक्यबया थुवालं ज्यामि नाय:यात धाल – ‘ज्यामितयत् स:ता: दकलय लिपा व:पिनिसें छसिकथं ज्याला ब्यु।’☆

9 पाँच बजे ज्यायाव:पि ज्यामित फुक्कसितं छगू छगू दिनार ज्याला बियाछवल।

10 दकलय न्हापालाक ज्या या: व:पिन्सं इमित अप्व: ज्यालाबी धका: मतिइ त:गु ख:। अयनं इमित नं उलि हे तुं ज्याला बिल।

11 ज्याला कया: इपि क्यबया थुवा:याथाय् वना: हा: वन।

12 ‘घौछि जक ज्या या:पिं, थुमित नं, अले न्हिच्छि निभालय् क्वक्यक ज्या यानापिं, जिमित नं उलि हे ज्याला बियादिल’ धका: इमिसं दाखक्यबया थुवा:यात धाल।

13 “अले वं इमित धाल – ‘जिं छिमित अन्याय यानागु मदु। न्हिच्छियागु ज्याला द:सा गा: धका: छिमिसं हे ज्या या: वयागु मखु ला?’

14 छिपिं थ:गु ज्याला कया: हूँ। लिपा ज्या या:व:पिन्त नं जि उलि हे बी मास्ति वल।

15 जिं थ:गु धिबा थ: य:महयसित बी मदु ला? जिं बिल धका: छिमि तं पिहां व: ला कि?’ ”

16 अले येशू धयादिल – “थुकथं न्हापा ला:पिं लिपालाइ, लिपा ला:पिं न्हापा लाइ।”☆

येशू थ: सीगु खँ स्वक: खुसि कनादीगु

मर्क १०:३२-३४; लूक १८:३१-३४

17 यरूशलेमपाखे झाया च्वंबलय् येशू झिंनिमह चेलातयत् छखे ब्वना यंका: धयादिल।

18 “न्यँ, झीपिं यरूशलेमय् वनाच्वनागु दु। अन मनूया काय्यात ज्वना: त:धंपिं पुजाहारीत व शास्त्रीतयगु ल्हातय् ल:ल्हानाबी। इमिसं वयात स्याये हे मा: धका: धाइ।

19 अले वयात यहदीमखुपिनिगु ल्हातय् ल:ल्हानाबी। इमिसं वयात गिजय् याइ, कोर्दाइ, अले क्रूसय् यख्खाया: स्याइ। स्वन्हु दय्का: व हानं म्वाना वइ।”

जब्दिया कलातं येशूयात बिन्ति या:गु

मर्क १०:३५-४५; लूक २२:२४-२७

20 अबलय् हे जब्दिया कला: थ: निमह कायपिन्त ब्वना: येशूयाथाय् वया: वय्क:यागु पालिइ भवपुया: छुं खँ प्वन।

☆ 20:8 २०:८ लेवी १९:१३; व्य २४:१५

☆ 20:16 २०:१६ मती १९:३०; मर्क १०:३१; लूक १३:३०

21 वयकलं न्यनादिल – “छन्त छु माल?”

व मिसां धाल – “छि जुजु जुयादीबलय् जिमि थ्व निम्ह काय्पिं छिगु जवंखवं च्वनेदयेमा।”

22 वयकलं वया काय्पिन्त धयादिल, “छिमिसं छु फवनाच्चवना धयागु थःपिन्सं हे मस्यु। छु जिं त्वनेत्यनागु दुःखयागु ख्वलां छिमिसं त्वने फु ला?”

इमिसं “फु” धकाः लिसः बिल।

23 वयकलं धयादिल – “त्वनेत ला छिमिसं नं जिं थें त्वनी। अयनं जिक्के सुयात नं जिगु जवंखवं तयेगु हक मदु। सुयात सुयात तयेगु धकाः ला जिमि बाःनं क्वःछिना तयादी धुंकल।”

24 थ्व खँ न्यनाः मेपिं झिम्ह चेलात इपिं निम्ह दाजुकिजा लिसे तंम्बल।

25 अले वयकलं इमित थःथाय् सःताः धयादिल – “छिमिसं सि हे स्यु नि – थ्व संसारय् शासन याइपिन्सं मनूतयत ल्हातय् काइ। अले इमि नायःतय्सं इमित थः यःथें याना तइ।

26 छिमिगु दथुइ धाःसा थथे जुइ मखु। सुनां तःधं जुइ मास्ति वय्की व छिपिं सकसियां च्यः जुइमाः।

27 अथे हे सुयां न्हापालाके मास्ति वःसा व ला छिमि फुक्कसियां दास जुइमाः।

28 मनूया काय्न् सेवा याकेत मखु, बरु सेवा यायेत व यक्वसित मुक्ति बीत व सीत वःगु खः।”

निम्ह कांपिन्त लाय्कादीगु

मर्क १०:४६-५२; लूक १८:३५-४३

29 वयकःपिं यरीहों झाःबलय् यक्व हे मनूत वयकःया ल्यूल्यु वन।

30 लँय् च्वनाच्चपिं निम्ह कांतय्सं येशू झायाच्चंगु दु धकाः न्यनाः थथे धकाः हाला हल – “दाऊदया काय् प्रभु, जिमित दया यानादिसँ।”

31 मनूतय्सं इमित हाले मते धकाः ब्वःबिल।

अयनं इपिं झन जक तसकं हाला हल – “दाऊदया काय् प्रभु, जिमित दया यानादिसँ।”

32 वयकलं दिनाः इमित सःताः न्यनादिल – “जिं छिमित छु याये माल?”

33 अले इमिसं धाल – “प्रभु, जिमिगु मिखा चाय्कादिसँ।”

34 माया वनाः वय्कलं इमिगु मिखाय् थियादिल। थीकथं हे इमिसं मिखां खन। अले इपि वय्कः नाप वन।

21

येशू यरूशलेमय् झाःगु

मर्क ११:१-११; लूक १९:२८-४०; यूह १२:१२-१९

1 वय्कःपि यरूशलेमया सतीक लाःगु जैतून डाँडायगु बेथफागे धाःगु थासय् थय्कः झाःबलय् येशू निम्ह चेलायात थथे धयाः छवयादिल –

2 “छिपि न्ह्यःनेसं च्वंगु गामय् हँ। अन छम्ह गधायात वया मचानापं चिनातःगु दइ। इमित फ्यनाः थन हजि।

3 छिमित सुनानं छुं धाल धाःसा छिमिसं – ‘प्रभुयात माला च्वन’ धकाः धा। अले इमिसं बिया हइ।”

4 अगमवत्तगं धयाथकूगु थ्व खँ पूवनेत थथे जूगु खः –

5 “सियोनया मनूतय्त धा –

‘स्व, छिमि जुजु छिमिथाय् झायाच्च्वंगु दु।

वय्कः क्वमितुम्ह जुयाः गधा गयादिल,

गधाया मचा गयाः झायादीगु दु।’ ”☆

6 चेलातय्सं वनाः वय्कलं धयादी थें तुं यात।

7 इमिसं गधा व गधाया मचायात हल, अले थथःगु गा गधाया म्हय् लायाबिल। अले वय्कः गधाया म्हय् च्वनादिल।

8 यक्व मनूतय्सं थथःगु गा हयाः लँय् लायाबिल। गुलिसिनं सिमायागु हः हयाः लायाबिल।

9 वय्कःया ल्यूल्यू व न्ह्यः न्ह्यः वयाच्च्वंपिं मनूत थथे धकाः हाल –

“होसन्ना, दाऊदया काय्,

प्रभुया नामं झाःम्ह धन्यम्ह खः।

स्वर्गय् च्वनादीम्ह परमेश्वरयात होसन्ना।” ☆

10 वयकः यस्सलेम थ्यंबलय् अन तसकं हे बयब्य जुल। मनूतय्सं – “थ्व मनू सु खः?” धयाजुल।

11 अले वयकःया ल्यूल्यू वःपिं मनूतय्सं थथे धाल – “थ्व गालीलयागु नासरतं झाःम्ह अगमवक्ता येशू खः।”

बंजाःतयत् देगलं ख्यानाछवःगु

मर्क ११:१५-१९; लूक १९:४५-४८; यूह २:१३-२२

12 येशू देगलय् झायाः अन च्वनाः न्यायेगु व मीगु ज्या यानाच्चपिं फुक्कसितं ख्याना छवयादिल। धिबा ग्यलिपिं सराफितयगु टेबिल ग्वारा तुइकाबिल, सुकुभतु मीपिनिगु मेच फाता पुइकाबिल।

13 अले इमित धयादिल – “धर्मशास्त्रय् थथे च्वयातःगु दु – ‘जिगु छैं प्रार्थना यायेगु छैं खः।’ छिमिसं ला थुकियात खूँ दाखूँतयगु छैं धकाः यानाच्चन।”*

14 कांपिं व लंग्रापिं देगलय् वयकःयाथाय् वल। वयकलं इमित लायकादिल।

15 थथे अजू चायापुगु ज्या खनाः व मस्तय्सं देगलय् च्वनाः ततःसलं “होसन्ना, दाऊदया काय्” धकाः हाल।

थ्व न्यनाः तःधपिं पुजाहारीत व शास्त्रीत तमं मि जुल।

16 इमिसं वयकःयात धाल – “थ्व मस्तय्सं छु धयाच्चन, छिं मताः ला?”

वयकलं धयादिल – “जिं न्यनाच्चनागु दु। छु छिमिसं धर्मशास्त्रय् च्वयातःगु

थ्व खूँ ब्वनागु मदु ला? ‘मस्त व ह्याउँमस्तयगु म्हुतुं थःत तःधंकादिल।’ ”*

17 अले वयकः इमित त्वःताः बेथानिया धाःगु गामय् झायाः अन हे चाहिलादिल।

यःमरिमायात सराः बियादीगु

मर्क ११:१२-१४, २०-२४

18 कन्हय् खन्हु सुथ न्हापां शहरय् लिहां झाया च्वंबलय् वयकःयात नयेपित्यात।

19 लँ सिथय्सं यःमरिमायात खनाः वयकः सिमा लिक्क झाल। हः सिबय् मेगु छुं हे मदुगुलि वयकलं व सिमायात थथे धयादिल – “आवंलि छंके गुबलें हे फल धयागु मसयेमा।” अबलय् हे व सिमा गना वन।

20 थ्व खनाः चेलातय्सं अजू चायाः न्यन – “धायेवं हे थ्व सिमा गथे गनावंगु?”

21 वयकलं धयादिल – “जिं छिमित खःगु खूँ धाये – छिमिसं नं छुं हे संका मयासें विश्वास यात धाःसा जिं यःमरिमायात याना थें जक मखु, छिमिसं थ्व पहाडयात – ‘ल्यहें दनाः समुद्रय् कुतुं हूँ’ धकाः धाल धासां अथे हे जुइ।”*

☆ 21:13 २१:१३ यज्ञे ५६:७; यर ७:११
१७:२०; १ कोर १३:२

☆ 21:16 २१:१६ भज ८:२

☆ 21:21 २१:२१ मती

22 अले विश्वास यानाः प्रार्थनाय् न्हागु फ्वंसां छिमित दइ।”

येश्यात सुनां अधिकार बियातल धकाः न्यंगु

मर्क ११:२७-३३; लूक २०:१-८

23 येशू देगलय् झायाः स्यनेकने यानाच्चवनादीबलय् तःधपि पुजाहारीत व थकालिपिन्सं वयाः वय्कःयात थथे धकाः न्यन – “छिं थथे यानादीत गनं अधिकार कयादिया? अले छितः थ्व अधिकार सुनां बिल?”

24 वय्कलं लिसः बियादिल – “जिं नं छिकपिन्के छगू खँ न्यने, छिकपिन्सं लिसः बिल धाःसा जितः सुनां थ्व अधिकार बियाहःगु खः धकाः छिकपिन्त धाये –

25 बत्तिस्मा बीगु अधिकार यूहन्नां सुयापाखें काल? स्वर्गपाखें ला कि मनूतयपाखें?”

थ्व न्यनाः इमि थःथवय् थथे खँ जुल – “ ‘स्वर्गपाखें काःगु’ धाल कि वं झीत ‘अयसा, छिमिसं वयात छाया विश्वास मयानागु लय?’ धकाः धाइ।

26 ‘मनूतयपाखें काःगु’ धाल कि मनूतयसं झीत स्याइ, छायाधाःसा फुक्कसिनं यूहन्नायात अगमवक्ता धकाः मानय् यानातःगु दु।”

27 उकिं इमिसं वय्कःयात थथे लिसः बिल – “जिमिसं मस्यु।”

वय्कलं धयादिल – “अयसा जिं नं छिकपिन्त थ्व ज्या यायेत जितः सुनां अधिकार बियाहःगु खः धकाः धाये मखु।”

निम्ह काय्यागु उखान

28 “थ्व उखानय् छिकपिनिगु छु बिचाः दु? छम्ह मनूया निम्ह काय् दु। वं तःधिकःम्ह काययात वनाः थथे धाल – ‘बाबु, थौं छं दाख्क्यबय् वनाः ज्या या।’

29 वं बौम्हयसित ‘जि वने मखु’ धकाः लिसः बिल। लिपा हानं पस्ताय् चायाः ज्या याः वन।

30 चिधिकःम्ह काय्यात वनाः नं बौम्हं अथे हे धाल। वं लिसः बिल – ‘दय्, जि वने,’ अयनं वनेत धाःसा मवं।

31 “थुपि निम्ह कायपि मध्ये सुनां बौम्हयसिगु खँ न्यन?”

इमिसं लिसः बिल – “तःधिकःम्ह कायम्हं।”

अले वय्कलं धयादिल – “जिं छिकपिन्त खःगु खँ धाये – कर काइपि व वेश्यात छिकपिं स्वयाः न्हापालाक परमेश्वरयागु राज्यय् दुहां वनी।

32 भिंगु व धात्थेगु लँपु क्यनेत बत्तिस्मा बीम्ह यूहन्ना छिकपिन्थाय् वल, अयनं छिकपिन्सं वयागु खँ न्यनामदी। बरु कर काइपिं मनूतयसं व वेश्यातयसं वयागु खँय्

विश्वास यात। इमिसं याःगु फुक्कं खंक खंक नं छिकपिन्सं पश्चाताप मयात धाःसा अले वयात विश्वास यानामदी।”☆

मभिपि म्हयतयगु उखान

मर्क १२:१-१२; लूक २०:१-१९

33 येशू इमित धयादिल – “मेगु छगू उखान नं न्यनादिसँ – छम्ह तःसिं दु। वं थःगु क्यबय दाख पित। अले प्यखें वालं चिनाबिल। वं अन दाख तिसीगु साः नं तयाबिल। अले क्यबय स्वयेत छगू बल्चा नं दय्का थकल। क्यब म्हयतयत त्वःताः व मेगु देशय वन।”☆

34 दाख खायेगु इलय वं थःगु भागय वःगु दाख कायेत च्यःतयत म्हययाथाय छवल।

35 म्हयनं वया च्यःतयत ज्वनाः छम्हयसित दाल, छम्हयसित स्याना हे बिल, अले छम्हयसित ल्वहँत कयकल।

36 तःसिनं हानं न्हापा स्वयाः यक्व च्यःतयत म्हययाथाय छवयाहल। म्हयनं इमित नं अथे हे यानाछवल।

37 “वं लिपा थः हे काय्यात म्हययाथाय छवयाहल। ‘जिम्ह काय्यात ला हनाबना तइ’ धकाः वं मतिइ तःगु खः।

38 “तःसिया काय हे वःगु खनाः म्हयतयसं थःथवय धाल, ‘थ्व ला तःसिया काय खः, थ्वयात स्यानाः फुक्क धनसम्पति झीगु यायेनु।’

39 अले कायम्हयसित ज्वनाः दाखक्यबं पिने यंकाः स्यानाबिल।”

40 अले वय्कलं इमिके न्यनादिल – “आः तःसिनं वयाः व म्हयतयत छु याइ?”

41 इमिसं लिसः बिल – “वं वयाः मभिपि म्हयतयत स्यानाछवइ। अले इलय इलय तःसिं पुले हइपि म्हयतयत क्यब ज्याके बी।”

42 वय्कलं हानं धयादिल – “धर्मशास्त्रय् च्वयातःगु छिकपिन्सं ब्वनादियागु मद्दु ला?

“ दकःमितयसं ज्यालगय् मज्जूगु धकाः

धाःगु ल्वहं हे मू ल्वहं जुल।

परमेश्वरं हे थथे यानादीगु खः।

झीसं स्वयेबलय् थ्व तसकं अजू चायापु।” ☆

☆ 21:32 २१:३२ लूक ३:१२; ७:२९-३०

☆ 21:33 २१:३३ यशै ५:१-२

☆ 21:42 २१:४२ भज

43 “उकिं जिं छिकपिन्त धाये – परमेश्वरयागु राज्य छिकपिनिगु ल्हातं लिफ्याना: परमेश्वरयागु ज्या बांलाक याइपि मनूतयत् बियादी।

44 व ल्वहँतय् दःपि कुचा कुचा दली। अले व ल्वहँ कुतुं वया: सुयात लाइ, व धू जुइ।”

45 वय्कलं कनादीगु थ्व उखान न्यना: तःधंपि पुजाहारीत व फरिसीतय्सं इमित हे ध्याका: धयादीगु ख: धका: थुइका काल।

46 उकिं इमिसं वय्कःयात ज्वनेत स्वल। अयनं मनूत खना: ग्याना: इमिसं ज्वने मछा:, छायाधा:सा मनूतय्सं वय्कःयात अगमवक्ता ख: धका: मानय् यानातःगु दु।

22

ब्याहा भवय्यागु उखान

लूक १४:१५-२४

1 येशू हानं मनूतयत् उखान छुना: थथे धयादिल।

2 “स्वर्गयागु राज्य थथे च्वं – छक: छम्ह जुजुं थ: काय्यागु ब्याहाया भव्य् सःतल।

3 जुजुं थ: दासतयत् पाहां ब्वना तःपि मनूतयत् सःतके छवल। इमिसं धा:सा वये मास्ति मवय्कू।

4 “उकिं वं हानं मेपि दासतयत् थथे धया छवल – ‘पाहांतयत् वना: थथे धयाब्यु। नयेगु ई जुल। नसाज्वलं फुक्कं बुइ धुंकल। भव्य् झा:सां जिल।’

5 अयनं पाहां ब्वना तःपिन्सं वास्ता हे मयासें थथःगु ज्याय् वन। गुम्हं थःगु बुँइ वन, गुम्हं थःगु पसलय् वन।

6 गुलिसिनं ला जुजुया दासतयत् ज्वना: दाया: स्याना हे बिल।

7 “जुजुं तमं मि जुया: सिपाइँतयत् छवया: व ज्यानमारातयत् स्याकल। अले इमिगु शहर नं छवयकाबिल।

8 जुजुं थ: दासतयत् सःता: थथे धाल – ‘भव्य् ज्वलं ला ज्वरय् जुयाच्वंगु दु। जिं सःता तइपि पाहांत धा:सा थ्व भव्य् नयेत मल्वःपि जुयाच्वन खनी।’

9 उकिं छिमिसं आ: मूळ्य् व पेकाल्य् वना: ध्वदुक्कसित भव्य् ब्वना हजि।’

10 अले इमिसं मूळ्य् व पेकाल्य् वना: ध्वदुक्क तःधंपि, चिधंपि, भिपि, मभिंपि फुक्कसित ब्वना हल। थुकथं भव्य् छँ पाहांतय्सं जाल।”

11 “अले जुजु भव्य् वःपिन्त स्वः वल। जुजुं बांला:गु वसतं पुना मतःम्ह छम्ह मनूयात खन।

12 जुजुं वयात न्यन — ‘छ थथे बांलाःगु वसतं मपुंकं थन गथे यानाः दुहां वया?’
व मनुखं छुं हे धाये मफुत।

13 अले जुजुं थः च्यःतयत् थथे धकाः धाल — ‘थ्व मनूयात ल्हाःतुति चिनाः
पिने खिउँथाय् वान्छवया ब्यु। अन हे ख्व जक ख्वयाः वा न्हायाच्चनी।’ ”☆

14 अले येशू धयादिल — “सःतातःपि यक्व दइ, अयजं ल्यइपि कम हे जक
दइ।”

कर पुलेगु खँ

मर्क १२:१३-१७; लूक २०:२०-२६

15 फरिसीतयसं वनाः येशूयात वय्कःया खँय् हे ज्वनेगु ग्वसाः ग्वल।

16 इमिसं थः चेलातयत् हेरोदया मनूत नाप वय्कःयाथाय् छवल। इमिसं वनाः
वय्कःयात थथे धाल — “गुइ, छि धात्थे भिंम्ह मनू खः। छिं मनूतयत् परमेश्वरयागु
भिंगु लँपु जक क्यनादी। मनूतयसं धाइ ल्हाइगु खँय् छिं च्यूताः तयामदी, छायाधाःसा
छिं ख्वाः स्वयाः खँ ल्हानामदी।

17 छता खँ धयादिसँ, कैसरयात झीसं कर पुले ज्यू ला कि मज्यू?”

18 वय्कलं इमिगु मभिंगु बिचाः थुइकाः धयादिल — “अय् निपाः ख्वाःपाः दुपि,
छिमिसं जितः थुकथं छाय् ज्वंकेत स्वयागु?

19 छिमिसं कर पुलेत तयातःगु धिबा जितः क्यँ सा।” इमिसं धिबा हयाः
वय्कःयात क्यन।

20 वय्कलं इमिके न्यनादिल — “थुकी सुयागु ख्वाः व नां कियातःगु दु?”

21 इमिसं “कैसरयागु” धकाः लिसः बिल।

अले वय्कलं धयादिल — “अय्सा कैसरयागु कैसरयात हे ब्यु, परमेश्वरयागु
परमेश्वरयात हे ब्यु।”

22 थ्व न्यनाः इपि छक्क जुल। अले वय्कःयात त्वःताः थथःगु लँय् वन।

सीपि म्वाना वइ ला कि वइ मखु?

मर्क १२:१८-२७; लूक २०:२७-४०

23 उखुन्हू हे सिनाः म्वाना वइगु खँय् विश्वास मयाइपि सदुकीतयसं वयाः
येशूयाके थथे धकाः न्यन —☆

24 “गुरुजु, सुं मनू मस्त मदय्कं सिनावन धाःसा वया हे किजां थः तताःजुयात
कलाः तयाः दाजुमह्यसिगु निति मस्त दय्केमाः धकाः मोशां च्वया थकूगु दु।”☆

☆ 22:13 २२:१३ मती ८:१२; २५:३०; लूक १३:२८ ☆ 22:23 २२:२३ प्रे २३:८ ☆ 22:24 २२:२४
व्य २५:५

25 धाय्, न्हय्म्ह दाजुकिजापिं दु। तःधिकःम्ह दाजुम्ह ब्याहा यानाः मस्त मदय्क् सिनावन। अले दातिम्ह किजां तताःजुम्हय्सित कलाः तल।

26 दातिम्ह नं मस्त मदय्क् हे सिनावन। थुकथं हे वयां क्वय्यापिं नं न्हय्म्हं सिनावन।

27 लिपा व मिसा नं सित।

28 आः धयादिसँ, सीपिं म्वाना वइबलय् व मिसा सुया कलाः जुइ? छायाधाःसा इपिं न्हय्म्हय्सिनं वयात कलाः तःगु दु।”

29 वय्कलं इमित धयादिल – “छिकपिन्सं टुंकाच्चन, छायाधाःसा छिकपिन्सं धर्मशास्त्रयागु खँ व परमेश्वरयागु शक्ति हे थुइकामदीनि।

30 सीपिं मनूत म्वाना वइबलय् इपिं स्वर्गदूत थें जुइ। सुयागुं ब्याहा नं जुइ मखु, सुयातं बिया नं छवइ मखु।

31 “सीपिं म्वाना वइगु खँय् परमेश्वरं धयादीगु खँ छिकपिन्सं ब्वनादियागु मदु ला?

32 ‘जि अब्राहामया, इसहाकया व याकूबया परमेश्वर खः।’ थुकियागु अर्थ वय्कः सीपिनि परमेश्वर मखु, बरु म्वाःपिनि परमेश्वर खः।”☆

33 वय्कःयागु खँ न्यनाः फुक्कं छक्क जुल।

दक्वसिबय् तःधंगु आज्ञा

मर्क १२:२८-३४; लूक १०:२५-२८

34 येशू सदुकीतय्त् नवाये मफय्क् लिसः बियादीगु खँ न्यनाः फरिसीत वय्कःयाथाय् वल।

35 इमिगु पुचलय् च्वंम्ह छम्ह शास्त्री वय्कःयात ज्वनेत थथे धकाः न्यन –☆

36 “गुरूजु, व्यवस्थाय् दकलय् तःधंगु आज्ञा छु खः?”

37 वय्कलं लिसः बियादिल – “परमप्रभु इी परमेश्वरयात दुनुगलंनिसें माया या, थःगु प्राण बियाः तकं माया या, अले थःगु मनंनिसें माया या।”☆

38 दकलय् तःधंगु व न्हापांगु आज्ञा थ्व हे खः।

39 निगूगु तःधंगु आज्ञा थ्व खः – थः जःलाखःलायात थःत थें माया या।”☆

40 व्यवस्था व अगमवक्तातय्सं स्यना थकूगु फुक्क खँ थ्व हे निगू आज्ञाया दुने लाः।”

☆ 22:32 २२:३२ प्रस ३:६ ☆ 22:35 २२:३५ लूक १०:२५-२८ ☆ 22:37 २२:३७ व्य ६:५

☆ 22:39 २२:३९ लेवी १९:१८

मुक्ति बीम्ह ख्रीष्ट सु खः?

मर्क १२:३५-३७; लूक २०:४१-४४

41 फरिसीत छथाय् मुनाच्चंबलय् येशू इमित थथे धकाः न्यनादिल –

42 “छिकपिन्सं स्वयेबलय् – मुक्ति बीम्ह ख्रीष्ट सु खः धयाच्चनादिया? व सुया काय् खः?”

“दाऊदया काय्” धकाः इमिसं लिसः बिल।

43 वय्कलं धयादिल – “अय्सा परमेश्वरयागु आत्मां दाऊदयात वय्कःयात ‘प्रभु’ धकाः छाया् धाय्कूगु लय्? दाऊदं थथे धाःगु दु –

44 “ ‘परमप्रभुं जिमि प्रभुयात धयादिल,
“छं शत्रुतय्त छंगु पालि तःले मततले
छ जिगु जवय् च्वाँ।” ’☆

45 “दाऊदं हे अथे वय्कःयात ‘प्रभु’ धकाः धाल धाःसा वय्कः गथे यानाः दाऊदया काय् जुइ फइ?”

46 थ्व खँयागु लिसः सुनानं बी मफुत। उखुन्हुनिसें वय्कःयाके सुनानं हे छुं हे न्यनेगु आँट याये मछाल।

23

शास्त्रीत व फरिसीत खनाः होश या

मर्क १२:३८-३९; लूक ११:४३, ४६; २०:४५-४७

1 येशू अन च्वाँपि ग्वाः ग्वाः मनूतय्त व चेलातय्त धयादिल –

2 “शास्त्रीत व फरिसीत मोशयागु व्यवस्था थुइका बीपिं मनूत खः।

3 उकिं छिमिसं इमिसं धाःथें या। अथेसां इमिसं याःयाः थें धाःसा याये मते, छाया्धाःसा इमिसं थःम्हं धाःथें याना मजू।

4 इमिसं मेपिन्त धाःसा इयातुगु इयातुगु कु क्वबिकी, थःपिन्सं धाःसा थी तक नं मखु।

5 “इमिसं न्हायागु ज्यां मनूतय्त क्यनेत जक याइ। इमिसं व्यवस्थायागु खँपुयात चिनाः गुलि फत तःधं यानाः थःगु लप्पाय् व कपालय् चिना जुइ। अले थःगु वसतय् ताःहाकय्क फुर्का तया जुइ।☆

6 भवजयन् न इपिं च्वय् च्वना जुइ। अले धर्मशास्त्र स्यनीगु छैय् इपिं न्ह्यःने च्वनेगु स्वइ।

7 बजारय् वनीबलय् मेपिन्सं ज्वजलपा याका जुइत स्वइ, अले इमि मनूतय्सं थःत 'गुरु' धाय्का जुइ मास्ति वः।

8 "छिपिं धाःसा थःत 'गुरु' धाय्का जुइ मते, छायाधाःसा छिपिं फुक्कं दाजुकिजापिं खः, छिमि छम्ह हे जक गुरु दु।

9 अथे हे छिपिं सुनानं थ्व पृथ्वीइ सुयातं 'बाः' धाये मते, छायाधाःसा छिमि छम्ह हे जक बाः स्वर्ग्य दी।

10 अथे हे छिपिं सुनानं थःत नायः धायेका जुइ मते, छायाधाःसा छिमि छम्ह हे जक नायः ख्रीष्ट दु।

11 छिमिगु पुचलय् दक्वसिबय् तःधंम्ह सु खः, व छिमि फुक्कसियां च्यः जुइमाः।[☆]

12 सुनां थःत थःम्हं तःधंकी व चिधंनी। अले सुनां थःत थःम्हं चिधं ताय्की व तःधंनी।"[☆]

निपाः ख्वाःपाः दुपिन्त ब्वः बियादीगु

मर्क १२:४०; लूक ११:३९-५२; २०:४७

13 "शास्त्रीत व फरिसीत, छिमित धिक्कार दु। छिपिं निपाः ख्वाःपाः दुपिं खः, छायाधाःसा छिमिसं मनूतय्त दुहां वने हे मफय्क स्वर्गया राज्ययागु लुखा तिनाब्यूगु दु। छिपिं न थःपिं हे दुहां वनी, न दुहां वनीपिन्त हे दुछवइ।

14 शास्त्रीत व फरिसीत, छिमित धिक्कार दु। छिपिं निपाः ख्वाःपाः दुपिं खः, छायाधाःसा छिमिसं भाःत मदुपिं मिसातय्गु छै लुतय् यानाच्वंगु दु। अयन् छिमिसं मनूतय्त क्यनेत ताःहाकय्क प्रार्थना याना जुइ। उकिं छिमित मेपिन्त स्वयाः अप्वः सजाँय बी।

15 "शास्त्रीत व फरिसीत, छिमित धिक्कार दु। छिपिं निपाः ख्वाःपाः दुपिं खः, छायाधाःसा छिपिं छम्ह मनूयात यहदी यायेत समुद्रं समुद्रं जुयाः दे दे चाःहिला जुइ। अले सुं मनू यहदी जुल धाःसा छिमिसं वयात थः स्वयाः निदुगं अप्वः नरकय् लाकी।

16 "अय् कांपिं न्ह्यलुवाःत, छिमित धिक्कार दु। छिमिसं देगः थियाः पाफयां छुं जुइ मखु, देगःयागु लुँ थियाः पाफसा जक खँ क्वःजी धकाः स्यना जुल।

17 अय् मूर्ख व कांत, लुँ तःधं ला कि लुँयात च्वख याइगु देगः तःधं?

☆ 23:11 २३:११ मती २०:२६-२७; मर्क १:३५; लूक २२:२६

☆ 23:12 २३:१२ लूक १४:११; १८:१४

18 हानं छिमिसं बलि बीगु थाय् थियाः पाफयां छुं जुइ मखु, अन छायातःगु थियाः पाफसा जक खँ क्वःजी धकाः स्यना जुल।

19 अय् कांपि मनूत, छायेहःगु तःधं ला कि छायेहःगु च्वख याइगु बलि बीगु थाय् तःधं?

20 बलि बीगु थाय् थियाः पाफम्हय्सिनं अन दुगुनापं फक्क थियाः पाफःगु जुइ।

21 अथे हे देगः थियाः पाफम्हय्सिनं देगल्य् च्वम्ह परमेश्वरयात थियाः पाफःगु जुइ।

22 स्वर्गयागु नामय् पाफम्हय्सिनं स्वर्गयागु सिंहासन व थुकी च्वनादीम्ह परमेश्वरयागु नामय् पाफःगु जुइ।☆

23 “शास्त्री व फरिसीत, छिमित धिक्कार दु। छिपि निपाः ख्वाःपाः दुपि खः, छायाधाःसा छिमिसं नवःघॉय्, सौप व जीया झिब्वय् छब्व परमेश्वरयात छाये हइ। अथेसां छिमिसं न्याय, दया व विश्वास थें ज्याःगु व्यवस्थाया मू खँय् च्यूताः मतः। छिमिसं थ्व नं मत्वःते माःगु खः।☆

24 अय् कांपि न्ह्यलुवाःत, छिमिसं झाःपत्तियात लिकयाः वांछवइ। उँटयात धाःसा नुना हे छवइ।

25 “शास्त्री व फरिसीत, छिमित धिक्कार दु। छिपि निपाः ख्वाःपाः दुपि खः, छायाधाःसा छिमिसं थःपिन्त पिने पिने जक भु व ख्वला सिले थें यचुका जुइ। दुने धाःसा छिमिसं लाक्व पाक्व यायेगु, कर्पिन्त लुतय् यायेगु याना जुइ।

26 अय् कांपि फरिसीत, न्हापां भु व ख्वलाया दुने नि बांलाक स्यू। अले तिनि पिने नं यचुकी।

27 “शास्त्री व फरिसीत, छिमित धिक्कार दु। छिपि निपाः ख्वाःपाः दुपि खः, छायाधाःसा छिपि पिने ला सख्वाः पानातःगु चिहान थें बांलाः। दुने धाःसा छिपि ध्वगीगु कँलाय् व नवःगुलि जक जाः।☆

28 अथे हे पिने छिपि धर्मी जुया जुइ, दुने धाःसा छिमिसं मभिगु ज्याखँ व अत्याचार यानाच्च्वंगु दु।”

लिपा शास्त्रीत व फरिसीतय्त सजॉय जुइ
लूक ११:४७-५१

☆ 23:22 २३:२२ यशै ६६:१; मती ५:३४

☆ 23:23 २३:२३ लेवी २७:३०

☆ 23:27 २३:२७ प्रे

29 “शास्त्री व फरिसीत, छिमित धिक्कार दु। छिपिं निपाः ख्वाःपाः दुपिं खः, छायाधाःसा छिमिसं अगमवत्कातय्गु चिहान बाबांलाक दय्की। अले धर्मीं मनूतय्गु चिहानयात समाः याना तइ।

30 अले धयाज्जुइ – ‘जिमि तापाःबाज्यापिनिगु पालय् जिपिं दुगु जूसा इमिसं थें जिमिसं अगमवत्कातयत् स्याये मखुगु।’

31 “छिमिसं थुकथं ‘जिपिं अगमवत्कातयत् स्याःपिनि सन्तान खः’ धकाः थःपिन्सं हे साक्षी बिल।

32 आः छिमिसं हे छिमि तापाःबाज्यापिन्सं छुनाः त्वःतातःगु पापयागु ज्या पूर्वकि।

33 अय् सर्पत, अय् बिख दुम्ह सर्पया सन्तान, छिपिं गुकथं नरकयागु मिं बचय् जुइ फइ?*

34 “उकिं जिं अगमवत्कात, बुद्धिमानत व शास्त्रीतयत् छिमिथाय् छवयाहये। थुपिं गुलिसितं ला छिमिसं स्याइ, गुलिसितं कूसय् यख्खाइ, गुलिसितं धर्मशास्त्र स्यनीगु छेंय यनाः कोर्रां दाइ, गुलिसितं थाय् थासय् वनाः हे दुःखकष्ट बी।

35 छिमिसं पृथ्वीइ दोष मदय्कं स्याःपिं फुक्कसिगु हियागु दोष छिमित लाइ। धर्मींम्ह हाबिलानिसें बेरेक्याहया काय् जकरिया तक, गुम्हय्सित छिमिसं देगः व होमबलिया वेदीया दथुइ स्याःगु खः।*

36 जिं छिमित खःगु खँ धाये – थ्व फुक्क सजाँय आःयापिं मनूतय्सं हे फयेमाली।”

यरूशलेम खनाः नुगः मछिकादीगु

लूक १३:३४-३५

37 “हे यरूशलेमय् च्वपिं मनूत, छिमिसं अगमवत्कातयत् स्याना छवल, अले परमेश्वरं छवयाहयादीपिं दूततयत् ल्वहँतं कय्का छवल। जिं छिमित माखां थः खाचातयत् त्वपुया तः थें गुलि बचय् यायेत स्वये धुन। अयन् छिपिं मानय् मजू।

38 आवनिसें छिमिगु छें छिमित हे त्वःताथके।*

39 जिं छिमित धाये – आवलिं छिमिसं प्रभुया नामं झाःम्हय्सित तःमधंकुतले जितः खनी मखु।”*

* 23:33 २३:३३ मती ३:७; १२:३४; लूक ३:७ * 23:35 २३:३५ उत ४:८; २ इति २४:२०-२१

* 23:38 २३:३८ यर २२:५ * 23:39 २३:३९ भज ११८:२६

24

दुःखकष्ट जुइतिनिगु खँ

मर्क १३:१-१३; लूक २१:५-१९

1 येशू देगलं पिहां वया: अनं झायेत्यंबलय् चेलातयूसं वय्कःया सन्तीक वया: अन च्वंगु देगःत क्यन।

2 अले वय्कलं धयादिल – “बांलाक स्वयाचवँ। जिं छिमित खःगु खँ धाये – थ्व फुक्क दुना वना: ल्वहं छगः नं दइ मखुत।”

3 येशू जैतून डाँडाय् फ्यतुना च्वनादीबलय् चेलातयूसं सुतुक्क वया: धाल – “छिं धयादी थें गुबलय् जुइ? अले छि झायादीगु व संसार नाश जुया वनीगु खँ जिमिसं गथे याना सीकेगु?”

4 वय्कलं धयादिल – “होशयानाचवँ, सुनानं छिमिगु मिखाय् धुलं छवाके मफयेमा।

5 छायाधा:सा यक्व हे मनूतयूसं वया: – ‘जि मुक्ति बीम्ह खीष्ट खः’ धका: छिमिगु मिखाय् धुलं छवाकेत स्वइ।

6 छिमिसं जवंखवं तसकं ल्वापु जूगु व ल्वापुया सः ताइ। अयसां छिपि ग्याये मते, छायाधा:सा थथे ला जुइ हे माः। अयनं थथे जुइवं तुं संसार नाश जुयावनी मखु।

7 देश देशयापिनि दथुइ ल्वापु जुइ। राज्य राज्यया दथुइ ल्वापु जुइ। थाय् थासय् अनिकाल जुइ, अले भ्वखाय् ब्वइ।

8 थ्व ला दुःखकष्टयागु छुमां जक खः।”

9 “उबलय् मनूतयूसं छिमित ज्वना: सजाँय बीकी, अले छिमित स्यानाछवइ। थथे जिगु नामं याना: छिमित सकसिनं हेला याइ।☆

10 उबलय् तःम्हयूसिनं हे जितः विश्वास यायेगु त्वःताछवइ। छम्हं मेम्हयूसित धोखा बी, थःथवय् हेला याना जुइ।

11 अले फताहा अगमवक्तात यक्वसिनं वया: तःम्हयूसित हे इंगःलाना थकी।

12 प्यखें मभिंगु मभिंगु ज्याखँ जक अप्वः जुया वइ, अले मनूतयूसं माया यायेगु नं त्वःताछवइ।

13 लिपा तक क्वातुक विश्वास याना: सह यानाच्वंम्ह धा:सा बचय् जुइ।☆

14 परमेश्वरयागु राज्ययागु भिंगु खँ संसारय् न्यंकभनं न्यंके धुंका: थ्व संसार नाश जुयावनी।”

यस्शलेम नाश जुइतिनि

मर्क १३:१४-२३; लूक २१:२०-२४

15 “अगमवक्ता दानिएलं पवित्रगु थासय् घच्चायापुगु व ग्यानापुगु ज्या जुइ धयाथकूगु खँ छिमिसं स्वये दइ।” (थ्व खँ ब्वंम्हयसिनं थुइमा)☆

16 “उबलय् यहूदियाय् च्वनाच्च्वंपि पहाडय् बिस्सुं वनेमाली।

17 कःसिइ च्वनाच्च्वंपिन्सं थःगु मालसामान कायेत तकं क्वहां वने लाइ मखु।

18 बुँइ ज्या याना च्वंपिन्सं थःगु वसः कायेत तकं छँ वने लाइ मखु।☆

19 प्वाथय् दुपि व दुस्त्वंम्ह मचा दुपि मिसातय्त तसकं सास्ती जुइ।

20 चिकुलाबलय् व विश्रामबार खुन्हु थथे मजुइमा धकाः परमेश्वरयात प्रार्थना याना च्वं।

21 उबलय् तसकं सास्ती जुइ। सृष्टि जूबलय् निसैं आः तकं थपाय्सकं सास्ती जूगु मदुनि। अले लिपा नं गुब्सं जुइ मखु।☆

22 परमेश्वरं व ईयात चिहाकयका मदीसा सुं हे बचय् जुइ मखु। वयकलं थःम्हं ल्ययातःपिं मनूतय्गु निति व ईयात चिहाकयकादी।”

23 “उबलय् सुनानं ‘मुक्ति बीम्ह ख्रीष्ट थन दु, अन दु’ धकाः धाल धायेवं छिमिसं पत्याः याये मते।

24 छायाधाःसा उबलय् फताहा ख्रीष्टत व फताहा अगमवक्तात खनेदयकः वइ। इमिसं फतिफतले परमेश्वरं ल्ययातःपिं मनूतय्त झंगःलायेत ततःधंगु चिं व अजू चायापुगु ज्या यानाक्यनी।

25 स्व, थथे जुइतिनि धकाः जिं छिमित न्हापां हे धयाबियागु दु।”

26 “मनूतय्सं छिमित ‘मुक्ति बीम्ह ख्रीष्ट मरुभूमिइ झायाच्च्वंगु दु’ धकाः धाः वःसां छिपिं अन वने मते। इमिसं ‘वयकः ला क्वथाय् दुने दु’ धकाः धाःसां छिमिसं पत्याः याये मते।

27 छायाधाःसा पुर्बय् हावलासा त्वइबलय् पच्छिमय् थयंक खने दइ थें मनूया काय् वइबलय् नं फुककसिनं खनी।☆

28 गन सीम्ह दु अन गिद्ध नं मुं वइ।”☆

मनूया काय् झाइबलय् थथे जुइ

मर्क १३:२४-२७; लूक २१:२५-२८

☆ 24:15 २४:१५ दान १:२७; ११:३१; १२:११ ☆ 24:18 २४:१७-१८ लूक १७:३१ ☆ 24:21

२४:२१ दान १:२१; प्रका ७:१४ ☆ 24:27 २४:२६-२७ लूक १७:२३-२४ ☆ 24:28 २४:२८ लूक १७:३७

29 “थथे दुःखकष्ट जुइ धुनेवं

“ ‘सूर्यं खिउँया वनी,
तिमिला बुलुयावनी,
अले आकाशय् च्वंगु नगुत
कुतुं वनी,
थथे आकाशय् च्वंगु
शक्ति खाइ।’ ☆

30 “थुलि जुइ धुंकाः आकाशय् मनूया काय् वइगु चिं खने दइ। अले मनूया काय्यात तःधंगु शक्ति ज्वनाः झःझः धायक सुपाँचय् वयाच्चंगु खनी। थ्व खनाः संसारय् च्वंपिं फुक्क कुलयापिं मनूत हँय्हँय् ख्वइ। ☆

31 अले तुरहीया सःलिसें मनूया काय् नं स्वर्गदूततय्त पृथ्वीया प्यखें छवइ। इमिसं परमेश्वरं ल्ययातःपिन्त मुंका हइ।

यःमरिमायागु उखान

मर्क १३:२८-३१; लूक २१:२९-३३

32 “यःमरिमापाखें छिमिसं छता खँ सीकि। थुकी चुलि जायावल कि वर्षा वल धकाः छिमिसं सीका काइ।

33 थुकथं जिं धया थें जुयावल कि छिमिसं मनूया काय् वइन धकाः सीकि।

34 जिं छिमित खःगु खँ धाये – आःयापिं मनूत सिनावने न्ह्यः हे जिं धया थें जुइ।

35 आकाश व पृथ्वी मदयावनी, अय् नं जिगु वचन मदयावनी मखु।

थथे गुबलय् जुइ धकाः सुनानं सी मखु

मर्क १३:३२-३७; लूक १७:२६-३०; १७:३४-३६

36 “थथे गुबलय्, अले गुखुन्हु जुइ धकाः सुनानं मस्यु। स्वर्गय् च्वंपिं स्वर्गदूततय्सं व परमेश्वरया काय् नं थ्व खँ मस्यु। परमेश्वर बाःनं जक स्यु।

37 “नोआयागु पालय् गथे जूगु खः मनूया काय् वइबलय् नं अथे हे जुइ। ☆

38 लखं जाये न्ह्यः तकं मनूतय्सं नयेत्वने यानाच्चन, ब्याहा यायेगु व बिया छवयेगु यानाच्चन। नोआ लःजहाजय् मर्चतले इमिसं थथे यानाच्चन।

☆ 24:29 २४:२९ यशै १३:१०; ३४:४; इज ३२:७; योए २:१०-३१; ३:१५; प्रका ६:१२-१३ ☆ 24:30 २४:३० दान ७:१३; जक १२:१०-१४; प्रका १:७ ☆ 24:37 २४:३७ उत ६:५-८

39 लखं चुइके मयंतले ला इमिसं छुं हे बिचाः मयाः। मनूया काय् वइबलय् नं अथे हे जुइ।☆

40 “बुँइ ज्या यानाच्च्वंपि निम्ह मनूत मध्ये छम्हयसित यंकी, मेम्हयसित त्वःताथकी।

41 घः क्यला च्वंपि निम्ह मिसात मध्ये छम्हयसित यंकी, मेम्हयसित त्वःताथकी।

42 “उकि होशयानाच्च्वं, छायाधाःसा छिमिसं छिमि प्रभु गुबलय् वइ धकाः मस्यु।

43 छिमिसं सि हे स्यू – थःगु छँय् खँ वइगु खँ सिल कि छँ थुवाः चच्चिं मधंसे पियाच्च्वनी। अले खुं खुया यने फइ मखु।

44 उकि छिमिसं नं होशयानाच्च्वं, छायाधाःसा छिमिसं मतिइ हे मतःबलय् मनूया काय् वइ।☆

भिंम्ह व मभिंम्ह च्यः

लूक १२:४१-४८

45 “भिंम्ह व विश्वास याये बहःम्ह च्यः सु जुइ? सुयात वया मालिकं मेपिं च्यःतय्त ठीक ठीक इलय् नके त्वंकेगु ज्या बियाः इमि नायः याना तइ, व हे जुइ।

46 वं अथे ज्या यानाच्च्वंगु खनाः मालिकं वयात गुलि स्याबास बी।

47 जिं छिमित खःगु खँ धाये – वया मालिकं वयात थःगु सर्बय तंके लःल्हाना तइ।

48 मभिंम्ह जुल धाःसा वं – ‘जिमि मालिक तःन्हु लिपातिनि वइ’ धकाः मतिइ तयाः

49 अय्लाःगुलुत नाप नयेत्वने यानाः मेपिं च्यःतय्त दाया जुइ।

50 छन्हु वं मतिइ हे मखंबलय् वया मालिकं आकाझाकां थ्यंकः वयाः

51 वयात स्यानाः निपाः ख्वाःपाः दुपिं च्वनी थाय् वांछवइ। अन हे इपिं ख्व जक ख्वयाः वा न्ह्यायाः च्वनेमाली।

25

झिम्ह ल्यासेतयगु उखान

1 “स्वर्गयागु राज्य थथे च्वं। झिम्ह ल्यासेत जिलाजं नापलायेत थथःगु मत ज्वनावन।☆

2 थुपिं झिम्हय न्याम्ह ज्ञां दुपिं व न्याम्ह ज्ञां मदुपिं लानाच्च्वन।

3 ज्ञां मदुपिं न्याम्हयसिनं मत ला च्याका यंकल, चिकं धाःसा ज्वना मवं।

4 ज्ञां दुपिं न्याम्हयसिनं मत च्याकाः यंकल, अले थथःगु थलय् चिकं नं ज्वनावन।

5 जिलाजं वये लिबाकूगुलि इमि न्ह्यः वल।

6 “बाचा जाःबलय् इमिसं ‘जिलाजं थयंकः वल, नापालाः वा’ धकाः धयाहःगु सः ताल।

7 “इपिं झिम्हयसिनं दनाः थथःगु मत मिलय् यात।

8 ज्ञां मदुपिन्सं ज्ञां दुपिन्त धाल ‘जिमित चिकं भतिचा ब्यु लय्, जिमिगु मत सीन।’

9 “ज्ञां दुपिन्सं धाल – ‘जिमित हे मगाः, बरु पसलय् वनाः न्याना हजि लय्।’

10 “इपिं चिकं न्याः वनाच्चवंबलय् हे जिलाजं थयंकः वल। मत च्याका च्वंपि न्याम्ह ल्यासेतयत् जिलाजं नाप ब्याहा भवजय् दूत यंकल। अले लुखा तिनाबिल।

11 भचा जायकाः ज्ञां मदुपिन्सं थयंकः वयाः थथे हाल – ‘प्रभु, प्रभु, जिमित नं दुकयादिसँ।’✧

12 “जिलाजनं धाःसा ‘जिं छिमित म्हमस्यु’ धकाः लिसः बिल।

13 “उकिं छिपि नं होशयानाच्वेँ, छायाधाःसा मनूया काय् गुबलय्, गुखुन्हु वइ धकाः छिमिसं मस्यु।

स्वम्ह च्यःतयगु उखान

लूक १९:११-२७

14 “स्वर्गयागु राज्य थथे च्वं। छम्ह परदेशय् वनेत्यंम्ह मनुखं थः च्यःतयत् सःताः थःगु फुकक सम्पति इमित त्वःताथकल।

15 वं इमिसं फक्व छम्हयसित न्यागू लाख, छम्हयसित निगू लाख व छम्हयसित छगू लाख जिम्मा बियाः परदेशय् वन।

16 “न्यागू लाख दां काःम्ह च्यलं व धिबां ब्यापार यानाः मेगु न्यागू लाख मुंकल।

17 अथे हे निगू लाख काःम्ह च्यलं नं व दामं ब्यापार यानाः मेगु निगू लाख दां मुंकल।

18 छगू लाख दां काःम्ह च्यलं धाःसा व दां गालय् स्वथना तल।

19 “तःदेँ लिपा इमि मालिक लिहां वल। अले इमिके थःगु ल्याःचाः फ्वन।

20 न्यागू लाख कयातःम्ह च्यलं मेगु न्यागू लाख दां तनाः थथे धाल – ‘छिं बिया थकूगु न्यागू लाख दामं जिं मेगु न्यागू लाख दां मुंकागु दु।’

21 “मालिकं वयात धाल – ‘स्याबास, छ भिंम्ह विश्वास याये बहःम्ह खः। चिधंगु खँय हे छ विश्वास याये बहःम्ह जुल। उकिं जिं आः छन्त अज्जं यक्व खँय जिम्मा बिया थके। छ नं जिनापं लयताया च्वँ।’

22 “अले निगू लाख दां काःम्ह च्यलं वयाः थथे धाल – ‘छिं बिया थकूगु निगू लाख दामं जिं मेगु निगू लाख दां मुंकागु दु।’

23 “मालिकं वयात धाल – ‘स्याबास, छ भिंम्ह व विश्वास याये बहःम्ह खः। चिधंगु खँय हे छ विश्वास याये बहःम्ह जुल। उकिं जिं आः छन्त अज्जं यक्व खँय जिम्मा बिया थके। छ नं जि नाप लयताया च्वँ।’

24 “अले छगू लाख दां काःम्ह च्यलं वयाः थथे धाल – ‘छि तसकं हारांम्ह व थःम्हं पि हे मप्यगु नं लइम्ह, अले हला हे मतःगु नं काइम्ह जूगुलि ग्यानाः

25 छिं बियादीगु धिबा गालय् स्वथना तया। छिगु धिबा कयादिसँ।’

26 “मालिकं वयात धाल – ‘छ ला छप्ति हे ज्यालगय् मजूम्ह व अल्ल्हीम्ह मनु जुयाच्वन। जि पिया मतःथाय् च्वंगु नं लइम्ह, अले हला मतःथाय् च्वंगु नं काइम्ह धकाः सीक सीकं

27 छं जिगु धिबा ब्याज वइकथं सराफितयथाय् तयातये म्वाः ला? अले जिं ब्याजनापं थःगु धिबा काये दइगु मखु ला?’

28 “थ्वयाके च्वंगु दां कयाः झिगू लाख दां दुम्हयसित ब्यु।

29 दुम्हयसित अज्जं तनाबी, अले वयाके इन यक्व दइ। मदुम्हयसिके दुगु नं लाका काइ।✠

30 थ्व ज्यालगय् मजूम्ह च्यःयात धाःसा पिने खिउँथाय् वांछवये यकि। अन हे थ्व ख्व जक ख्वयाः वा न्ह्यायाच्वनी।”✠

फै व च्वले

31 “मनूया काय् स्वर्गदूतत नाप जुजु जुयाः वइ अले थःगु सिंहासनय् च्वनी।✠

32 वया न्ह्यःने फुकक जात जातियापि मनूत दं वइ। जवालं फै व च्वले ल्यये थें वं नं मनूतयत ल्यइ।

33 वं फैचातयत जव ल्हाःपाखे व च्वलेचातयत खव ल्हाःपाखे तइ।

34 “अले जुजु थःगु जवय् च्वंपिन्त थथे धाइ – ‘जिमि बाःनं आशिष बियातःपि मनूत छिपि हे खः। वा, संसार सृष्टि मजूनिबलय् निसँ छिमित बी धकाः तयातःगु राज्यय् आः छिमिसं हे अधिकार या।

✠ 25:29 २५:२९ मती १३:१२; मर्क ४:२५; लूक ८:१८ ✠ 25:30 २५:३० मती ८:१२; २२:१३; लूक १३:२८ ✠ 25:31 २५:३१ मती १६:२७; १९:२८

35 छायाधाःसा जि नयेमखंबलय् छिमिसं जितः नकल, प्याःचाःबलय् त्वंकल, अले जि वयाबलय् छिमिसं जितः म्हमसीकं थःथाय् दुकाल।

36 पुनेगु मदुबलय् छिमिसं जितः वसः बिल, उसाँय् मदुबलय् सुसाःकुसाः यात, इयालखानाय् लाःबलय् स्वः वल।’

37 “परमेश्वरं धयादी थें याना च्वंपिन्सं थथे लिसः बी – ‘प्रभु, छिं गुबलय् नयेमखंगु दु धकाः जिमिसं नकागु दु? अले गुबलय् प्याःचाःगु दु धकाः जिमिसं त्वंकाःगु दु?’

38 छिं गुबलय् जिमिथाय् झाःगु दु धकाः जिमिसं म्हमसीकं दुकया? अले छिं गुबलय् पुने मखंगु दु धकाः जिमिसं वसः बिया?

39 छिं गुबलय् उसाँय् मन्त धकाः जिमिसं सुसाःकुसाः याना, अले छिं गुबलय् इयालखानाय् लात धकाः जिमिसं स्वः वया?’

40 “अले जुजुं इमित थथे लिसः बी – ‘जिं छिमित खःगु खँ धाये – दक्वसिबय् चीधिकःम्ह किजायात छिमिसं छु याइ, व जितः हे याःगु जुइ।’

41 “अले वं थःगु खव लहाःपाखे च्वंपिन्त थथे धाइ – ‘सराः बियातःपिं, छिपि जिथाय् वये मते। शैतान व वया दूततयत् धकाः च्याकातःगु गुबले मसीगु मिइ क्वब्बाः हँ।

42 जि नयेमखंबलय् छिमिसं जितः मनकू, प्याःचाःबलय् छिमिसं जितः लः मत्वंकू,

43 जि वयाबलय् छिमिसं जितः दुमकाः, पुनेगु मदुबलय् वसः मब्यु, उसाँय् मदुबलय् व इयालखानाय् लाःबलय् स्वः मवः।’

44 “इमिसं नं थथे धकाः लिसः बी – ‘प्रभु, जिमिसं गुबलय् छितः नयेमखंगु, प्याःचाःगु, जिमिथाय् झाःगु, पुने मखंगु, उसाँय् मदुगु व इयालखानाय् लाःगु खना धकाः? अले जिमिसं छिगु सुसाःकुसाः यायेमाःगु हे गुबलय् दु धकाः?’

45 “अले जुजुं इमित थथे धाइ – ‘जिं छिमित खःगु खँ धाये – दक्वसिबय् क्वह्यांम्हयसित छिमिसं छु मयाःगु हे जितः मयाःगु खः।’

46 “थुमित सदां सास्ती बिया तइ। अले परमेश्वरं धयादी थें यानाच्वंपिन्त जक अनन्त जीवन दइ।”☆

26

येशूयात स्यायेत ग्वसाः ग्वःगु

मर्क १४:१-२; लूक २२:१-२; यूह ११:४५-५३

1 थथे स्यनेकने यानादी धुंकाः येशू चेलातयत धयादिल —

2 “निन्दु लिपा छुत्काराया नखः वइ धकाः ला छिमिसं सि हे स्यू। उबलय् मनूया काययात ज्वनाः क्रूसय् यख्खायाः स्यायेत लःल्हानाबी।”☆

3 उबलय् हे तःधंपि पुजाहारीत व थकालिपि कैयाफा धाःम्ह दकलय् तःधंम्ह पुजाहारीया छैय् मुन।

4 अले इमिसं वय्कःयात गथे यानाः ज्वनाः स्यायेगु धकाः ग्वसाः ग्वल।

5 “नखःबलय् ज्वने धाःसा तसकं हल्लाखल्ला जुइ” धकाः इमिसं धाल।

बेथानियाय् येशूयात चिकनं लूगु

मर्क १४:३-९; यूह १२:१-८

6 येशू बेथानियाय् सिमोन कोहियागु छैय् दीबलय्

7 छम्ह मिसा दुस्तुल्हं थलय् तसकं थिकेगु व नस्वाःगु चिकं ज्वनाः वल। अले नयेत्यंबलय् व मिसां वय्कःयागु छेनय् फुक्कं लुनाबिल।☆

8 थ्व खनाः चेलातयसं तं पिकयाः वयात धाल — “थुलिमछि चिकं छाया सितिं छ्वयागु?

9 थ्व चिकं म्यूगु जूसा उकिं वःगु धिबा नये मखंपिन्त इनाब्यूगु जूसा ज्यूगु नि।”

10 इमिसं थथे धाःगु न्यनाः वय्कलं धयादिल — “छिमिसं थ्व मिसायात छाया दुःख बियाच्चनागु? वं जितः बांलाःगु हे यात।

11 नये मखंपिं ला छिपिनाप न्हाबले दयाच्चनी। जि न्हाबले दइ मखु।☆

12 थथे चिकनं लुनाः वं जिगु म्हायात थुनेत ठीक याःगु खः।

13 जिं छिमित खःगु खँ धाये — गन गन भिंगु खँ न्यंकी, अन अन थ्व मिसां याःगु थ्व खँ नं लुमंकेत न्यंकी।”

यहदां येशूयात ज्वंकेत स्वःगु

मर्क १४:१०-११; लूक २२:३-६

14 झिनिम्ह चेलात मध्ये यहदा इस्करियोत धाःम्ह चेलां तःधंपि पुजाहारीतयथाय् वनाः

15 थथे धाल – “येश्यात ज्वंका बिल धाःसा जितः छु बी?” अले इमिसं वयात स्विगः वहःयागु म्वहः बिल।✧

16 उबलय् निसें वं येश्यात ज्वंका छवयेत सनाच्चन।

चेलात नाप छुत्कारायागु नखः हनादीगु

मर्क १४:१२-२१; लूक २२:७-२३; यूह १३:२१-३०

17 सोडा मतःगु मरि नयेगु नखःयागु न्हापां खुन्हू चेलातयसं वयाः वय्कःयाके – “गन वनाः छुत्काराया नखःयात ज्वरय् याः वने?” धकाः न्यन।

18 वय्कलं धयादिल – “शहरय् सुं छम्ह मनूयागु छैय् वनाः थथे धा – “जिमि गुं वय्कःयागु ई त्यल हं। चेलातनापं वय्कलं छिगु छैय् वयाः छुत्काराया नखः हनेगु हं।”

19 चेलातयसं वनाः वय्कलं धयादी थें यात। अले अन हे छुत्काराया नखःया भव्य ज्वरय् यात।

20 बहनी वय्कः झिनिम्ह चेलात नाप नयेत फ्यतुनादिल।

21 नयाच्चंबलय् वय्कलं धयादिल – “जिं छिमित खःगु खं धाये – छिपिं मध्ये हे छम्हय्सिनं जितः धोखा बी।”

22 थ्व न्यनाः इमिसं तसकं नुगः मछिंकल। अले छम्ह छम्हय्सिनं थथे धाल – “छिं जितः हे धयादियागु ला मखु ला प्रभु?”

23 वय्कलं धयादिल – “जि नाप ख्वलाय् मरि थुनीम्हय्सिनं जितः धोखा बी।✧

24 धर्मशास्त्रय् च्वया तः थें मनूया काय् ला सिनावने हे माः। अयनं वयात ज्वंका छवइम्ह मनूयात तसकं तसकं हे धिक्कार दु। व बु हे मबूगु जूसा तसकं बांलाइगु खः।”

25 वय्कःयात ज्वंकीम्ह यहदां नं न्यन – “छिं जितः हे धयादियागु ला मखु ला प्रभु?”

अले वय्कलं धयादिल – “खः, छं थःम्हं हे धाल।”

प्रभु भव्य

मर्क १४:२२-२६; लूक २२:१४-२३; १ कोर ११:२३-३०

26 नयाच्चंबलय् येशू मरि कयाः परमेश्वरयात सुभाय् बियाः कुचा कुचा थलादिल। अले चेलातयत् इनाः थथे धयादिल – “थ्व मरि कयाः ना। थ्व जिगु म्ह खः।”

27 अथे हे ख्वला नं कया: परमेश्वरयात सुभाय् बिया: वय्कलं थथे धया: ख्वला बियादिल -

28 “थ्व न्ह्गु बाचायागु जिगु हि ख:। थ्व हे हिं यक्वसिगु पाप क्षमा जुइ।”☆

29 जिं छिमित धाये - जिमि बा:यागु राज्य् न्ह्पिं जूपिं छिपिनाप दाखमघ मत्वंतले जिं आवंनिसें थ्व दाखमघ त्वने मखुत।”

30 अले छपु भजन हाले धुंका: वय्क:पिं जैतून डाँडाय् झाल।

पन्नुसं येशूयात म्हमस्यू धका: धाइ

मर्क १४:२७-३१; लूक २२:३१-३४; यूह १३:३६-३८

31 अले येशू इमित धयादिल - “थौं चान्हय् छिपिं फुक्कं जित: त्व:ता: बिस्युं वनी। धर्मशास्त्रय् नं थथे च्वयात:गु दु -

“ जिं फैजवा:यात स्यानाबी,

अले फैचात

उखेला: थुखेला: जुइ।”☆

32 “अयुं जि हानं म्वाना वया: छिपिं स्वया: न्हापा हे गालील्य् थ्यंक: वने।”☆

33 पन्नुसं वय्क:यात धाल - “फुक्कसिनं त्व:ता वंसां जिं ला छित: गुब्सं हे त्व:ते मखु।”

34 वय्कलं धयादिल - “जिं छन्त ख:गु खँ धाये - थौं चान्हय् खा हाले न्ह्य: छं जित: स्वक: तक म्हमस्यू धका: धाइ।”

35 अयुं “छिनाप सी हे मा:सां जिं छित: म्हमस्यू धका: धाये मखु” धका: पन्नुसं धाल। फुक्क चेलातयुसं नं अथे हे धाल।

गेतसमनिइ प्रार्थना यानादीगु

मर्क १४:३२-४२; लूक २२:३१-४६

36 वय्क: चेलात नाप गेतसमनी धा:थाय् झाल। वय्कलं इमित धयादिल - “छिपिं थन हे च्वनाच्चँ। जि उखे वना: प्रार्थना याये।”

37 वय्कलं पन्नुस व जब्दिया निम्ह काय्पिन्त धा:सानापं व्वना यंकादिल। उबलय् वय्कलं तसकं हे नुग: मछिंका: दिक्क जुयादिल।

38 वयकलं इमित धयादिल – “नुगः मछिनाः जिगु छाति हे तज्याइ थें च्वनाच्वन। छिपि मघंसे थन हे च्वनाच्वँ।”

39 अले भचा उखे झायाः बँय् क्वपुसां पुयाः थथे धकाः प्रार्थना यानादिल – “बाः, ज्युसा थ्व दुःखयागु ख्वला जिथासं चीकादिसँ। अयनं जितः यःथें यानादी मते, छितः यःथें हे यानादिसँ।”

40 अले वयकः स्वम्ह चेलात च्वनाच्वंथाय् झाल। इपि न्ह्यलं ब्वानाच्वंगु खनाः वयकलं पनुसयात धयादिल – “छिपि जि नाप घौछि हे नं मघंसे च्वने मफु ला?

41 मघंसे प्रार्थना याना च्वँ, मखुसा छिपि जाँचय् लाइ। आत्मा ला न्ह्यचिलाच्वंगु दु, म्ह जक बमलाः।”

42 अनं वनाः वयकलं हानं प्रार्थना यानादिल – “बाः, जिं थ्व दुःखयागु ख्वलां मत्वसे मगाः धयागु जूसा, छितः यःथें हे जुइमा।”

43 वयकः झाःबलय् इपि हानं न्ह्यलं तुं ब्वानाच्वन। इमिसं न्ह्यः पी हे मफया च्वन।

44 वयकः हानं इमित त्वःताः झाल। अले अथे हे धयाः प्रार्थना यानादिल। थ्वनापं वयकलं स्वकः प्रार्थना यानादी धुंकल।

45 अले वयकलं इमिथाय् झायाः धयादिल – “छिपि आः तक घना च्वनातिनि ला? मनूया काय्यात पापीतय्सं ज्वनीगु ई वये धुंकल।

46 दें, वनेनु। स्व, जितः ज्वंकीम्ह मनू नं न्ह्यःने थ्यने धुंकल।”

येशूयात ज्वंगु

मर्क १४:४३-५०; लूक २२:४७-५३; यह १८:३-१२

47 वयकलं थथे धयाच्वनादीबलय् हे झिनिम्ह मध्ये छम्ह चेला यहदा अन थ्यंकः वल। व नाप तःधंपि पुजाहारीत व थकालिपिन्सं छवयाहःपि नं वःगु दु। इमिसं तरवार व कथि ज्वनातःगु दु।

48 “जिं वनाः चुप्पा नइम्ह मनू व हे खः, छिमिसं वयात ज्वँ” धकाः धोखा बीम्हयसिनं इमित खँ स्यना हःगु दु।

49 उकिं वं वयेवं हे येशूयाथाय् वनाः “गुरु, ज्वजलपा” धयाः वयकःयात चुप्पा नल।

50 वयकलं वयात धयादिल – “पासा, छु यायेत वयागु खः याकनं याना छव।”

अले इमिसं वयकःयात ज्वन।

51 अबलय् हे वयकःया छम्ह चेलां थःगु तरवार पिकयाः दकलय् तःधंम्ह पुजाहारीया छम्ह दासयागु न्हायपं हे ध्यनाबिल।

52 वय्कलं वयात धयादिल – “तरवार दापय् स्वर्थँ। तरवार ज्वनाजुइम्ह तरवारं हे सी।

53 जिं ग्वाहालि फ्वन धाःसा जिमि बाःनं झिनिगू पल्टन स्वयाः अप्वः स्वर्गदूतत छवयाहया मदी ला? छिमिसं छु ताय्का?

54 थथे यात धाःसा धर्मशास्त्रय् च्वयातःगु खँ गथे जुयाः पूवनी?”

55 अले वय्कलं ज्वंविं मनूतय्त धयादिल – “जि छम्हयसित ज्वनेत थथे तरवार व कथि ज्वनावये माःगु छाय्? छु जि दारुँ खः ला? जिं देगलय् च्वनाः न्हियान्हिथं स्यनेकने याना जुयाबलय् छिमिसं जितः छाय् मज्वनागु?☆

56 अगमवक्तातय्सं धर्मशास्त्रय् च्वया थकूगु पूवनेमा धकाः हे थथे जूगु खः।” अले चेलात फुक्कं वय्कःयात त्वःताः उखेलाः थुखेलाः मदय्क बिस्सुं वन।

महासभाया न्ह्यःने येशू

मर्क १४:५३-६५; लूक २२:६६-७१; यूह १८:१३-१४,१९-२४

57 इमिसं येशूयात दकलय् तःधंम्ह पुजाहारीत कैयाफायाथाय् यंकल। शास्त्रीत व थकालिपिं नं अन मुनाच्चंगु दु।

58 पत्रूसं नं तातापाकं हे ल्यूल्यू वनाः दकलय् तःधंम्ह पुजाहारीया चुकय् थ्यंक हे वन। अले वय्कःयात छु छु याइ धकाः स्वयेत व पालेत नाप च्वंवन।

59 तःधंपिं पुजाहारीतय्सं व अन वयाच्चंपिं फुक्कसिनं जानाः वय्कःयात स्यायेत मखुगु मखुगु द्वपं बीत स्वल।

60 तःम्हयसिनं हे वयाः वय्कःयात मखुगु मखुगु द्वपं बिल। अयनं इमिसं छुं हे दसि क्यने मफुत। दकलय् लिपा निम्ह मनुखं वयाः

61 धाल – “थ्व मनुखं ‘परमेश्वरयागु देगः थुनाः स्वन्हं हे दने फु’ धकाः धाल।”☆

62 अले दकलय् तःधंम्ह पुजाहारी दनाः धाल – “थुमिसं धाःगु खँय् छं छुं धायेमाःगु दु ला?”

63 वय्कलं छुं हे धयामदी। अले दकलय् तःधंम्ह पुजाहारी हानं धाल – “म्वाःम्ह परमेश्वरयागु नामं जिं छन्त धयाच्चवना – छ परमेश्वरया काय्, मुक्ति बीम्ह खीष्ट खः ला?”

☆ 26:55 २६:५५ लूक १९:४७; २१:३७

☆ 26:61 २६:६१ यूह २:१९

64 वय्कलं लिसः बियादिल – “छिं थःमंह हे धयादिल। अयुं जिं छिकपिन्त धाये – आवंनिसें छिकपिन्सं मनूया काय्यात परमेश्वरया जव लहाःपाखे च्वनाच्वंगु व सुपौंचय् वयाच्वंगु खनी।”☆

65 थ्व न्यनाः दकलय् तःधंम्ह पुजाहारीं थःमंह फिनातःगु लं खुनाः थथे धाल – “थ्वं परमेश्वरयात क्वह्वांकाः खँ लहात। थ्वयां अप्वः मेगु दसि हे छु माल? थ्वं परमेश्वरयात क्वह्वांकूगु छिमिसं ता हे ताल।

66 छिमिगु छु बिचाः दु?” इमिसं धाल –

“थ्व दोषी हे खः, थ्वयात स्याये हे माः।”☆

67 इमिसं वय्कःयागु ख्वालय् थुकलं बिल, दाल। अले गुलिसिनं ला न्यतालय् दायाः☆

68 थथे धाल – “हे मुक्ति बीम्ह ख्रीष्ट, छ अगमवक्ता खःसा छन्त सुनां दाल, धा।”

पत्रुसं येशूयात म्हमस्यू धकाः धाःगु

मर्क १४:६६-७२; लूक २२:५४-६२; यूह १८:१५-१८,२५-२७

69 अबलय् तर्कं पत्रुस चुकय् हे च्वनाच्वन। छम्ह भ्वातिं नं वयाः वयात धाल – “छ नं गालील्य च्वंम्ह येशूनापं जुयाच्वंम्ह मखु ला?”

70 वं सकसिगुं न्ह्यःने “मखु” धकाः थथे धाल – “छं धाःगु खँ जिं मस्यू।”

71 व अनं लुखापाखे वंबलय् वयात मेम्ह भ्वातिं नं खनाः थथे धाल – “थ्व मनु ला नासरतय् च्वंम्ह येशू नाप जुयाच्वंम्ह खः नि।”

72 वं हानं पाफयाः “मखु” धकाः थथे धाल – “जिं वयात म्ह हे मस्यू।”

73 भचा जायकाः अन च्वंपिन्सं वयाः वयात थथे धाल – “छ नं व नाप जुयाच्वंम्ह खः नि। छंगु नवाइगु पहलं हे सी दु।”

74 अले वं पाफयाः धाल – “जिं मखुगु खँ ल्हानागु खःसा परमेश्वरं जितः सजाँय बियादीमा। जिं वयात म्ह हे मस्यू।” अबलय् हे ग्वंगः हाला हल।

75 अले वं येशू धयादीगु खँ लुमंकल – “खा हाले न्ह्यः छं जितः स्वकः तक म्हमस्यू धकाः धाइ।” अले व पिने वनाः ह्याँय् ह्याँय् ख्वल।

27

येशू रोमी बडा-हाकिमयात लःल्हाःगु

मर्क १५:१; लूक २३:१-२; यूह १८:२८-३२

☆ 26:64 २६:६४ दान ७:१३

☆ 26:66 २६:६५-६६ लेवी २४:१६

☆ 26:67 २६:६७ येशू ५०:६

1 सुथ न्हापां हे तःधंपि पुजाहारीतयसं व थकालिपिन्सं मुनाः येशूयात स्यायेगु ग्वसाः ग्वल।

2 अले इमिसं वयक्ःयात चिनायंकाः रोमी बडा-हाकिम पिलातसयात लःल्हाना बिल।

यहदा थथःम्हं सीगु

प्रे १:१८-२०

3 वयक्ःयात स्याइगु खँ सियाः ज्वंकूमह यहदां पस्ताय् चायाः तःधंपि पुजाहारीत व थकालिपिन्थाय् वनाः स्विगः वहःयागु म्वहः लित बिल।

4 अले धाल – “दोष मदूमह मनूयात स्याकेत ज्वंकाः जिं पाप याये लात।” अयनं इमिसं वयात थथे धाल –

“जिमित छु धया लय्? छं हे सीकि।”

5 वं वहःयागु म्वहः देगलय् वान्छवया थकल। अले वनाः यग्गानाः सित।

6 तःधंपि पुजाहारीतयसं यहदां वान्छवया थकूगु धिबा कयाः धाल – “थ्व हियागु मू खः, उकिं देगःयागु धुकुतिइ तये मज्यू।”

7 इमिसं थथे सल्लाह साहुति यानाः व दामं पिनें वःपि सित कि थुनेत धकाः कुमाःयागु जग्गा न्यात।

8 उकिं थ्व जग्गायात आः तक नं “हियागु जग्गा” धकाः धयावयाच्चवंगु दु।✠

9 थुकथं यर्मिया अगमवत्तां धयाथकूगु खँ पूवन –

“वयक्ःयात न्यायेत इस्राएलीतयसं

स्विगः वहःयागु म्वहः बिल।

10 व स्विगः वहःयागु म्वहलं

इमिसं छमह कुमाःयागु जग्गा न्यात।

थ्व खँ जितः प्रभुं धयादीगु खः।”✠

पिलातसया न्ह्यःने येशू

मर्क १५:१-५; लूक २३:१-५; यूह १८:२८-३८

11 येशूयात बडा-हाकिमया न्ह्यःने थने हल। वं वयक्ःयाके थथे धकाः न्यन – “छ यहदीतय् जुजु खः ला?”

वयकलं धयादिल – “छिं थःम्हं हे धयादिल।”

12 तःधंपि पुजाहारीतयसं व थकालिपिन्सं न्ह्याक्व हे द्रुपं ब्यूसां वय्कलं छुं हे धयामदी।

13 अयजूगुलि पिलातसं वय्कःयात थथे धाल - “इमिसं छन्त थुलिमछि द्रुपं बी धुंकल छं मताः ला?”

14 वय्कलं छुं हे धयामदी। थ्व खनाः तःधंम्ह हाकिम तसकं छक्क जुल।

येशूयात स्यायेगु क्वःछ्यूगु

मर्क १५:६-१५; लूक २३:१३-२५; यूह १८:३१-१९:१६

15 छुत्काराया नखःबलय् यहदीतयसं फ्वंम्ह छम्ह कैदीयात त्वःतेगु चलन पिलातसं यानातःगु दु।

16 अबलय् बारब्बा धाःम्ह छम्ह कुख्यात कैदी दु।

17 अयजूगुलि पिलातसं मनूतयके न्यन - “का धा, सुयात त्वःतेगु? बारब्बायात त्वःतेगु ला कि येशू ख्रीष्टयात त्वःतेगु?”

18 इमिसं वय्कःयात स्वये मफयाः ज्वंकूगु खः धकाः वं बांलाक स्यू।

19 थथे इन्साफ यानाचवंबलय् हे पिलातसया कलातं वयात थथे धाय्के छवयाहल - “वं धमीं मनूयात छुं हे यानादी मते, छायाधाःसा व मनूयागु खँय् जिं थौं म्हागसय् तसकं सास्ती फये माल।”

20 तःधंपि पुजाहारीत व थकालिपिन्सं मनूतयत् ग्वाकाः बारब्बायात त्वःताः येशूयात स्यायेमाः धकाः धाय्कल।

21 बडा-हाकिमं इमित हानं धाल - “का धा, सुयात त्वःतेगु?”

अले मनूतयसं “बारब्बायात त्वःताब्यु” धकाः धाल।

22 “अय्सा ख्रीष्ट धाःम्ह येशूयात छु यायेगु लय्?” धकाः पिलातसं इमिके न्यन।

“वयात कूसय् यख्खानाः स्यानाछ्व” धकाः फक्क मनूत छकलं हाला हल।

23 वं हानं धाल - “वं अपाय्सकं स्याये हे माय्क छु याःगु दु?”

अले इमिसं इन ततःसलं - “वयात कूसय् यख्खानाः स्याये हे माः” धकाः हाला हल।

24 मनूत थथे हाला हःगुलि पिलातसं छुं हे याये फइ थें मच्चवनाः सकसिगु न्ह्यःने ल्हाः सिलाः थथे धाल - “थ्व मनूयात स्याःगु दोष छिमित हे लाइ, जितः लाइ मखु।”☆

25 अले मनूतयसं थथे धयाहल – “ज्यु, वयात स्याःगु पाप जिमित व जिमि सन्तानयात हे लायेमा।”

26 अले पिलातसं बारब्बायात त्वःता छवल। येशूयात धाःसा कोर्रा दायकाः कूसय् यख्खाना स्याके छवल।

सिपाइँतयसं येशूयात हायकूगु

मर्क १५:१६-२०; यूह १९:१-३

27 अले पिलातसया सिपाइँतयसं येशूयात दरबारया चुकय् यंकल। सिपाइँत फुककं अन मुंवल।

28 इमिसं वयकःयागु वसः त्वकाः ह्याउँगु वसः पुंकल।

29 कंयागु श्रीपेच दयकाः वयकःयात पुइकाबिल। वयकःयागु जव लहातय तिकथि छपु नं ज्वंकल। अले वयकःया न्ह्यःने पुलि चुयाः थथे धयाः हायकल – “यह्दीतय् जुजुया जय जुइमा।”

30 अनंलि इमिसं वयकःयागु ख्वाल्य थुकलं बिल। हानं वयकःयाके च्वंगु कथि कयाः छैनय् दाया बिल।

31 थुकथं इमिसं वयकःयात गिजय् याये फक्व याये धुंकाः ह्याउँगु वसः त्वकाः न्हापायागु तुं वसतं पुंका बिल। अले वयकःयात कूसय् यख्खायेत यंकल।

येशूयात कूसय् यख्खाःगु

मर्क १५:२१-३२; लूक २३:२६-४३; यूह १९:१७-२७

32 येशूयात स्यायेत यंकाच्चंबलय् कुरेनी च्वंम्ह सिमोन धाःम्ह छम्ह मनूयात नापलात। अले इमिसं वयात कर कर यानाः येशूयागु कूस क्वबिकल।

33 इपिं गलगथा धाःगु थासय् थ्यन। गलगथायागु अर्थ खोपडी खः।

34 अन थ्यंकाः इमिसं वयकःयात स्याःमचाइगु वासः ल्वाकछ्यानाः दाखमघ त्वंकल। वयकलं उकियागु सवाः जक कयाः त्वना मदी।*

35 अनंलि इमिसं वयकःयात कूसय् यख्खायाबिल। अले चिष्टा तयाः वयकःयागु वसः इना काल।*

36 इपिं अनसं पियाच्चन।

37 इमिसं “थ्व यह्दीतय् जुजु येशू खः” धकाः वयकःयात दोष बियातःगु पौ वयकःयागु छ्यंफुसय् तिनाबिल।

38 उबलय् हे इमिसं वयकःयागु जवंखवं निम्ह दाखुँतयत नं यख्खायाबिल।

39 व लँ जुइपिं फुक्कसिनं छ्यं क्वातु क्वानाः वय्कःयात गिजय् यानाः थथे धाल -☆

40 “देगः थुनाः स्वन्हं हे दने फु धाःम्ह छ हे मखु ला? परमेश्वरया काय् खः धयागु जूसा कूसं क्वहां वयाः थःम्हं थःत बचय् या।”☆

41 अथे हे तःधपिं पुजाहारीत, शास्त्रीत व थकालिपिन्सं नं वय्कःयात थथे धकाः हाय्कल -

42 “थ्वं मेपिन्त ला बचय् यात, थःत धाःसा बचय् याये मफुत। इस्त्राएलीतय् जुजु खः धयागु जूसा कूसं क्वहां वयाक्यँ। अले जिमिसं विश्वास याये।

43 थ्वं परमेश्वरयात विश्वास यानाः - “जि परमेश्वरया काय् खः” धयाजुल। थ्व खनाः परमेश्वर धात्थे हे लयताः धयागु जूसा वय्कलं हे थ्वयात बचय् यानादी।”☆

44 वय्कःया जवंखवं यख्खाया तःपिं दाखुँतय्संनापं वय्कःयात हाय्कल।

येशू सीगु

मर्क १५:३३-४१; लूक २३:४४-४९; यूह १९:२८-३०

45 अबलय् न्हिनय् बाह्व बजेनिसें तीन बजे तक सारा देश हे खिउँसे च्वना वन।

46 तीन बजेपाखे येशू थथे धकाः तसकं हाला हल - “इलोई-इलोई लामा सबखथनी।” थुकियागु अर्थ खः - “जिमि परमेश्वर, जिमि परमेश्वर, छिं जितः छाय् त्वःतादिया?”☆

47 अन दनाच्चंपिं गुम्ह गुम्हयसिनं थ्व न्यनाः थथे धाल - “वं ला एलियायात सःता च्वन।”

48 छम्हयसिनं स्पन्ज चिनातःगु कथि कयाः ब्वाँय वनाः पाउँतिइ थुनाः हल, अले वय्कःयागु म्हुतुइ ल्वसुकाबिल।☆

49 गुलिसिनं धाल - “भचा आसे, एलियां हे वयाः बचय् याइ ला?”

50 वय्कः छकः हानं तसकं हालादिल, अले प्राण त्वःतादिल।

51 अबलय् हे देगलय् च्वंगु पर्दा च्वनिसें क्वथ्यंक निकू दलाः गुना वन। अले हानं भ्वखाय् ब्वल। पहाड चिरि बायावन।☆

52 चिहान चाला वल। अले सी धुंक्पिं यक्व हे विश्वासीत हानं म्वानावल।

53 येशू सिनाः म्वाना वये धुंकाः इपिं थःपिन्त थुनातःगु थासं दनाः पवित्रगु शहरय् वन। अले यक्व हे मनूतयथाय् खनेदय्कः वन।

☆ 27:39 २७:३९ भज २२:७; १०९:२५

☆ 27:40 २७:४० मती २६:६१; यूह २:१९

☆ 27:43

२७:४३ भज २२:८

☆ 27:46 २७:४६ भज २२:१

☆ 27:48 २७:४८ भज ६९:२१

☆ 27:51

२७:५१ प्रस २६:३१-३३

54 थथे भवखाय् ब्वःगु व अन जूगु फुक्कं खनाः येशूयात पिवाः च्वंपि कप्तान व सिपाइँत फुक्कं ग्यात। अले थथे धाल – “धात्थें हे व ला परमेश्वरया काय् खः।”

55 गालीलनिसें येशूयात ग्वाहालि यानाः वय्कः नाप वःपि मिसातय्सं नं तापाक्क च्वनाः थ्व फुक्क स्वयाच्च्वन।

56 थुपि मध्ये मरियम मग्दलिनी, याकूब व योसेफया मां मरियम, अले जब्दिया काय्पिनि मां खः।*

येशूयात चिहानय् तःगु

मर्क १५:४२-४७; लूक २३:५०-५६; यह १९:३८-४२

57 सन्ध्याकाः इलय् अरिमाथिया धाःगु थासय् च्वंम्ह योसेफ धाःम्ह छम्ह तःमिम्ह मनू अन वल। व नं येशूया चेला खः।

58 पिलातसयाथाय् वनाः वं येशूयागु सीम्ह फ्वन। पिलातसं वयात सीम्ह बिया छवयेगु उजं बिल।

59 अले योसेफ सीम्हयात भिंगु सुति कापतं हिनाः

60 थःगु निरिति धकाः म्हुयातःगु चिहानय् यनाः अन तयाबिल। थुलि याये धुंकाः वं छगः तग्वःगु ल्वहं ग्वारातुइकाः चिहानयागु प्वाः तिनाः अनं वन।

61 चिहानया न्ह्यःनेसं च्वनाः मरियम मग्दलिनी व मेम्ह मरियमं थ्व फुक्क स्वयाच्च्वन।

चिहानय् पिवाः तःगु

62 कन्हय् खुन्हु, विश्रामबार खुन्हु तःधंपि पुजाहारीत व फरिसीत जानाः पिलातसयाथाय् वनाः

63 थथे धाल – “हजुर, व ध्वंलाइम्हं म्वानाच्चंबलय् – ‘सिनाः स्वन्हु दय्काः हानं म्वाना वये’ धकाः धाःगु जिमि अज्ज लुमंनि।*

64 अयज्जगुलि स्वन्हु तक वयात थुनातःगु थासय् पिवाः तये माल। थथे यात धाःसा वया चेलातयसं वनाः वयागु सीम्ह खुयायंके फइ मखु। अले सीम्ह येशू हानं म्वानावल धकाः इमिसं बय्बय् याये फइ मखु। वं न्हापा याना वंगु स्वयाः थुमिसं लिपा याइगु ज्या झन ग्यानपुइ।”

65 अले पिलातसं धाल – “ज्य्, छिमिसं स्वयाः बल्लाक पाः ति।”

66 इमिसं वनाः प्वाः तिनातःगु ल्वहँतय् छाप तयाबिल। अले सिपाइँतय् नं पिवाः तया थकल।

* 27:56 २७:५५-५६ लूक ८:२-३ * 27:63 २७:६३ मती १६:२१; १७:२३; २०:१९; मर्क ८:३१; ९:३१; लूक ९:२२; १८:३१-३३

28

सीम्ह येशू म्वानावःगु

मर्क १६:१-१०; लूक २४:१-१२; यूह २०:१-१८

1 विश्रामबारया कन्हय् खुन्हु हप्ताया न्हापांगु दि सुथ न्हापां मरियम मगदलिनी व मेम्ह मरियम चिहानय् स्वःवन।

2 अबलय् आकाझाकां तसकं भवखाय् ब्वल। अले परमेश्वरया छम्ह दूत स्वर्ग वयाः प्वाः तिनातःगु ल्वहं चीकाः उकी घःने च्वन।

3 वयागु ख्वाः हावलासा च्याःगु थें थी, वसः नं च्वापु थें त्वइसे च्वं।

4 थ्व खनाः पिवाः च्वनाच्च्वपि सिपाइँत ग्यानाः सी थें च्वन।

5 व स्वर्गदूतं स्वः वःपि मिसातयत् थथे धाल – “छिपि ग्याये मते। छिपि कूसय् यख्खायाः स्याःम्ह येशूयात स्वः वःपि धकाः जिं स्यू।

6 येशू थन मदी। वय्कलं धयादी थें वय्कः सीम्हं म्वाना वये धुंकल। प्रभुयात तयातःगु थाय् स्वः वा।

7 याकनं वनाः वय्कःया चेलातयत् थथे धयाब्यु – ‘वय्कः म्वाना वये धुंकल। वय्कः छिपि स्वयाः न्हापां गालील्य् थ्यंकादी। अन छिमिसं वय्कःयात खनी।’ जिं धयागु थ्व खँ ल्वःमंके मते।”

8 इपि ग्या नं ग्यात, अले लय् नं ताल। अले इपि अनं हथाय् पथासं चेलातयत् थ्व खँ कनेत ब्वाँय् वन।

9 येशू इमित नाप लानाः “छिमित शान्ति दयेमा” धकाः धयादिल। इमिसं न्ह्यःने वनाः वय्कःयागु तुति ज्वनाः भवपुल।

10 “ग्याये मते, छिमिसं वनाः जिमि किजापिन्त ‘गालील्य् हँ’ धकाः धयाब्यु। अले अन हे इमिसं जितः खनी” धकाः वय्कलं इमित धयादिल।

पिवाः च्वपिन्सं खँ कं वंगु

11 इपि वने धुंकाः पिवाः च्वपि गुम्हं गुम्हं सिपाइँतयसं शहरय् वनाः अन जूगु खँ फुक्क तःधपि पुजाहारीतयत् कनाबिल।

12 तःधपि पुजाहारीतयसं थकालिपि लिसे सल्लाह साहुति यानाः व सिपाइँतयत् धिबा नकाः थथे धकाः खँ स्यन –

13 “छिमिसं ‘जिपि घनाच्च्वनाबलय् येशूया चेलातयसं वयाः वयागु सीम्ह खुयायंकल’ धकाः धा।

14 छुं जुयाः पिलातसं थ्व खँ सिल धाःसां जिमिसं वयात हाय्के। छिमित छुं नं जुइ मखु, छिपि ग्याये मते।”

15 पिवाः च्वंपि सिपाइँतयसं धिबा कयाः इमिसं स्यं थें यात। आः तकं यहदीतयसं थ्व हे खँ धयावयाचवंगु दु।

चेलातयत् लिपांगु तःधंगु आज्ञा

मर्क १६:१४-१८; लूक २४:३६-४९; यूह २०:१९-२३

16 झिंछम्ह चेलात येशू धयादीगु गालीलयागु पहाडय वन।*

17 इमिसं वयकःयात खनेवं वयकःयागु तुतिइ भवपुल। छम्ह निम्हयसिनं धाःसा वयकः हे खः ला मखु ला धकाः संका यात।

18 वयकलं इमिगु न्ह्यःने वयाः थथे धयादिल – “संसार व स्वर्गयागु फुक्क अधिकार जितः बियातःगु दु।

19 अयजूगुलि छिपिं वनाः फुक्क जातियापिं मनूतयत् चेला दयकि। अले इमित परमेश्वर बाःयागु नामं, काय्यागु नामं व पवित्र आत्मायागु नामं बाप्तिस्मा ब्यु।*

20 अले जिं स्यना थें छिमिसं इमित स्यनेकने यानाः फुक्कं खँ मानय् याकि। न्यँ, संसार फुना मवंतले जि छिपिनाप हे दइ।”

* 28:16 २८:१६ मती २६:३२; मर्क १४:२८

* 28:19 २८:१९ प्रे १:८

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7